

Diika' ben postlka'

Bcheb Jesúza' wselee Espíritu Sántona'

¹ Teófilo, lee libr necha' bzej', na' bzej' yog' dii wenka' ben Jesúza' na' diika' bli' bsdile' dezd ka wzoloe'

² axt ka bllin lla biyepe' yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'.

³ Na' ka wde wite' na' bibane' ladj ben' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che yel' wnabia' che Chioza'.

⁴ Na' shlak wzoalen Jesúza' postlka', golle' legake':
—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'.

⁵ Dii li Juanna' bchoe' ben' nisa', per le', aga chllach yidsoa Espíritu Sántona' loo yichjlall'do'lena'.

Biyep Jesúza' yabana'

⁶ Na' ben'ka' ndop nllag kwit Jesúza', wnabgakile'ne':

—Xan', ¿awibejo' cho' ben' Israel lo ni'a na' ben' zit'ka' naa kwenche inabi'o neto'?

⁷ Na' Jesúza' golle' legake':

—Bi chidol'le inezile bi lla bi gor gon Xacho Chioza' daa gone', la' toze' len' chnabi'e na' ba bllie' bia' batan gone'n.

8 Na' ka yidsoa Espíritu Sántona' l̥oo yichjlall'do'lena' na' gone' le' ye'l' wak, na' we'le xtillaana' yell Jerusalénna', na' doxen gani mbani Judeani na' lekzka' gana' mbani Samáriana', na' doxen zbii zkaaṅ yell-lioni.

9 Na' ka biyoll golle' ka', wzolo biyep'e' yabana' chwiate beṅ'ka', na' wze to bej bkwashaan le' na' bich ble'gakile'ne'.

10 Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil.

11 Na' gollgake':

—Le' beṅ' Galilea, ¿beraṅche chwiazle yabana'? Kwin Jesúza', beena' ble'ile bichej ladjleni na' biyep'e' yabana', kakzan ile'ilene' yiyede'.

Wlejgake' Matíaza' bizoe' lo laz Juda'

12 Na'ch biyetjgake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaṅgake'.

13 Na' ka billingake' Jerusalénna', biyepgake' yoon'a' llia shkwiana' cha'lə gana' zoagake'. Na' beṅ'kin billin: Pédrona', Jacóbona', Juanna', Andrėja', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas beṅ' bish' Jacóbona'.*

14 Yog' beṅ'ki chdopgake' yog' lla kon beṅ'ka' nak beṅ' bish' Jesúza' kwenṅche choe'lwillgake' Chioza', na' len Maríana' xṅa Jesúza' na' zi' baḷ noolka'.

* **1:13** Beṅ' bish' Jacóbona': beṅ'ka' nsed nagake' chiyal' inan xiin Jacóbona'.

15 Na' llaka' wzoagake' na', Pédrona' wzie' ladj beṅ'ka' chonlilall'gake' Jesucrístona', nakgake' ka do to guiyoa galjə, na' golle' legake':

16 —Le' beṅ' bish', benan byen billinin ka goll Espíritu Sántona' dii Davina' na' bzeje'n lee Cho'a Xtill' Chioza'. Bi'e dill' nakan gon Juda', beena' bchi'e beṅ'ka' beṅ'gake' Jesúza'.

17 Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'.

18 Na' mecha' daa beṅee che dii mala' daa bene', lennan' biziile' to yell-liō gana' bxope' de gozyichjlə na' goshj li'ena' na' bchej yog' xjloe'na'.

19 Na' ka wnezi beṅ' Jerusalénka' ka gok che Juda', na' bsi'gake' yell-liona' daa bizi'e Acéldama de xtill'gake', na' zejín Yell-lío Chen.

20 La' lee libr che Sálmoka' nan:

Yidesh yiloashga lill xlatje'na',

na' ni sto kochno soan.

Na' lekzka' nan:

Beṅ' yoblə yiyakshga lo nee daa nan gok lo nee gone'.

21 'Na' chonan byen kwejcho to beṅ'ki bengake' cho' txen toshiizi kana' wzoalen Xancho Jesúza' cho',

22 beṅ'ki nakgake' cho' txen dezd ka bchoa Juanna' Jesúza' nisa' axt ka biyepé' yabana', kwenche gone' cho' txen we'cho dill' nakan gok biban Jesúza' ladj beṅ' wetka'.

23 Na'ch wlejgake' chope': toe' le Matías, na' sto beṅ' yoo shonə leyin, José, Barsabás, na'ch Justo.

24 Na' be'lwilgake' Chioza', che'gake':

—Chios, beṅ' nak Xannto', li' nombi'o yichjlall'do' yog' beṅ'. Bliyi neto' no beṅ'ki chop ba wlejo'

²⁵ kwenche gake' neto' txen naknto' postl, la' Juda' ba bñite' daa ndolee yel' wen dii mal che'na' na' ziyaje' latja' gana' chidolee.

²⁶ Na'ch bengake' to wyitj kwenche wnezgakile' noran ba wlej Chioza', na' bidol' Matíaza', na' wlene' postlka' shnej.

2

Ka bid Espíritu Sántona'

¹ Na' ka bllin lla gol' lñi Pentecostéza', yog' beṅ'ka' chonlilall'gake' Jesúza' tozga ndop nllag-gake'.

² Na' tokonganzi bengakile' to sshag ka ga za' to be' wal, za'n yabalə na' wñiñ doxen loo yoona' gana' lle'gake'.

³ Na'ch ble'gakile' dii nak ka beḷ yi' chal'ñiñan, na' yog'ze' zen yichje'ka'.

⁴ Na' Espíritu Santo che Chioza' wyo'e loo yichjlall'do' to toe', na' wzologake' wnegake' wde wdeli dill', kon ka goklall' Espíritu Sántona' ine to toe'.

⁵ Na' lo llana' beṅ' zan beṅ' Israelka' lle' Jerusalénna' choe'la'ogake' Chioza', no beṅ' zaak wde wdeli yell dii lle' yell-lioni.

⁶ Na' ka bengakile' sshaga' daa chak, na' bdop bllaggake' gana' chak ka'. Na' goklejj gokgangakile' ka biyombia'gake' xtilleeka' daa chne beṅ'ka' lle' na'.

⁷ Na' le chibangakile', na' che' ljwelle':

—¿Aaga beṅ' Galilea yog' beṅ'ki choe' dill'ki?

⁸ ¿Nakra chak chakzgake' dill'ka' chñe to tocho, lla?

⁹ La' ni zoa beṇ' Partia, beṇ' Media, beṇ' Elam, beṇ' Mesopotamia, beṇ' Judea, beṇ' Capadocia, beṇ' Ponto, beṇ' Asia,

¹⁰ beṇ' Frigia na' Panfilia, beṇ' Egipto na' zi bale' beṇ' África, beṇ' zaak gaozə yell Cirénena', na' lekzka' len beṇ' za' Rómana'te. Bałcho nakcho beṇ' Israel, na' zi bałcho choncho beṇ' Israelki txen.

¹¹ Na' lekzka' zoa beṇ' Creta na' beṇ' Arabia. Na' yog'techo chenicho chñe beṇ'ki xtil' to tocho, choe'gake' dill' che dii wenka' ba ben Chioza', di-ika' chonan ka yibanicho.

¹² Na' yog' beṇ'ka' bdop bllag na', bibangakile' na' gokllej gokgangakile'. Na' che' ljuwellgake':

—¿Bi zejin dga, lla?

¹³ Na' bale' wnelegakile' legake', nagake':

—Zolli beṇ'kin.

Daa goll Pédrona' beṇ'ka' bdop bllag

¹⁴ Na'ch Pédrona' wzechaile' len postlka' zi shnej, na' wnie' zillj chi'e beṇ'ka' ndop nllag na':

—Le' beṇ' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyen' dga inia' le'.

¹⁵ Beṇ'ki nak' txen aga zollgakilen' ka chza'lall'zle, la' shzilgaz naa.

¹⁶ Dga chak ki naa, chillinin daa wna dii Joela', beena' bzej daa goll Chioza'ne' kani'yi, na' wne':

¹⁷ Kat' ba zoa illin lla te che yell-lioni, nad' Chios wi'a Espíritu cha'na' soe' loo yichjlall'do' beṇ'ka' lle' zbii zkaan yell-lioni.

Na' gon' kwenche xiinleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib',
na' beṅ' golka' inegakile' yel.

18 Na' ka'kzə wi'a Espíritu cha'na' yog' beṅ'ka'
choe'la'ogake' nad' llana' gak ka', ka beṅ'
byo ka noolə,

na' we'gake' dill'ka' wṅoa' cho'a lolleeka'.

19 Na' xan yabana' wli'a dii gonan ka yibani beṅ',
na' ka'kzə lo yell-lioni

wli'gakidee chen, na' yi', na' llen.

20 Wbilla' bich wzeeni'n,
na' bewaa yiyakan xna ka chen

ka zi' illin lla choo lla xen che Xanchona'.

21 Na' nottez beṅ' inabile' Xancho Chioza' gak-
lene'ne', na' yisle'ne' kwenche bi kwiajee.

22 Na' le' nakle beṅ' Israel, li wzenag dga inia' le'.
Nezkzile Chioza' wleje' Jesús, beṅ' Nazareta', daa
bi'ene' yel' wṅabia'na' kwenche bidyene' ladjleni
dii zan yel' wak choo yel' wak xen na' bichlə dii
benan ka bibani beṅ'.

23 Na' beeni goke' lall' na'le kon ka bllia Chioza'
bia' gak che', na' béx'lene' bénlene' lo na' beṅ'
malka' kwenche betgake'ne' lee yag cruza'.

24 Per Chioza' bisbane'ne' ladj beṅ' wetka', na' bi
bi'e latj guete' toshiizi, daa bi gok inabia' yel' wita'
le'.

25 Dii Davina' bi'e dill' che Jesús'a kani'yi, ka
wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni
nad'.

26 Daan le chibayi lall'dawaani na' cho'a dill' ka
mbalaz zoa'.

Na' beli chen cha'ni nonan lez yibanan,

27 la' aga wsanlalloo nad' toshiizi ladj ben' wetka', ni bi wi'o latj gooll' iteb beli chen cha'ni daa nak' lall' no'.

28 Ba bliilo' nad' nakan nak neza' sho'a kwenche gat'ch yel' mban cha', na' yiba yizakid' daa soalen' li' toshiizi.

29 'Le' ben' bish', nezczicho dii xozxto'cho Davina' wite' na' bkwash'gake'ne', na' ni nakbia'te naa gana' bkwash'gake'ne'.

30 Na' dii Davina' bi'e dill' diika' goll Chioza' le', na' wnezile' kwin Chioza' bchebe' wzoe' to xiin dia' che' inabi'e.

31 Chioza' bliile' dii Davina' diika' zi' gak che Crístona', na' bi'e dill' yibane' ladj ben' wetka' ka wne' aga wigaane' ladj ben' wetka' na' ni bi gooll' iteb beli chen che'na'.

32 Na' ka' gok, Chioza' bisbane' Jesúza' ladj ben' wetka', na' yog'nto' ble'into'ne' na' choe'nto' dill' bibane'.

33 Na' ka' biyoll bigoyoe'ne' yabana' na' wlekwe'ne' kwite' de shlina', bene' lo nee bselee Espíritu Sántona' ladjnto'ni ka bchebe'. Na' Espíritu Sántona' ba bene' yog' dga ba ben ble'ile naa.

34 Bi gakile dii Davinan' biyep'e' yabana', la' kwine', wne':

Xancho Chioza' golle' Xan'na':

“Wche' kwit' de shli ni

35 shlak wzoa' xni'ona' ben'ka' chakzbani li'.”

36 'Na' nia' le', yog'cho cho' ben' Israel chiyal' inezicho, Jesúza', beena' betle lee yag cruza', Chioza' bzoe'ne' nake' Xancho, na' len' Crístona', beena' wlej Chioza' inabi'e cho'.

37 Na' ben'ka' lle' na' ka bengakile' goll Pédrona' legake' ka', le nyesh'chga gokgakile', na' wñabgakile' Pédrona' na' postlka' sto, che'gake':

—Le' ben' bish', ¿beran chiya' gonnto' shka'?

38 Na'ch Pédrona' chi'e legake':

—To tole, li yiyaj yileni na' li choa nisa' shi ba chonlilall'le Jesucristona', na' yiyakxen xtol'leka' na' yidsoa Espíritu Sántona' loo yichjlall'do'lena'.

39 Chioza' ba bchebe' gone' le Espíritu che'na', na' len xiinleka', na' nottez ben' zit'. La' nchebe' wi'ene' yog' ben' gaxe' kwenche gonlilall'gake'ne'.

40 Na' dii zanch dill' be'len Pédrona' legake', got'yoile' legake', chi'e:

—Li yisla kwinle lao yel' zi'na' daa ile'i ben' wen dii malka' bi chajle' che Chioza'.

41 Na' ben'ka' wyajle' daa goll Pédrona' wchoagake' nisa'; na' lo llana' shona mil ben'ka' wlen-gake' ben'ka' nonlilall' Jesús'a'.

Ka ben ben'ka' benlilall' Jesucristona' dii nech

42 Na' yog'gake' wzegake' wneyi bengake' diika' bli' bsedi postlka' legake', na' xochi wzoagake'. Na' bdop bllaggake' be'lwillgake' Chioza' na' weej wdaogake' txen.

43 Na' yog'ze' bibani daa ble'gakile' yel' wak zanka' ben postlka'.

44 Na' yog' ben'ka' chonlilall'gake' Jesús'a' gokgake' toz, na' choe' ljwelle' bi ka dii chyallji to toe'.

45 Na' biyit' bidegake' no yell-lio, no yoo chegake' wa bichlæ dii napgake' na' choe' ljwellgake' ka to dii chyallji to toe'.

46 Na' yog' lla bdopgake' lesh' chyoodo'na' choe'lwillgake' Chioza', na' lekzka' bibagakile' weej wdaogake' txen lill ljwellgake'.

47 Na' wzoatezi wzoagake' be'la'ogake' Chioza' na' yog'zə beŋ' gokbe'gakile' ka mba chongake'. Na' yog' lla, Xancho Chioza' bene' ka wyanch beŋ'ka' beŋlilall' Jesucristona'.

3

Biyaki to beŋ' bi chak sa'

1 To lla do ka chida shonə shlle'na', ka gora' chdop chllag beŋ' Israelka' choe'lwillgake' Chioza', Pédrona' len Juanna' wyajgake' yoodo'na'.

2 Na' cho'a puert che zeena' daa nechj yoodo'na', puert daa nsi'gake' Puert Xochi, chi' to beŋ' nxinj ŋi'ena' ka goljtie'. Na' yog' lla chjlekgake'ne' na' kwenche chñabe' karidá lao beŋ'ka' chdop chllag yoodo'na'.

3 Na' ka bllin Pédrona' na' Juanna' gana' chi'e, na' wñabile' legake' izangakile' lat' mech we'gake'ne'.

4 Na'ch Pédrona' len Juanna' bwiagake'ne', na' Pédrona' golle'ne':

—Bwiakachi neto'.

5 Na' beena' bwie' legake', gokile' mechan' we'gake'ne'.

6 Na' Pédrona' chi'ene':

—Bibi mech nap' gon' li', lete dii nap' gon' li'. Kon yel' wak che Jesucristo, beŋ' Nazareta', nia' li' bizolla' na' bigoo nez.

7 Na'ch Pédrona' wdoyoe' nee de shlina' na' bisolléene', na' lii biyakteyi ŋi'ena'.

⁸ Na'ch ka beṅ' bxit'zə bene' bizollee. Na' wyoo-lene' legake' lesh' chyoodo'na' chechj chde' na' chxit'sheshe' choe'lawee Chioza'.

⁹ Na' yog' beṅ'ka' lle' na' ble'gakile'ne' chde' choe'lawee Chioza',

¹⁰ na' billej bibangakile' daa nombia'gake'ne' chbi'e chṅabe' karidá cho'a puert daa nsi'gake' Puert Xochi.

Bzajonii Pédrona' beṅ'ka' ndop nllag lesh' chyoodo'na'

¹¹ Na' beena' biyaki ṅi'ena' aga bsane' Pédrona' len Juanna', kon noe' legake'. Na' yog' beṅ'ka' lle' lesh' chyoodo'na' chillej chibangakile' na' wyaj-dogake' gana' zoa koridor daa le Koridor Che dii Salomón gana' zelengake' beena' biyaki.

¹² Na' ka ble'i Pédrona' beṅ'ka' chdop chllag na', golle' legake':

—Le' beṅ' Israel, ¿beraḇche chibanzile daa biyaki beeni? ¿Na' beraḇche chwiazle neto'? ¿Achakile kon yel' wak chento'nan' biyaki beeni? ¿Awa chakile daa zoanto' chonnto' ka chiyoolallii Chiozan' biyakile'? Aga daan.

¹³ Chios, beena' be'la'o dii Abrahama', dii Isaaca', dii Jacoba', na' nochlə dii xozto'choka', len' wlo'e Xiine' Jesúza' balaan xenna', beena' benle lo na' beṅ'ka' betgake'ne'. Na' ka goklall' Pilátona' yisane'ne', bi be'le latj.

¹⁴ Lwaa dii nan inable yisane' Jesúza', beena' nak liizelozi beṅ' li beṅ' shao', beṅ' wen xyana'lə wṅable bisane'.

¹⁵ Kan' benle betle Jesúza', beena' choṅ yel' mban daa nak dowalj. Per Chioza' bisbane'ne' ladj

ben' wetka', na' neto' choe'nto' dill' daa nezinto' bibane'.

16 Daa chonlilall'nto' Jesúzan', ba biyaki beeni chwiale na' nombia'le. Dii li, daa nonlilall'nto' Jesúzan' chwiatele ba biyakchaile'.

17 'Le' ben' bish', nezid', ka le' na' ka ben'ka' chnabia' le', bi gokbe'ile bin benle ka betle Jesúsza'.

18 Na' Chioza' bi'e latj gok ka' kwenche billinin ka wna dii ben'ka' wdixjee xtilleena' kani'yi, daa wnagake' Crístona' biya dii wchi' wsak' ben' le'.

19 Na' naa, li wzenag che Xancho Chioza', na' li yiyaj yileni dii malka' chonle kwenche yizi'xene' chele na' wzoe' le' mbalaz.

20 Na' yiselee Crístona', beena' wleje' kwenche inabi'e, kon ka wdixjee dii ben'ka' kani'yi.

21 Chonan byen yigaane' yabana' ax̄t ka illin lla yiyonshao' Chioza' yog'lolte dii de, kon ka goll Chioza' dii ben'ka' wleje' wdixje'gake' cho'a xtilleena' kani'yi.

22 La' dii Moiséza' golle' dii xozxto'choka' dill'ki: “Xancho Chioza' kweje' sto ben' ka nad' ladjleni, ben' chixje'ile' le' bi dill' we'lene'ne'. Na' li wzenag yog' daa ine'.

23 Na' beena' bi wzenag che', Chioza' kwej yichje'ne' na' bich gak gone' txen ben'ka' nak yell che Chioza'.”

24 'Na' yog'lol dii ben'ka' wdixjee daa goll Chioza' legake' kani'yi, wzolozan kon dii Samuela', wdixje'gake' gak diiki chak naa.

25 Len', naki chele daa ba bcheb Chioza' lao dii ben'ka' wdixjee daa golle' legake' kani'yi. Na' lekzka' naki chele dii wenna' daa bcheb Chioza' gone' che dii xozxto'cho Abrahamama', ka golle'ne': “Ni che

xiin dia cho'na' gon' dii wen che yog'lol ben' lle' zbi zkaan yell-lioni.”

²⁶ Na' ka bsel' Chioza' Xiine' Jesúza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

4

Pédrona' len Juanna' gokgake' lo na' ben'ka' chnabia' ben' Israelka'

¹ Na' ni choe'lente Pédróna' len Juanna' ben'ka' dill' ka bllin b̄xozka' len beena' ngoo lo nee ben'ka' chap yoodo'na' na' len zi bal saduceoka'.

² Le chllaagake' daa chli' chsedi Pédróna' len Juanna' ben'ka' lle' na' nakan gok biban Jesúza' ladj ben' wetka'.

³ Na'ch bex'gake' legake', na' daa ba wlle', jloogake' legake' lillyana', axt betiyoch bibejgake' legake'.

⁴ Per ben' zan ben'ka' bzenaggake' dillaa be' Pédróna' len Juanna' ben' lillall'gake' Jesúza'. Na' ka', wyanch ben'ka' ben' lillall'gake'ne', na' gokgake' ka do gayaa mil to ben' byoka'zə.

⁵ Na' betiyo bidop billag ben'ka' chnabia' ben' Israelka' yell Jerusalénna', len ben' golka' chnabia', na' ben'ka' chli' chsedi leya'.

⁶ Na' lekzka' len Anáza', beena' nak b̄xoz choo b̄xoz xen, na' Caifáza', Juanna', Alejándrona', na' nokchlə ben'ka' nak dialla che b̄xoz choo b̄xoz xenna'.

⁷ Na'ch bzegake' Pédróna' len Juanna' gchole'ka', na' wñabgakile' legake':

—¿No lsens cheyi na' no bsel' le' chonle diiki?

⁸ Na' Espíritu Santo che Chioza' bzajniile' Pédróna' kwenche golle' legake' ki:

—Le' beṅ' wṅabia', na' le' beṅ' gol chṅabia'le yell Israeli,

⁹ chṅabile neto' ka nak dii wenna' gok che beeni, na' cheenile inezile nakan gok biyakile'.

¹⁰ Cheeninto' yog'lol-le inezile na' yog'lol beṅ' Israelka' inezgakile', beeni chwiale ze laoleni biyakile' kon yel' wak che Jesucristo, beṅ' Nazareta', beena' betle lee yag cruza', per Chioza' bisbane'ne' ladj beṅ' wetka'.

¹¹ Che Jesúsán' choe'n dill' daa nan “yaja' daa bi wyoolall'le le' nakle wen yoo, leyen'lannan' yaja' daa ba nchejcha yoona'.”

¹² Bichga zoa sto beṅ' yoblə gak yisle' cho' kwenche bi kwiayi'cho. La' kochno zoa doxen yellioni beṅ' ba wlej Chioza' kwenche yisle' cho'.

¹³ Le bibani beṅ' wṅabia'ka' daa chwiagake' bi blleb Pédróna' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúsá' txenan chongake' ka'.

¹⁴ Na' daa ze beena' biyaki ni'ena' kwite'ka', bibi gok ye'gake' legake'.

¹⁵ Na'ch bibejgake' legake' shlak be'len ljwellgake' dill' nak koogake' xnezin.

¹⁶ Che' ljwelle':

—¿Nakra goncho che beṅ'ki? La' yog'zə beṅ' zoa Jerusalénni inezgakile' ba bengake' to yel' wak xen, na' aga wak inacho bi nakan ka'.

¹⁷ Na' kwenche bich ides dill'ka' choe'gake', chiyal' kooshebchogake' kwenche kochno we'lengake' dill' che Jesúsá'.

¹⁸ Na'ch goxgake' Pédróna' len Juanna' dii yoblə,

na' gollgake' legake' bich wli' wsedgakile' ben' ni bi we'lengake' legake' xtill' Jesúza'.

19 Na' Pédrona' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'.

20 Bi gak wsannto' we'nto' dill' daa ben ble'into' che Jesúza'.

21 Na'ch ben' wnabia'ka' biya dii gollgake' legake' kwenche nan illebgake', na'ch bisanchoklögake' legake', la' bibi billet-lall'gake' gongake' daa yog'zə ben' choe'la'ogake' Chioza' ni che daa gok.

22 Na' beena' biyaki ni'ena' kon yeł' wak che Jesúza' ba wdeile' choa yiz.

Wnabgakile' Chioza' gaklene' legake' we'gake' xtilleena'

23 Na' ka bisangake' Pédrona' len Juanna', biyaj-gake' gana' zoa ben'ka' nonlengake' txen na' goll-gake' legake' yog' daa goll b_xozka' chnabia' na' ben' golka' chnabia'.

24 Na' ka bengakile' daa gollgake' legake', na'ch gokgake' toz be'łwillgake' Chioza', che'gake':

—Chios, li' nako' ben' zeelo chnabia'. Li' beno' yabana', yell-lioni, na' nisdo'na', na' yog'te dii de lo yell-lioni.

25 Na' Espíritu Santo cho'na' b_xoe' dill'ki cho'a loll' dii Davina' kana' wne':

¿Berache chllaa chlokz ben' yell-lioki?

¿Berache toshiizi chgoo ben'ki xnezin gongake' daa bi nxe bi nzak'?

26 Ben'ka' chnabia' lo yell-lioni gokgake' toz gokzbangakile' na' biniatezgake' Xancho Chioza' len Crístona', beena' wleje' kwenche inabi'e.

27 'Dii li yell Jerusalénni Heródeza' na' Poncio Pilátona', len beṅ' zit'ka' na' beṅ' Israelka', bdop bllaggake' gokgake' toz goklall'gake' wlliyi'gake' Jesúza', beena' nak liizelozi beṅ' li beṅ' shao', beena' wlejo' kwenche inabi'e.

28 Na' daa bengake' ka', gok ka bllio' bia'.

29 Na' naa Chios, bwia ka ngoosheb beṅ' wṅabia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'.

30 Bli' yel' wak cho'na' kwenche yiyaki beṅ' bi shao' na' kwenche gonnto' bichlə dii yibani beṅ' kon yel' wak che Xiino' Jesúza', beena' nak liizelozi beṅ' li beṅ' shao'.

31 Na' ka biyoll be'lwillgake' Chioza', wxo' wṅib latja' gana' ndop nllaggake', na' wṅabia'chga Espíritu Sántona' legake' na' bi bllebgake' we'gake' cho'a xtil' Chioza'.

Daa de che to toe' benin che yoguee

32 Na' yog' beṅ'ka' ba chonlilall' Jesúza', toz ka gok yichjlall'do'eka'. Na' yog' daa de che to toe', benin che yoguee. Ni toe' bi wna: “Cha' dga.”

33 Na' postlka', kon yel' wak xen che Chioza', be'chgake' dill' che Xancho Jesúza' daa bibane' ladj beṅ' wetka', na' Chioza' dii xen goklene' yog'lole'.

34 Na' ni toe' bibi byallji, la' beena' de yell-lío che' wa lille' na' chiyiteen, na' mecha' daa choxee cheyin

35 cho'en postlka' kwenche choe'gake' kon ka'k' wej chyallji to toe'.

³⁶ Na' wzoa to beṇ' Chipre lie' José. Nake' dia che dii Levína', na' postlka' bsi'gake'ne' Bernabé, na' zejin witip lall' beṇ'.

³⁷ Na' Joséni biyitee to yell-lio dii nape', na' mecha' bi'en postlka'.

5

Ananíaza' na' Safírana' wxiye'gake'

¹ Na' wzoa to beṇ' wlie' Ananías, na' xoole'na' wlie' Safira, na' biyit'gake' shkwe' yell-lio che'ka'.

² Na' Ananíaza' len xoole'na' gokgake' toz bkwaangake' lat' mecha' na' bentezgake' ka be' doxenan postlka'.

³ Na'ch Pédrona' golle'ne':

—Ananías, ¿berache be'zo' latj wṇabia' Satanáza' yichjlall'do'na' na' chakilo' siyoo Espíritu Sántona' daa bgaanleno' lat' mecha' daa wdixjgake' che yell-lio cho'na'?

⁴ Cho' yell-liona' kana' zi' yiyitoo, na' cho' mecha' daa beṇoo cheyin ka biyitoo. ¿Berache wloolzə yichjlall'do'na' siyoo? Aga beṇ' yell-lionin chziyoo, san Chiozan' cheenilo' siyoo.

⁵ Na'ch ka beni Ananíaza' daa goll Pédrona', to ka billeeze' wite'. Na' le blleb yog' beṇ'ka' wṇezi ka gok che'.

⁶ Na' bllin to chop bi' wew' gana' chtoḷ Ananíaza', na' bitobgakbee to lech' na' jakwash'gakbee.

⁷ Na' gok ka do shoṇ gor ka bllin xoole'na', aga ṇezile' bin ba gok che beṇ' che'na'.

⁸ Na' wṇabi Pédrona'ne', chi'ene':

—Wnashki nad', ¿aka to nakz beṇ' cho'na'n biyit'le yell-lio chelena'?

Na' Safírana' chi'ene':

—Awe, ka't'kzan biyit'nto'n.

⁹ Na'ch che' Pédrone':

—¿Berache benzle toz dill' kon beṅ' cho'na' chakile wak siye'le Espiritu che Chioza'? Cho'a yooni ba ziza' bi'ka' jakwash'gakb' dii beṅ' cho'na', na' naa lljakwash'gakb' li'.

¹⁰ Na' lii billeete Safirana' wite' lao Pédrone'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii beṅ' che'na'.

¹¹ Na' le blleb beṅ'ka' nonlilall' Jesucristona' len yog' beṅ'ka' wnezi ka gok che dii Ananíaza' na' dii Safirana'.

Postlka' bengake' dii zan yel' wak

¹² Na' postlka' bengake' dii zan yel' wak na' bichlə dii chonan ka yibani beṅ' ladj beṅ'ka' lle' Jerusalénna'. Na' yog' beṅ'ka' chonlilall' Jesúsza' chdop chllaggake' loo koridor che yoodo'na' daa le Koridor che dii Salomón.

¹³ Na' nochlə beṅ'ka' aga biyaxjgakile' gongake' legake' txen, la'kzi le ble'shiigakile' legake'.

¹⁴ Na' beṅ' zan, ka noolə ka beṅ' byo, benlilall'gake' Xancho Jesúsza'.

¹⁵ Na' chyixjgake' tnezka' beṅ'ka' bi shao', nxoagake' legake' no lo yagla' na' no lo daa, kwenche kat' te Pédrone' la'ch' bxeṅ' che'na' ten gana' degake' na' yiyakgakile'.

¹⁶ Na' lekzka' zan beṅ' yellka' lliā gaozə Jerusalénna' chajgake' lao postlka' chjwa'gake' beṅ' che'i yillwe' na' beṅ' yoo dii xiw'ka'. Na' yog'lolzgake' chiyaki.

Wloogake' postlka' lillyana'

17 Na'ch b̄xoz choo b̄xoz xenna' na' saduceoka', beṅ'ka' nakgake'ne' txen, gokxee gokzbangakile' postlka'.

18 Na'ch beṅ'gake' postlka' na' wloogake' ḷegake' lillyana'.

19 Na' waḷa' bllin to anjl che Xancho Chioza' bsalje' lillyana' na' bibeje' ḷegake', na' golle':

20 —Li yiyaj yoodo'na', na' ḷi wzajniḷ beṅ'ka' chdop chllag na' doxen ka nak yeḷ' mban zeḷi kaṅi daa we' Chioza' ḷegake'.

21 Na'ch ka wyeeni', biyajgake' yoodo'na' ka goll anjla' ḷegake', na' bli' b̄sedgakile' beṅ'ka'.

Na'ch b̄xoz choo b̄xoz xenna' na' beṅ'ka' nakgake'ne' txen bitopgake' yog'loḷ beṅ'ka' chṅabia' yell Israela', na' b̄seḷ'gake' beṅ' kwenche nan lljxi'gake' postlka' de lillyana'.

22 Na' ka bllin beṅ'ka' chap yoodo'na' cho'a lillyana', kochno postlka' de na'.

23 Na'ch jayellgake' beṅ'ka' chṅabia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to beṅ' bi yoo lo'inna'.

24 Na' beena' ngoo lo nee beṅ'ka' chap yoodo'na', len b̄xozka' chṅabia', ka bengakile' che'gake' ka', na' gokgakile' gate yiyoll yido dga.

25 Na' ni choe'tegake' dill', bllin to beṅ' chi'e ḷegake':

—Beṅ'ka' wloole lillyana' lle'tgake' yoodo'na' chli' ch̄sedgakile' beṅ'ka' lle' na'.

26 Na'ch wyaj beṅ'ka' chap yoodo'na' kon beena' chṅabia' ḷegake' jaxi'gake' postlka' xochi. Bibi bengakile' ḷegake' daa b̄llebgake' shi beṅ'ka' chzenag chegake' wlliagake' ḷegake' yaj.

27 Na' ka billinlengake' postlka' lao beṅ'ka' chṅabia' yell Israela', na' bḫoz choo bḫoz xenna' chi'e legake':

28 —¿Abi chajle'kzlen nanto' le' bich wli' wsedzile beṅ' xtill' Jesúza'? Na' li wwia ka ba benle, ba bli' bsedile yog' beṅ' Jerusalénki cho'a xtilleena', na' cheenile wtobile neto' daa betgake'ne'.

29 Na'ch Pédrona' len postlka' sto che'gake':

—Chonchan byen wzenagnto' che Chioza' aga ka che beṅ' yell-lioni.

30 Le' betle Jesúza' na' bda'lene' lee yag cruza'. Na' Chios, beena' be'la'o dii xozxto'choka', le' bisbane'ne' ladj beṅ' wetka'.

31 Na' Chioza' ba mbeke'ne' kwite' de shlina' gana' ba chi'e chṅabi'e, na' nzoe'ne' kwenche yisle' beṅ' lao dii mala', la' cheenile' yog' beṅ' Israelki yiyaj yileni dii malka' chongake' kwenche yizi'xen Chioza' chegake'.

32 Na' neto' choe'nto' dill' daa ble'into' gok che Jesúza', na' daa betj Espíritu Sántona', beena' ba bzoa Chioza' loo yichjlall'do' yog' beṅ' chzenague' che', lekzka' chli'n nakan ka nannto'.

33 Na' ka beni beṅ' wṅabia'ka' daa goll postlka', le bllaagake' na' goklall'gake' witgake' legake'.

34 Na' ladj beṅ'ka' chṅabia' len to fariseo, beṅ' le Gamaliel, beṅ' chli' chsedi leya', na' yog'z beṅ' chle'shi'gakile'ne'. Na' wzollee, golle' legake' kwejgake' postlka' xtit chyoolə,

35 na' golle' beṅ' wṅabia'ka':

—Le', beṅ' Israel, li wsak' shi bin gonile beṅ'ki.

36 Li lljadini kani batz bchej to beṅ' le Teudas, na' wne' nake' to beṅ' zakii, na' ka do tap guiyoa beṅ'

bengake'ne' txen. Na' ka betgake'ne', yog' beṅ'ka' gokgake'ne' txen biyeslesgake', bich bi bengake'.

³⁷ Na' ka wde gok ka', wizak dii yoblə kana' chlabgake' baḷ beṅ' lle' to to yell, na' bizchej Judas beṅ' Galileana', na' ka'kzə beṅ' zan bengake'ne' txen. Na' lekzka' betgake'ne' na' biyesles beṅ'ka' gokgake'ne' txen.

³⁸ Na' naa, nia' le' bibi gonile beṅ'ki, la' ka nak dga chli' chsedgakile', shi nakan dii chyiljall'zgake' winitlokzan.

³⁹ Na' shi nakan che Chios, aga wak yisol yinitlen. Chiyal' wwiayen'le kwenche bi gaktiilenle Chioza'.

⁴⁰ Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bllongake' kochno wli' wsedgakile' xtill' Jesúza'. Na' biyolla' bisangake' legake'.

⁴¹ Na'ch bichej postlka' gana' ndop nllag beṅ'ka' chṅabia', na' le chibagakile' daa be' Chioza' latj bchi' bsak' beṅ'ka' legake' daa choe'gake' xtill' Jesúza'.

⁴² Na' yog' lla postlka' bli' bsedgakile' xtill' Jesu-crístona' yoodo'na' na' lill beṅ'.

6

Wlejgake' gall beṅ' gak lall' nagake' mandadka'

¹ Na' ka zej chanch beṅ'ka' chonlilall' Jesúza', beṅ'ka' chṅe dill' griegona' wzolo che'gake' aga chaklebi ikaa noolə wizebka' chṅe dill' griegona' ka to daa chkaa nool wizebka' chṅe dill' hebrewa' kat' chyisgake' yel' wawa' yog' lla.

² Na'ch postlka' shllin bti'agake' yog' beṅ'ka' chonlilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto' we'nto' dii yeej gao beŋ'.

³ Na' le' beŋ' bish', li kwej gall beŋ' ladjleni, beŋ' chon wen, beŋ' chajni, na' chñabia' Espíritu Sántona' legake'. Na' gak lall' na'gake' chisgake' yel' wawa'.

⁴ Na' neto' we'l-lall'chnto' we'lwillnto' Chioza' na' wli' wsedchinto' beŋ' cho'a xtilleena'.

⁵ Na' yog'z beŋ'ka' biyoolall'gake' ka goll postlka', na' wlejgake' beena' le Esteban, nake' beŋ' nonlilall'chgue' Chioza' na' chñabia' Espíritu Sántona' le'. Na' lezkza' wlejgake' Felípena', Prócorona', Nicanora', Timónna', Parménaza', na' Nicoláza', beŋ' Antioquíana', beena' bene' txen beŋ' Israelka'.

⁶ Na' jwa'gake' legake' gana' lle' postlka', na' postlka' bxōa neeka' yichje'ka' na' wñabgakile' Chioza' gaklene' legake'.

⁷ Na' beŋ' zanch beni cho'a xtill' Chioza' na' wyanchga beŋ'ka' beŋ'lilall'gake' Jesúza' Jerusalénna', na' zan bxozka' bzenaggake' na' beŋ'lilall'gake' Jesúza'.

Bex'gake' Estébanna'

⁸ Na' Estébanna', wzoalenchga yel' wak che Chioza' le', na' dii xen goklene'ne' kwenche bli'e yel' wakka' na' bichlə dii chonan ka yibani beŋ'.

⁹ Na'ch lle' shkwen beŋ' Israelka' ba biyell bila' lo na' beŋ'ka' wxi' legake', na' non chelagake' chdop chllaggake' gana' choe'lwillgake' Chioza'. Na' gok-gake' toz bal beŋ' Cirene, beŋ' Alejandría, beŋ' Cilicia, na'ch beŋ' zaak do Ásiana', gokdil-lengake' Estébanna'.

¹⁰ Na' aga gokgake' yel' sin' che Estébanna', daa chñie' kon ka che' Espíritu che Chioza'ne'.

¹¹ Na' wdixjgake' bal' ben' kwenche wxiye'gake', che'gake': "Ba beninto' Estébanna' chñie' zban che dii Moiséza' na' che Chioza'."

¹² Na' daa gollgake' ka', bta bñegake' ben' zan, len ben' golka' chñabia' na' ben'ka' chli' chsedi leya' kwenche bex'gake' Estébanna' na' jwa'gake'ne' lao ben'ka' chñabia' ben' Israelka'.

¹³ Na' wdiljchgake' ben'ka' wxiye', kwenche gollgake':

—Bi chsankzə beeni inie' che yoodo' che Chios chechona', na' che ley che'na'.

¹⁴ Na' ba bizeninto' chizne' Jesús, ben' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

¹⁵ Na' yog' ben'ka' chi' chongake' yel' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

7

Estébanna' bi'e dill' lao ben' wñabia'ka'

¹ Na'ch b̄xoz choo b̄xoz xenna' wñabile' Estébanna', chí'ene':

—¿Alekzi ben'ki ka chono'n?

² Na' Estébanna' chi'e legake':

—Le' ben' bish' na' le' nakle ka xanto', li wzenag dga inia' le': Chios chechona', beena' liizelozi nak ben' choo ben' xen, bli'lawe' dii xoxzto'cho Abrahama' kana' zoe' yell-liona' mbani Mesopotámiana', kana' zi' shaje' yell Haránna'.

3 Na' Chioza' golle'ne': "Bkwaan yell cho'ni na' dialla cho'ka', na' wyaj yell-lio gana' wliid' li'."

4 Na'ch dii Abrahama' bcheje' gana' mbani ben' caldeoka' na' jsoe' yell Haránna'. Na'ch ka wde wit xe'na', Chioza' bizseleene' gani zoacho naa.

5 Na' Chioza' bi bene' lo na' dii Abrahama' ni lat' yell-lioni de ni, san bchebe' wi'ene'n na' kat' guete' yigaanan lo na' xiin dia che'na', la'kzi aga non' bi che dii Abrahama' ba zoa ka golle'ne' ka'.

6 Na' lekzka' Chioza' chi'ene' xiin dia che'ka' soa-gake' yell zit' na' inabia' ben'ka' legake' wgongake' legake' llinna', na' wsak'zi'gake' legake' tap guiyoa yiz.

7 Na' lekzka' Chioza' golle'ne': "Gon' yel' zi che ben'ka' wchi' wsak'gake' legake', na' yiyolla' yiza'gake' lall ben'ka' na' yiyedgake' ni, na' we'la'ogake' nad'."

8 Na' ka bcheb Chioza' gone' dii wen che dii Abrahama', golle'ne' chiya' sho'e senna' daa le circuncisión, le' na' xiin dia che'na'. Daan, dii Abrahama' wlo'e dii xiine' Isaaca' senna' ka gok xon' lla goljb', na' ka'kzə ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shlin, ben'ka' gok dii xozxto'cho, cho'ben' Israel.

9 'Na' ben'ka' nak xiin dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna',

10 na'ch bisle'ne' lao yog'lo' dii ben ble'ile'. Na' bi'ene' yel' sin' kwenche faraónna', beena' chnabia' Egíptona', ble'shiile'ne' na' bzoe'ne' kwenche wñabia'lene' le' na' bene' lo nee yog' dii de che'.

11 'Na' wzolo wche' wbinna', na' gokchga yel' zi' yel' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xoxxto'choka'.

12 Na' ka wñezi dii Jacoba' de trígona' Egíptona', na' bselee bi' che'ka', beñ'ka' gok dii xoxxto'cho, jxi'gake'n.

13 Na' ka wyajgake' de wchopi, dii Joséna' golle' legake' nan len' nake' beñ' bish'gake', na'ch bembia' faraónna' dialla che dii Joséna'.

14 Na'ch Joséna' biselee legake' kwenche jaxi'gake' xe', Jacoba', na' yog' xiin che'ka'. Na' yog'gake' nakgake' ka do guiyon shin'.

15 Kan' gok jsoa dii Jacoba' Egíptona' gana' wite', na' lekzka' na' wit xiine'ka', beñ'ka' gok dii xoxxto'cho.

16 Na' jakwash'gake' legake' loo bana' daa bizi' dii Abrahama' yell Siquema' che xiin beena' le Hamor.

17 'Na' ka ba zoa gao gon Chioza' daa bchebe' gone' che dii Abrahama', ba wyanchga xiin dia che dii Israela', beñ'ka' lle' Egíptona', beñ' zan wal ba nakgake'.

18 Na'ch bllin lla wzolo wñabia' sto beñ' yoblə yell Egíptona', beñ' bi bembie' dii Joséna'.

19 Na' beñ' wñabia'na' wxiyee beñ' wlall chechoka' na' biya dii bchi' bsakee dii xoxxto'choka', na' bene' byen lljchoongake' bdo'do' che'ka' kwenche guetgakb'.

20 Na' kana'yen' golj dii Moiséza', nakchgab' xochido', na' shon beo'chga bisgol xaxna'baab' lille'ka'.

21 Na' ka bich gok kwkash'gake'b' lille'ka', be-nan byen jchoongake'b' kwenche nan guetb'.

Na'ch noola' nak xiin faraónna' billelile'b' na' bi-keeb' na' bisgole'b' kā xiine'.

22 Ka' gok bsed dii Moiséza' yog'lol yel' sin' che beñ' Egíptoka' na' bi'e dill' zakii na' leyi bene' dii zakii.

23 'Na' ka goki dii Moiséza' choa yiz, na' gokile' lljawie' beñ' Israelka', beñ'ka' nak beñ' wlall che'.

24 Na' ka ble'ile' to beñ' Egipto chchi' chsakee to beñ' Israel, na' goklene' beñ' Israela', bizi'e wzon che beñ' Egíptona', bettie'ne'.

25 Na' goki dii Moiséza' beñ' wlall che'ka' gakbe'gakile' nan Chioza' wchine' le' kwenche yisle' legake' lo na' beñ' Egíptoka', per bi gokbe'gakile'.

26 Na' betiyo ble'ile' chop beñ' wlall che', beñ' Israel, chdilgake'. Na' gokile' yizoe' legake' wen, na' chi'e legake': “¿Berache chdil-lenzə ljwell-le?, aga ne' beñ' bishee til-lene'.”

27 Na'ch beena' chit chyine' beñ' wlall che'na' blligee dii Moiséza' na' chi'ene': “¿No bzoa li inabi'o neto' na' koo xnezi chento'ni?”

28 ¿Alezkka' cheenilo' wito' nad' ka beto' beñ' Egíptona' daa neji?”

29 Na' daa goll beeni ka', dii Moiséza' bxonje' na' jsoe' gana' mbani Madiánna'. Na' la'kzi nake' beñ' zit' ladj beñ'ka', na' bgaane' na'z na' wzoa chop xiine'.

30 'Ba gok choa yiz zoe' na', ka bli'lao to anjl le' to lo yag yesh' dii chal'nin, zoan gana' bibi chashj chleb gaoz Yaa Sinaína'.

31 Na' le bibani dii Moiséza' daa ble'ile' daa, na' wbiguee kwenche bwiayenee kwaslol. Na'ch benile' shii Xancho Chioza', chi'ene':

32 “Nadaan nak' Chios, beena' be'la'o dii xoxxto'ka', Abrahama', Isaaca' na' Jacoba'.” Na'ch dii Moiséza' le bblebe' axt chxiztite', na' aga biyaxjchile' wwie'.

33 Na'ch Xancho Chioza' golle' dii Moiséza': “Blechj xelo'na', la' nad' zoa' latji gani zio', na' aga ka nla'z no se ni.

34 Nad' ba ble'id' yel' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chidoloo yiselaa Egíptona'.”

35 ‘Na' Chioza' bseleene' kwenche yisle' ben' wllall che'ka' lo na' ben' Egíptoka', na' inabia'tie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': “¿No bzoa li' inabi'o neto' na' koo xnezi chento'ni?” La'kzi gollgake' ka', Chioza' bseleene' ka bli'lao anjla' le' lo yag yeshaa daa gol'nin.

36 Na' dii Moiséza' bene' zan yel' wak diika' ben ka bibani ben' Egíptoka' kana' bibeje' dii xoxxto'choka' lalle'ka'. Na' bene' yel' wak loo nido'na' le Nido' Xna, na' lekzka' latja' gana' bibi chashj chleb gana' wdagake' choa yiz.

37 Na' golle' dii xoxxto'choka': “Xancho Chioza' kweje' sto ben' ka nad' ladjleni, ben' chixje'ile' le' dillaa daa we'lene'ne'.”

38 Na' dii Moiséza' wzoalene' dii xoxxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yel' mban daa bikwaanlene' cho'.

39 ‘Na' dii xoxxto'choka' aga goongakile' wzenaggake' che dii Moiséza', bzoatezgake'ne' ka'lə na'

goklall'gake' yiyajgake' Egíptona'.

⁴⁰ Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'."

⁴¹ Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'.

⁴² Na'ch Chioza' wlej yichje' legake' na' bi'e latj be'la'ogake' beljka' llia xan yabana'. Bengake' ka na lee libra' daa bzej dii ben'ka' wdixjee daa goll Chioza' legake' kani'yi, gana' nan:

Le', ben' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

⁴³ Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele,

na' be'la'ole belj che chios chele Refánna', diika' benlilall'le.

Na' ni cheyi diikin kwej' le' lall-leni, na' wselaa le' zit' walch aga ka yell Babilóniana'.

⁴⁴ 'Na' shlak wzoa dii xozxto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'. ⁴⁵ Dii xozxto'choka' bigaanlengake' yoodo' de lechaa, na' bia'gake'n ka wyajlengake' dii Josuéna' jtil-lengake' yellka' ben Chioza' lall' na'gake', na' bgaañan lallchoni axt ka bllin lla wñabia' dii Davina'.

46 Na' Chioza', beena' be'la'o dii xozxto'cho Jacoba', bibaile' ka ben dii Davina'. Na' Davina' wɲabile'ne' wi'e latj gone' to lill xlatje'.

47 Per Salomónna'lə, beena' nak xiine', bene'n

48 la'kzi Chioza', beena' nak liizelozi beɲ' choo beɲ' xen, bi zoe' to loo yoo dii chon beɲ' yell-lioni. La' ka wna dii beena' wdixjee daa goll Chioza'ne' kani'yi:

49 Yabana' nakan gana' chi'a chɲabi'a, na' lo yell-liona' nzoa' ɲi'ani.

¿Nakran chakile gonle yoonə' gana' soa'?, na Xanchona'.

¿Achakile chyallj ga yizi'lallaa?

50 ¿Abi chwiale nadaan ben' yog'loɭ dii de?

51 'Na'ch Estébanna' chi'e beɲ'ka' lle' na':

—Le beɲ' yichjlall'do' wal nakle. Bi chzenagle che Chioza' na' chonle ka beɲ' bi nombia' Chioza'. Nakle beɲ' widenag ka gok dii xozxto'choka'. Bikzə chzenagle che Espíritu Sántona'.

52 Dii xozxto'choka' bchi' bsak'gake' yog' dii beɲ'ka' wdixjee daa goll Chioza' legake' kani'yi. Betgake' beɲ'ka' be' dill' nan Chioza' wselee beena' zeelo nak beɲ' li beɲ' shao'. Na' ka bide' na' bénlene' lo na' beɲ'ka' betgake'ne'.

53 La'kzi nombia'le ley daa be' anjlka' dii Moiséza', bi chzenagkzlen.

Betgake' Estébanna'

54 Ka beni beɲ'ka' daa goll Estébanna' legake', le bllaagake' ax̄t chaoyaax̄ax̄j leye'ka'.

55 Na' Estébanna', chɲabia'chga Espíritu Sántona' le', na' blis lawe'na' yabana' ble'ile' yel' chey cheeni' che Chioza', na' ble'teile' ze Jesúsza' kwit de shli che Chioza'.

56 Na'ch golle' legake':

—iLi wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' shlaa de shlina'.

57 Na' ben'ka' lle' na' bsej nague'ka' kwenche bi bengakile' xtilleena', na' de chosyaadiagake' bex'gake'ne'.

58 Na' wlelgake'ne' yell Jerusalénna' jalligake'ne' yaja'. Na' ben'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan.

59 Na' ka chlliagake'ne' yaja', be'lwille' Jesúza', chi'ene':

—Jesús, li' nako' Xan', bizi' bikaagach nad'.

60 Na' biyoll wne' ka', na' bchek' xibe'na' na' wnie' zillj, wne':

—Xan', wxi'xen che ben'ki dga chongakile' nad'. Na' biyoll wne' ka' wite'.

8

Sáulona' bchi' bsakee ben'ka' choe'la'o Jesúza'

1 Na' Sáulona' goke' toz ben'ka' betgake' Estébanna'.

Na' lo llana'tez wzolo bchi' bsak'gake' yog' ben'ka' nonlilall' Jesúza' Jerusalénna'. Na' wislesgake' doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'.

2 Na' to chop ben' nonlilall' Jesúza' jakwash'gake' dii Estébanna' na' le wchellgakile'ne'.

3 Na' Sáulona' bchi' bsakee ben'ka' nonlilall' Jesúza', chaje' lill che chegake' chjtoyoe' ka nool ka ben' byo kwenche chgwee legake' lillyana'.

Be'gake' dill' wen dill' kob che Crístona' gana' mbani Samáriana'

⁴ Na' beṇ'ka' bllesh Jerusalénna' be'gake' dill' wen dill' kob che Crístona' gattezə wyajgake'.

⁵ Na' beena' le Felipe, wyaje' to yell xen che Samáriana' na' be'lene' beṇ'ka' dill' che Crístona'.

⁶ Na' bdop bllag beṇ', na' yog'lolgake' bzenagyeṇ'gake' dill' daa be' Felípena', daa ble'gakile' yeḷ' wakka' chone'.

⁷ Na' beṇ' zan bichej dii xiwaa, na' ka bichej-gakan chosyaadiagakan. Na' lekzka' biyone' zan beṇ' net ni'a nee, na' beṇ' bi chak sa' wen.

⁸ Na' daa gok ka', le biba bizaki beṇ'ka' lle' yella'.

⁹ Na' lekzka' yella' wzoa to beṇ' willa' lie' Simón, na' kon yeḷ' willa'na' chone' chziyee beṇ' doxen gana' mbani Samáriana', na' ben kwine' beṇ' choo beṇ' xen.

¹⁰ Yog' beṇ' lle' na' chzenaggake' xtilleena', ka bi xkwid' ka beṇ' gol, na' nagake':

—Beenin nsi'gake' Yeḷ' Wak Choo Yeḷ' Wak Xen che Chios.

¹¹ Na' le wyajle'gake' che', la' zan yiz ba gok chziyee legake' kon yeḷ' willa'na' daa chone'.

¹² Na' ka bzajni Felípena' legake' dill' wen dill' kob che yeḷ' wṇabia' che Chioza' na' che Jesu-crístona', na' beṇ' zan wyajle'gake' xtilleena' na' wchoagake' nisa', ka noolə ka beṇ' byo.

¹³ Na' lente Simónna' wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yeḷ' wakka' daa chon Felípena'.

¹⁴ Na' ka wṇezi postlka' lle' Jerusalénna' ba chajle' beṇ' Samáriaka' cho'a xtill' Chioza', na' bsel'gake' Pédróna' len Juanna' Samáriana'.

15 Na' ka bllingake', be'lwillgake' Chioza' wñabgakile'ne' soa loo yichjall'do' beñ' Samáriaka' Espíritu Sántona'.

16 La' bin' soa' Espíritu Sántona' loo yichjall'do'eka'. Tochga ba wchoagake' nisa' daa chajle'gake' che Xancho Jesúza'.

17 Na'ch Pédróna' len Juanna' bxoá neeka' yichj beñ'ka', na' jsoa Espíritu Sántona' loo yichjall'do'eka'.

18 Na' ka gokbe'i Simónna' jsoa Espíritu Sántona' loo yichjall'do' beñ'ka' biyoll bxoá na' postlka' yichje'ka', na' bshabile' legake' mech,

19 chi'e:

—Li gon nad' yel' waki kwenche nottez beñ' ka wxoa' na'ki yichje'ka' soa Espíritu Sántona' loo yichjall'do'eka'.

20 Na'ch Pédróna' golle'ne':

—Kwiayi'lenshgo' xmecho'na', daa chakilo' wak si'léno'n daa choñ Chioza' ka'z.

21 Bikz ga gak gono' ka nak dga chonnto', la' bi nak yichjall'do'na' ka cheeni Chioza'.

22 Biyaj bileni dii mala' chono', na' be'lwill Chioza' shi yizi'xene' cheyi daa ba goklalloo gono'.

23 La' nakbia'cha bin nxe bin nzak' nak loo yichjall'do'na', na' lénna' ntakw nchejan li'.

24 Na'ch che' Simónna' legake':

—Li we'lwillgach Chioza' ni cha' kwenche bi gak daa ba wnale gak cha'.

25 Na' ka biyoll be' Pédróna' na' Juanna' cho'a xtil' Chioza', na' biza'gake' ziyajgake' Jerusalénna'. Na' ka zingogake' nez, be'gake' dill' wen dill' kob che Jesucristona' zan yellka' gana' mbani Samáriana'.

Felípena' na' ben' Etiopíana'

26 Na'ch to anjl che Xancho Chioza' wñie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zejan yell Gázalə, neza' daa chde latja' gana' bibi chashj chleb.

27 Na' wza' Felípena' zeje', na' tneza' billague' to ben' Etiopía wyaje' Jerusalénna' je'lawee Chioza'. Na' nake' to eunuco,* ben' zakii, na' nak lall' nee mech che noolə wñabia' che Etiopíana' beena' le Candace. 28 Na' ba zingwee nez ziyaje' lalle'nalə, na' ziyo'e loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi.

29 Na'ch Espíritu che Chioza' chi'e Felípena':

—Jabig' kwit karreta'.

30 Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

31 Na'ch ben' Etiopíana' chi'e:

—¿Nakra gon' shajniida'n?, la' bi zoa no wzajniid' nad'.

Na' golle' Felípena':

—Wyepgach na' wche' kwitii.

32 Na' Cho'a Xtill' Chioza' gana' chlabe' nan: Betgake'ne' ka chite' to xil'do'; na' ka to xil'do', ba bi chosyaa kat' chshibe'b, ka'kz le', ni shcho'a dill' bi wñie'.

33 Na' bsi'gake'ne' yel' zto', na' aga no goklen le' gone' yel' joschis che'.

Na' kono xiin dia che wzoa, la' bsol bñitgake' yel' mban che'na'.

* **8:27** Eunuco: zejin ben' wlelgake' xshitin wa ben' bibi nsee ka chaljtie'. Bwia glosáriona'.

34 Na'ch ben' Etiopíana' chi'e Felípena':
 —Ben goklen wna nad', ¿nora cheyin wna dii
 Isaíaza' ka'? ¿Ache kwinen' cho'e dill', anti che ben'
 yoblan?

35 Na'ch Felípena' wzoloe' bzajniile'ne' ka zeji
 gana' chlabe' na' bi'e dill' wen dill' kob che Jesúza'.

36 Na' ka bllingake' to ga llia nis, na' che' ben'
 Etiopíana' Felípena':

—Ni llia nis, ¿ade daa wsej wllonan choa' nisa'?

37 Na' che' Felípena'ne':

—Shi chajli'o do yichj do lalloo, wak wchoa' li'
 nisa'.

Na' che' ben' Etiopíana':

—Chajli'a Jesucristona' nake' Xiin Chioza'.

38 Na'ch bkweze' karreta' na' betjgake'; na'
 wyoogake' loo nisa' na' Felípena' bchoe'ne' nisa'.

39 Na' ka bichejgake' loo nisa', Espíritu che
 Xancho Chioza' bichi'e Felípena' gan yoblə, na'
 aga ble'chi ben' Etiopíana' le', per chiba chizakile'
 ziyaje'.

40 Na' Felípena' billine' yella' le Azoto, na' bidie'
 to to yell chyise' dill' wen dill' kob che Jesúza' axt
 billintie' Cesareana'.

9

Bisha' Chioza' yichjlall'do' Sáulona'

(Hch. 22:6-16; 26:12-18)

¹ Na' Sáulona' kon chde' chwall chshebe' ben'ka'
 nonlilall' Xancho Jesucristona'. Chiyiljlallee
 nak gone' kwenche wite' legake'. Daan wyaje'
 Jerusalénna' jawie' b̄oxoz choo b̄oxoz xenna'

² na' wnable'ne' wzeje' twej yish che to to
 gana' chdop chllag ben' wlall che'ka' choe'lwllgake'

Chioza' yell Damáscona', na' we'n lsens yiyilje' beŋ'ka' ba wyoo lo nez li nez shao' che Jesu-crístona' na' gox̄ee legake' kwenche yichi'e legake' pres Jerusalénna', ka noolə ka beŋ' byo.

³ Ka ni ngwee nez, na' ba zoa illine' yell Damáscona', tokonganzi wyečhj to beeni' xen wal le' dii za' yabalə.

⁴ Na' Sáulona' jchaze' lo yona' na' benile' to shii beŋ', chi'ene':

—Saulo, Saulo, ¿bičhe chčhi' chsak'zo' nad'?

⁵ Na'ch Sáulona' chi'e:

—¿Nora li', beŋ'?

Na'ch billii beenan', chi'e:

—Nadaan Jesúza', beena' chčhi' chsakoo. Na' daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b.

⁶ Na'ch Sáulona' ax̄t chxiztite' daa chllebe', na' golle'ne':

—X̄an', ¿beran cheenilo' gon'?

Na' X̄anchona' chi'ene':

—Biyas na' wyaj Damáscona', na' na' inagake' li' daa chiyał' gono'.

⁷ Na' beŋ'ka' zejlengake' Sáulona' txen legatega wzegake' bibangakile' na' bllebgake', daa bengakile' chak x̄ne, per ni to kono ble'gakile'.

⁸ Na'ch biyas Sáulona' lo yona'. Na' ka bixa' jalawe'na' aga ble'chile'. Na' beŋ'ka' zejlene' txen beŋ'gake' neena' kwenche bche'gake'ne' yell Damáscona'.

⁹ Na' shon̄ lla bi gok ile'ile', ni bi weej wdawe'.

¹⁰ Na' Damáscona' zoa to beŋ' chonlilallee Jesúza' na' lie' Ananías, na' ben X̄ancho Jesúza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

¹¹ Na' Xanchona' chi'ene':

—Wyaj, na' wyoo neza' daa le Shlichá, na' lill Júdaza' inabo' to ben' Tarso, ben' le Saulo. Ba choe'lwille' nad',

¹² na' ba ble'do'ile' li' choo gana' zoe' na' chxoá noona'ne' kwenche yile'ile'.

¹³ Ka beni Ananíaza' chi'ene' ka', na' golle'ne':

—Xan', ze xtil' beena' chsak'zi'e ben'ka' nonlilall' li' Jerusalénna'.

¹⁴ Na' naa ba blee ni noxee yish daa bzej bxozka' chnabia' daa cho'en lsens goxee yog'lointo', neto' choe'lwillnto' li', na' yichi'e neto' pres Jerusalénna'.

¹⁵ Na' Xancho Jesúsza' golle'ne':

—Wyaj, la' ba wlej' Sáulona' kwenche wi'e xtil-laana' lao ben'ka' bi nak ben' Israel, na' lao ben' wnabia' che'ka', na' lekzka' laole le' nakle ben' Israel.

¹⁶ Nad' wliidee ka chiyał' si' sakee ni cha'.

¹⁷ Na'ch Ananíaza' wyaje' gana' zoa Sáulona' na' wyo'e loo yoona', na' bxoa neena'ne'. Na' chi'ene':

—Saulo, ben' bish', Xancho Jesúsza', beena' wnie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjlall'do'na'.

¹⁸ Na' ka bxoa neena' Sáulona', lii bikwaste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'.

¹⁹ Na' ka wdawe', biyakshao'lallee, na' bigaanlene' ben'ka' nonlilall' Jesúsza' yell Damáscona' zan lla.

Be' Sáulona' xtil' Chioza' yell Damáscona'

²⁰ Na' lii wzolote Sáulona' cho'e xtil' Crístona' to to gana' chdop chllag ben' Israelka' choe'lwilgake' Chioza' yell Damáscona', na' chi'e ben'ka' Jesúza' nake' Xiin Chioza'.

²¹ Na' yog' ben'ka' bengakile' dill' daa choe' Sáulona' chibangakile', na' che' ljuwelle':

—¿Aaga beenin chde' chchi' chsakee ben'ka' nonlilall' Jesúza' Jerusalénna'? Na' ¿aaga ni cheyinnan' bide' ni kwenche yichi'e yog'lolgake' pres ljasane' legake' lao bxoza' chñabia'?

²² Na' btipch lall' Sáulona' kwenche zizikchli bi'e dill' nan Jesúzan' nake' beena' bcheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.

Bila Sáulona' lo na' ben' Israelka'

²³ Ka ba gok zan lla choe' Sáulona' xtil' Jesúza' yell Damáscona', na' ben' Israelka' lle' na' bshag ljuwllgake' nan witgake'ne'.

²⁴ Na' gokbe'i Sáulona' ba chinogake'ne'. Ka wal ka tella wdapgake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'.

²⁵ Na'ch ben'ka' nonlene' txen, wal-lə wloogake'ne' to loo llom na' biletjgake'ne' lee zeena' nechj yella' kwenche bile'.

Billin Sáulona' Jerusalénna'

²⁶ Ka billin Sáulona' Jerusalénna', gokile' lene' ben'ka' nonlilall' Jesúza', per yog'lole' bllebgake'ne', bi wyajle'gake' shi dii li ba chonlilallee Jesúza'.

²⁷ Na' Bernabéna' bchi'e Sáulona' gana' lle' postlka'. Na' golle' legake' nan Sáulona' ble'ile'

Ḫancho Jesúza' tneza' ka zeje' yell Damáscona', na' Jesúza' be'lene'ne' dill'. Na' lekzka' golle' legake' bi bblebe' bi'e xtil' Jesúza' yell Damáscona'.

28 Na' ka' gok bigaane' Jerusalenna' goke' txen ben'ka' nonlilall' Jesúza', na' wal inleeb goke' bi'e xtil' Ḫancho Jesúza'.

29 Na' be'lene' dill' ben' Israelka' chne dill' griegona' kwenche shajle'gake' che Jesúza', per legake' goklall'ligake' witgake'ne'.

30 Na' ka wnezi ben'ka' nonlilall' Jesúza' ba chinogake' Sáulona' kwenche witgake'ne', bche'gake'ne' Cesareana'lə. Na' ka bllingake' na', na' bisel'gake'ne' Társona'lə gana' nak lalle'.

31 Na'ch ben'ka' nonlilall' Jesúza' doxen Judeana', Galileana' na' Samáriana' wzoagake' mbalaz, la' koch no bchi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwenche gokchachgake' lo xnez Chioza' na' kwenche wyanchgake'.

Biyaki beena' le Eneas

32 Do kana', chda Pédrona' chjawie' ben'ka' nonlilall' Jesúza' to to yell, na' lekzka' jawie' ben'ka' lle' yell Lídana'.

33 Na' yell Lídana' jti'e to ben' le' Eneas. Ba gok xon' yiz die' bi chak chase' daa net ni'a neena'.

34 Na' Pédrona' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'.

35 Na' yog' ben'ka' lle' yell Lídana' na' yell Sarónna', ble'gakile' biyaki beena' na' benlilall'gake' Ḫancho Jesúza'.

Biban Dorcaza' ladj beṅ' wetka'

³⁶ Na' lekzka' yell Jópena' wzoa to noolə beṅlilallee Jesúza', na' wlie' Tabita,* na' dill' griegona' che'gake'ne' Dorcas. Na' nooli, shlak wbane' toshiizi bzani ṅi'a neena' goklene' beṅ', na' biyesh'lallile' beṅ'ka' bibi de cheyin.

³⁷ Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' lliia shkwiana' cha'lə.

³⁸ Na' Jópena' llian gaozə yell Lídana', na' beṅ'ka' wnezgakile' zoa Pédrona' yell Lídana', na'ch bsel'gake' chop beṅ' jellgake'ne':

—Sho'gach Jópena' ṅaate.

³⁹ Na'ch Pédrona' wzee zejlene' beṅ'ka' Jópena'. Na' ka blline', na' jwa'gake'ne' loo yoonā' gana' de beṅ' weta', na' yog' nool wizebka' wyechjgake' Pédrona' chbellgake', na' bli'gakile'ne' xe'ka' daa ben dii Dorcaza' shlak wbane'.

⁴⁰ Na' Pédrona' bibeje' yog'lolé' chyoolə, na' bchek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii biṅa'te jalao Dorcaza' chwie' Pédrona'. Na'ch biyase' bibi'e.

⁴¹ Na' Pédrona' beṅee neena' na' bisolléene'. Na'ch binie' nool wizebka' na' nochlə beṅ'ka' nonlilall' Jesúza' kwenche bizoe'ne' shi'a shbane' lawe'ka'.

⁴² Na' wze dill' doxen yell Jópena' ka gok che Dorcaza', na' beṅ' zan beṅlilall'gake' Xancho Jesúza'.

⁴³ Na' Pédrona' bigaane' Jópena' zan lla lill Simónna, beena' chkoll yidxa bayix'ka'.

* **9:36** Tabita: dillii nakan dill' arameo.

10

Pédrona' na' Cornéliona'

¹ Na' yell Cesareana' wzoa to beṅ' wlie' Cornelio, na' nak lall' nee zan soldadka', na' beṅ'ka' nak lall' nee wlegake' Beṅ' Italia.

² Na' Cornéliona' len beṅ'ka' nakgake' toz loo yoo lille'na' choe'la'ogake' Chioza' na' chall chllebgake'ne'. Na' zoatezi zoe' choe'lwille' Chioza' na' cho'e mech xen kwenche chaklene' beṅ' Israelka', beṅ'ka' chyallj chchinin.

³ To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴ Na' Cornéliona' chwiayenee anjla' do chllebbe', na' golle'ne':

—¿Beran cheenilo' beṅ'do'?

Na' anjla' chi'ene':

—Chioza' chibaile' daa zoatezi zo' choe'lwillo'ne' na' daa chakleno' beṅ' yesh'ka'.

⁵ Na' naa bsel' beṅ' shajgake' yell Jópena' kwenche lljxi'gake' beena' le Simón Pedro.

⁶ Zoe' lill to beṅ' le Simón, beena' chkoll yid, na' lille'na' zoan gaoz cho'a nisdona'. Na' Simón Pédróna' ine' li' daa chiyal' gono'.

⁷ Na' ka biza' anjla' bshaljlen Cornéliona', na'ch Cornéliona' goxe' chop xmose'na', na' sto soldad, beena' nonlilallee Chioza' na' zoe' chaklene'ne' chgwee xnezi bittez.

⁸ Na' golle' legake' yog' daa goll anjla', na'ch bselee legake' Jópena'.

⁹ Na' betiyo do ka gobill ba zoa illin beṅ'ka' bsel' Cornéliona' yell Jópena'. Na' ka lo gora', Pédróna'

wyepē' koll' yoona' gana' zoe' kwēnche we'lwille' Chioza'.

¹⁰ Na' wdōne', na' goklallee gawe' shel'ka'. Na' shlak chongake' daa gawe', ble'do'ile'

¹¹ byalj yabana', na' to dii nak ka to lech' xen dii nchej tap yichjten chetjan lo yona'.

¹² Na' loo lechaa lle' biya bayix', no ba llia tap ni'a na'in, na' no ba chxobi leeb lo yona' na' no ba zoa xilin.

¹³ Na'ch benile' shii to ben', chi'ene':

—Wzolla' Pedro. Bet baka', na' wdāo.

¹⁴ Na'ch Pédrōna' gollē'ne':

—Bi gaw' baka', Xan'; ni shlin bin' gaw' baki bi nak ba xilall'.

¹⁵ Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

¹⁶ Shoṅ shii gollē' ka', na'ch biyep lechaa yabana'.

¹⁷ Na' chibani Pédrōna' chakile' bera zejīn daa ble'do'ile', ka bllin ben'ka' bsel' Cornéliona' cho'a yoona' gana' zoe', daa ba wṅabgake' gan zoa lill beena' le' Simón, beena' chkoll' yid xa bayix'ka'.

¹⁸ Na' ka bllingake', na' wṅegake' zillj wṅabgake' shi nan' zoa to ben' le Simón Pedro.

¹⁹ Na' Pédrōna' zie' wṅeyi cheyi daa ble'do'ile', kat' wne Espīritu Sántōna', chi'ene':

—Bwiakachi, na' lle' shoṅ ben' chiyiljgake' li'.

²⁰ Bizolla' na' biyetj, na' wyajlengake'. Bi gakchopilo', la' nadaan bselaa legake'.

²¹ Na'ch biyetj Pédrōna' gana' lle' ben'ka' bsel' Cornéliona'. Na' chi'e legake':

—Nadaan beena' chiyiljle. ¿Beran chak chele zidwiale nad'?

22 Na'ch che' beṅ'ka' Pédróna':

—To beṅ' wṇabia' che soldadka' lie' Cornelio bselee neto'. Nake' to beṅ' zej shli lao Chioza' na' ngooshosh yichje'ne', na' yog' beṅ' Israelka' nezgakile' zoe' chone' wen. Na' to anjl che Chioza' golle'ne' inie' li' kwenche shajo' lille'na' wzajni-ilo'ne' na' wzenague' dill'ka' we'leno'ne'.

23 Na'ch Pédróna' wlo'e legake' loo yoolə gana' zoe', na' bigaangake' shyel. Na' betiyo wyajlen Pédróna' legake' na' len to chop beṅ' Jope, beṅ' nonlilall' Jesúsza'.

24 Na' llana' sto bllingake' Cesareana'. Na' Cornéliona' ba btope' yog'lol' dialla che'na' na' beṅ'ka' nllaguile', na' ba lle'gake' lille'na' chbez-gake' illin Pédróna'.

25 Na' ka bllin Pédróna' lill Cornéliona', lii bchejte Cornéliona' bchek' xibe'na' lawe'na' choe'laweene'.

26 Na' Pédróna' bisolléene', chi'ene':

—Bizolla', bi wchekz' xibo' lawii, la' lekzka' beṅ'zə nad'.

27 Na'ch shlak chshaljgake' wyoogake' loo yoonā', na' ble'i Pédróna' beṅ' zan ba lle'.

28 Na'ch golle' legake':

—Le' nezile ka na ley chento'na', neto' beṅ' Israel bi chiyał' gonnto' txen le' bi nakle beṅ' Israel, na' ni bi chiyał' sho'nto' loo yoo lill-le. Per Chioza' ba bzajniile' nad' bi chiyał' gakid' zban nottez beṅ'.

29 Daan ka bla' beṅ'ki chnegake' nad', lii za'tia' bi bchia' dill'. Na' naa cheenid' inezid' biche bseloo beṅ'ki bidxi'gake' nad'.

30 Na'ch Cornéliona' chi'ene':

—Ba gok tap lla, do ka naayen', chida shon, choe'lwill' Chioza' loo lillii kat' ble'id' to ben' byo zie' lawa' nakwe' to lech' dii chey cheeni'.

³¹ Na' wne' nad': “Cornelio, Chioza' ba bzenague' daa choe'lwillo'ne', na' lekzka' chle'ile' ka chakleno' ben' yesh'ka'.

³² Na' bsel' ben' shajgake' yell Jópena' lljxi'gake' Simón Pédrone' kwenche yide' we'lene' li' dill'. Zoe' lill to ben' le Simón, ben' chkoll yid, na' lill beeni zoan gaoz cho'a nido'na'.”

³³ Daan lii bentia' wneyi bidxi'gake' li', na' choxkeno' ba bido'. Na' nezki Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédrone' dill' lill Cornéliona'

³⁴ Na'ch wzolo Pédrone' bi'e dill', chi'e:

—Chakbe'id' naa, dii li Chioza' aga nakzi ben' chakile',

³⁵ san chle'shiile' yog' ben' lle' gattez yell kon shi chall chlebgake'ne' na' chongake' daa nak shli.

³⁶ Chioza' bselee ben' wdixje'ile' neto' ben' Israel dill' wen dill' kob che'na' nan wak yizoalenchone' mbalaz daa bselee Jesucrístone', beena' nak Xan yog'lolcho.

³⁷ Nezkzile kwaslol diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' ben' nan chonan byen yiyaj yilengakile' na' choagake' nis.

³⁸ Nezile Chioza' bi'e Jesús, ben' Nazareta', yel' wak na' Espíritu Sántone', na' wda Jesúsza' bene' dii wenka' na' biyone' yog' ben'ka' ntakw nchej dii xiwaa, daa wzoalen Chioza' le'.

39 Neto' choe'nto' dill' che yog'te diika' ben Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'.

40 Per Chioza' bisbane'ne' ladj beṇ' wetka' biyoṇ llana', na' bidli'lawe' neto'.

41 Aga yog' beṇ' bli'lao Jesúza' ka bibane' ladj beṇ' wetka', san bli'lawe' toz neto', neto' naknto' beṇ' ba wlej Chioza' kwenche we'nto' xtilleena'. Na' neto' weej wdaolennto'ne' ka wde bibane' ladj beṇ' wetka'.

42 Na' Jesúza' bselee neto' chixje'into' beṇ' nan Chioza' nzoe'ne' kwenche gone' yel' joschis che yog'lol beṇ', ka beṇ' mban na' ka beṇ' ba wit.

43 Na' lekzka' kani'yi yog' dii beṇ'ka' wdixjee daa goll Chioza' legake' be'gake' xtill' Jesúza', wna-gake' Chioza' yizi'xene' saaxya che nottezə beṇ' gonlilallee Jesúza'.

Wyoo Espíritu Sántona' loo yichjlall'do' beṇ'ka' bi nak beṇ' Israel

44 Na' ni chshaljte Pédrona', kat' Espíritu Sántona' wyo'e loo yichjlall'do' yog' beṇ'ka' chzenaggake' xtilleena'.

45 Na' beṇ' Israelka' nonlilall' Jesúza', beṇ'ka' bllinlen Pédrona' lill Cornéliona', bibangakile' daa wyoo Espíritu Sántona' loo yichjlall'do' beṇ'ka' bi nak beṇ' Israel.

46 Na' bengakile' chne beṇ'ka' wde wdeli dill' dii bi nombia'gake', choe'la'ogake' Chioza'.

47 Na' Pédrona' golle' beṇ' Israelka' lle' na':

—Aga no gak wllon wchoa beṇ'ki nisa', la' ba yoo Espíritu Sántona' loo yichjlall'do'eka' ka ba yo'e cho'.

48 Na' ben Pédrona' mandad wchoagake' nisa' daa chonlilall'gake' Xancho Jesucristona'. Na' biy-olla' wñabgakile' Pédrona' kwenche bigaanlene' legake' chop shon lla.

11

Pédrona' golle' beñ' Jerusalénka' ka gok

1 Na' postlka' na' nochlə beñ'ka' nonlilall' Jesúsza' Judeana' bengakile' nan beñ'ka' bi nak ben' Israel lekzka' chajle'gake' cho'a xtil' Chioza'.

2 Na' ka billin Pédrona' Jerusalénna' gokdil-len xonj beñ' le', beñ'ka' che' chonan byen sho' beñ' byoka' nonlilall' Chioza' señ daa le circuncisión la'kzi bi nakgake' beñ' Israel.

3 Na' gollgake'ne':

—¿Biñe wyoozo' loo yoo lill beñ'ka' bi nak ben' Israel na' weej wdaolenzgako'ne'?

4 Na'ch Pédrona' golle' legake' yog' ka gok, chi'e:

5 —Kana' ni zoa yell Jópena', shlak choe'lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'.

6 Na' ka bwiayenaa diika' llia loo lechaa, na' ble'id' lle' bayix' ba zoa tap ni'a na'b, na' no ba zña, no ba chxobi le'in lo yona', na' ba zoa xilin.

7 Na' benid' shii to beñ' ne' nad': “Wzolla' Pedro, bet baka' na' wdao.”

8 Na' goshee: “Bi, Xan', ni tshii bin' gaw' baki bi nak ba xilall'.”

9 Na' sto shii benid' shii beena' ne' nad': “Daa ba wna Chioza' wak gawo' bich inazo' bi nakan xilall'.”

10 Gokte shon shii wne ka', na'tech biyep lech' xenna' yabana'.

11 Na' shintg ble'do'id' diika' kat' bidse shonə ben' cho'a yoona' gana' zoa', zaake' yell Cesareana' ziddiljgake' nad'.

12 Na' Espíritu che Chioza' wne' nad' bi gonchoplallaa sha'len' legake'. Na' lenkz ben' bish'choki xop wza'lengake' nad', na' yog'tento' wyoonto' lill Cornéliona'.

13 Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': "Bsel' to chop ben' yell Jópena' kwenche lljxi'gake' beena' le Simón Pedro.

14 Na' le' ine' li' nakan gono' kwenche yilaleno' ben'ka' lle' loo yoo lillo'na' bi kwiayi'le."

15 Na' ka wzoloa' choe'lengakee dill', betj Espíritu Sántona' wyo'e loo yichjlall'do'eka', ka bidsoe' loo yichjlall'do'choki.

16 Na'ch jadinid' daa wna Xancho Jesúza' kana' wne': "Dii li Juanna' bchoe' ben' nis, san le', dii zak'chi gak chele, daa yidsoa Espíritu Sántona' loo yichjlall'do'lena'."

17 La' Chioza' bene' ka zoa Espíritu Sántona' loo yichjlall'do'eka' ka zoe' loo yichjlall'do'choki, cho' chonlilall'cho Xancho Jesucrístona'. Na' ¿nora nak' nad' wllon' gon Chioza' daa cheenile' gone'?

18 Na'ch ka biyoll bzenag ben' Jerusalénka' nonlilall' Jesúza' dillaa be' Pédrona', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len ben'ka' bi nak ben' Israel ba be' Chioza' latj yiyaj yilengakile' dii malka' chongake' kwenche gat' yel' mban chegake' zejli kaní.

Ben'ka' nonlilall' Jesúza' Antioquíana'

19 Na' ben' Israelka' nonlilall' Jesúza', ben'ka' bsheshlesgake' ka wde wit dii Estébanna', bale' wyaj zit' ax̄t Feníciana', na' zi bale' bllin Chíprena' na' zibale' bllin yell Antioquíana'. Na' gana' bllin to toe' be'lengake' to ben' wlall che'ka'z x̄till' Jesúza'.

20 Per bal' ben'ka' nak ben' Chipre na' ben' Cirene, ka bllingake' yell Antioquíana', wzologake' be'lengake' ben' bi nak ben' Israel dill' wen dill' kob che X̄ancho Jesúza'.

21 Na' yel' wak che X̄anchona' wzoalenan legake', na' ben' zan wlej yichjgake' diika' n̄xenilall'gake' na' benlilall'gake' X̄ancho Jesúza'.

22 Na' ben'ka' nonlilall' Jesúza' Jerusalénna', ka w̄nezgakile' ba nonlilall' ben' Antioquíaka' Jesúza', na' bsel'gake' Bernabéna' jawie' legake'.

23 Na' ka blline' Antioquíana', ble'ile' ba goklenchga Chioza' legake' na' le bibaile'. Na' btipche' lall' ben'ka' kwenche soachechgake' gonlilall'gake' X̄ancho Jesúza' do yichj do lall'gake'.

24 Na' ben' zanch benlilall'gake' X̄ancho Jesúza', la' Bernabéna' nake' to ben' wen, na' ch̄nabia' Espiritu Sántona' le', na' le benlilallee Chioza'.

25 Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' b̄chi'ene' Antioquíana'.

26 Na' wzoalengake' ben'ka' nonlilall' Jesúza' Antioquíana' twiz, na' bli' b̄sedgakile' ben' zan. Na' Antioquíana' dii nechdo' b̄si'gake' ben'ka' nonlilall' Jesucristona' "Cristianos".

27 Na' do kana'kzə, bal' ben'ka' chyixjee daa che' Chioza' legake' wza'gake' Jerusalénna' bllingake'

Antioquíana'.

²⁸ Na' wzolla' toe', beena' le Ágabo, na' bi'e dill' ka ba bzajnií Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chñabia' beena' le Claudio gana' mbani Rómana'.

²⁹ Na' beñ' Antioquíaka' nonlilall' Jesúza' be'gake' dill' we'gake' kon ka'k' wej gak we' to toe' kwenche gaklengake' beñ'ka' nonlilall' Jesúza' gana' mbani Judeana', gana' chi' wbinna'.

³⁰ Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao beñ'ka' ngoo lall' na' beñ'ka' nonlilall' Jesúza' Judeana'.

12

Betgake' Jacóbona' na' wloogake' Pédrona' lillyana'

¹ Na' do kana'kzə beñ' wñabia' Heródeza' bexee bal beñ'ka' nonlilall' Jesúza' kwenche wchi' wsakee legake'.

² Na' bçhogloe' gueti Jacóbona' yesya, beena' nak beñ' bish' Juanna'.

³ Na' ka gokbe'ile' bibayi beñ'ka' chñabia' beñ' Israelka' daa bene' ka', na'ch lekzka' bexee Pédrona' lo lñi Paskwa' kana' chaogake' yetxtila' daa bi nchix leবাদúrana'.

⁴ Na' ka bdoile'ne', wdixje'ne' lillyana' gana' wdap shin'to soldadka' le', na' bene' tap weje' kwenche bibeji ljwellgake' wdapgake'ne'. Na' gok-ile' yiyoll lñi Paskwa' kweje'ne' lao beñ' yellka' na' wçhogloe' che' guete'.

⁵ Shlak nej Pédróna' lillyana', ben'ka' nonlilall' Jesúza' toshiizi be'lwillgake' Chioza' ni che'.

Chioza' bibeje' Pédróna' lillyana'

⁶ Na' lle'na' ka w̄x̄ezə kwej Heródeza'ne' kwenche w̄chogloe' che' guete', Pédróna' die' chese' ladj chop soldadka', na' n̄chejgake'ne' chop gden, na' zi chop soldadka' chapgake' cho'a lillyana'.

⁷ Na' tokonganzi bllin to anjl che Xancho Chioza' gana' de Pédróna' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'.

⁸ Na'ch che' anjla'ne':

—Bikaacha li'ona' na' bilej xelo'na'.

Na' ben Pédróna' daa chi'ene', na'ch che' anjla'ne':

—Bixoa kolloo xachelo'na', na' da dino' nad'.

⁹ Na'ch zjano Pédróna' anjla', ni bi nezile' shi ka chakkzan, kon gokile' chle'do'zilen'.

¹⁰ Na' bidegake' gana' lle' soldadka' shkwen, na' bidetegake' gana' lle' ben'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgake'. Na' ka ba biyoogake' neza', bikwaan anjla' toz Pédróna'.

¹¹ Kana'ch gokbe'i Pédróna', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non ben' Israelki lez gag cha'.

¹² Na' ka gokbe'ile' ba bicheje' lillyana', na' ziyaje' lill Maríana' x̄na' Juanna', beena' nsi'gake'

Marcos. Na' lill Maríana' ndop nllag beṅ' zan choe'lwillgake' Chioza'.

¹³ Ka blline', na' wṅie' cho'a leeja', na' bchej to bi' noolə le Rode, jawiab' no beena' chṅe.

¹⁴ Na' ka biyombia'b' shii Pédrona' chibachgaib', na' daa le chibaib' bikz bsaljb'. Zigaate jayellb' beṅ'ka' lle' loo yoonā' ba ze Pédrona' cho'a leeja'.

¹⁵ Na'ch che'gake'b':

—Chakzilo'n.

Na' leb' wzeyidb' che'b' len'. Na' legake' che'gake'b':

—Anjl che'na'ljan.

¹⁶ Na' Pédrona' ni zie' chṅie' cho'a leeja'. Na' ka bsaljgake' ble'gakile'ne', bibanchgagakile'.

¹⁷ Na'ch Pédrona' bene' to sen kon neena' kwenche soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' beṅ' bish'choka' ka ba ben Xanchona' cha'.

Na'ch bizee ziyaje' gan yoblə.

¹⁸ Na' ka wyeeni', wche' to yel' wban xen ladj soldadka' daa bi gokbe'gakile' nak gok bichej Pédrona'.

¹⁹ Na'ch Heródeza' bta bṅie' beṅ'ka' biyilgake'ne', na' bi billelgakile'ne'. Na'ch wṅabile' soldadka' chap lillyana' nak gok bicheje', na' bikz bi dill' be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsœ' Cesareana'.

Ka wit Heródeza'

²⁰ Heródeza' chlee ben' Tíroka' na' ben' Sidónka'. Na' beṅ'ki gokgake' toz bshaljlengake' Blástonā', to

wen llin zakii che Heródeza', na' bengakile'ne' wen kwenche goklene' legake', la' byalljgakile' si'gake' dii yeej gaogake' gana' chñabia' Heródeza'. Na' Blástona' bshaljlene' Heródeza' kwenche wxi'xene' che ben' Tíroka' na' ben' Sidónka' na' yizoalene' legake' wen sto shii.

²¹ Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' ben'. Na'ch jshie' gana' chchogloe' che ben', na' bi'e dill' lao ben'ka' ndop nllag na'.

²² Na' shlak cho'e dill', na' besyaa ben'ka' che'gake':

—To chioza'n chne, aga kontele beñaan.

²³ Na' anjl che Xancho Chioza' lii be'tie' Heródeza' to yillwe' wal benan ka chyin chlall' bel'bzog'ka' loo li'ena' na' wite', daa bi'e latj wloo ben'ka' le' balaan daa chidol' toz beena' nak dowalj Chios.

²⁴ Na' dill' wen che Chioza' zej chlliljchan doxen.

²⁵ Na' Bernabéna' len Sáulona' ka wde bengake' daa chiya! gongake' Jerusalénna', biza'gake' biya-jgake' Antioquíana', na' bche'gake' Juanna', beena' lekzka' nsi'gake' Marcos.

13

Bernabéna' na' Sáulona' je'gake' cho'a xtill' Chioza' yell zit'ka'

¹ Na' ladj ben'ka' nonlilall' Jesúza' yell Antioquíana' lengake' ben' chyixjee daa che' Chioza' na' ben' chli' chsedi cho'a xtill' Chioza'. Na' legake' ben'ki: Bernabéna', Simónna', beena' che'gake' ben' gasj, Lúciona' ben' Cirénena', Sáulona'

na' Manaénna', beena' bgol-len Heródeza' beena' wñabia' gana' mbani Galileana'.

² Na' to shii ka zoagake' wbasaa na' choe'la'ogake' Chioza' wñe Espíritu Sántona' legake', chi'e:

—Li wzoa Bernabéna' na' Sáulona' kwenche gongake' xshin'na', la' ni cheyinnan' ba wlej' legake'.

³ Na' ka wyeelo be'lwillgake' Chioza' na' biyoll wzoagake' wbasaa, na' bxoá neeka' yichj beñ'ka' chop, na'ch bsel'gake' legake' gana' lljengake' xshin Chioza'.

Páblona' na' Bernabéna' be'gake' cho'a xtil' Chioza' gana' le Chipre

⁴ Na'ch Espíritu Sántona' bselee Bernabéna' na' Sáulona' yell Seleúciana' gana' wyoogake' barkwa' kwenche jwaan legake' yell-lio Chíprena' daa lia lo nido'na'.

⁵ Na' ka wlez barkwa' cho'a yell Salamínana', bchejgake' na' wzologake' wdixje'gake' cho'a xtil' Chioza' to to gana' chdop chllag beñ' Israelka' choe'lwillgake' Chioza'. Na' nche'gake' sto beñ' le Juan kwenche gaklene' legake'.

⁶ Na' wdegake' to to yellka' lia Chíprena'. Na' ka bllingake' yell Páfoza', na' jadi'gake' to beñ' Israel, beena' le Barjesús. Nake' to beñ' willa', na' chziyee beñ' chi'e nake' to beñ' chyixjee daa che' Chioza' le'.

⁷ Na' beeni nllaguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to beñ' chajni, na' goxe' Bernabéna' len Sáulona' kwenche wzajni'gakile'ne' cho'a xtil' Chioza'.

8 Na' ben' willa'na', nsi'gake'ne' Elimas (na' ze-jin ben' willa'), goklallee gone' ka bi shajle' ben' wñabia'na' che cho'a xtill' Chioza'.

9 Na'ch Sáulona', beena' lekzka' lie' Pablo, daa chñabia'chga Espíritu Sátona' le', bwiayenee Elímaza',

10 na' golle'ne':

—iLi' ben' wxiye', ben' wen dii mal, xiin dii xiwaan nako' na' chakzbanilo' yog' daa nak dii wen! ¿Biche chshok chlewzo' daa nak dii li che Xancho Chioza'?

11 Na' naa Chioza' wselee yel' zi' cho', gone' ka icholo' na' shloll wen bich ile'ilo' beeni' che wbillá'.

Na' kate golle'ne' ka' lii wchołtie', na' chgan chto-bzile' chñabe' no yiyox' neena' daa bich chle'ile'.

12 Na' ka ble'i ben' wñabia'na' daa gok, na' wyajli'e, na' le bibanile' ka nak cho'a xtill' Xancho Jesúza' daa chli' chsedgakile'ne'.

Páblona' na' Bernabéna' wyajgake' yell Antioquiana' daa llia gana' mbani Pisídiana'

13 Na'ch Páblona' na' ben'ka' chdalene' wyoogake' barkwa' yell Páfoza' na' wyajgake' yell Pérgena' daa llia gana' mbani Panfílana', na' Juan Márcona' bixonje' ziyaje' Jerusalénna'.

14 Na' Páblona' len ben'ka' chdalene' na', biza'gake' yell Pérgena' na' wyajgake' yell Antioquiana' daa llia gana' mbani Pisídiana'. Na' ka bllin lla sabda', llana' chombaañ ben' Israelka', wyajgake' gana' chdop chllaggake' choe'lwillgake' Chioza', na' jche'lengake' ben'ka'.

15 Na' ka biyoll blabgake' lat' ley che Chioza' na' zi lat' daa bzej dii ben'ka' wdixjee daa goll Chioza'

legake', na'ch ben'ka' chgoo xnezi cheyi diika' chongake' gana' chdop chllaggake' bsel'gake' to ben' gana' chi' Páblona' len Bernabéna' na' golle' legake':

—Le' ben' bish', shi bi dill' de we'lenle ben'ki kwenche wtipch lall'gake', wak we'len naa.

¹⁶ Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', ben' Israel, na' le' bi nakle ben' Israel choe'la'ole Chioza', li wzenag dga inia':

¹⁷ Chios, beena' nonlilall'cho cho' ben' Israel, wleje' dii xoxto'choka' na' bene' ka wyangake' shlak wzoagake' Egíptona'. Na' bllin lla bibeje' legake' kon yel' wak che'na'.

¹⁸ Na' wdape' yel' chxenlall' che yel' widenag che'ka' lo choa yiza' wzoagake' latja' gana' bibi chashj chleb.

¹⁹ Na' bliiayee yellka' gall kwen lle' gana' mbani Canaánna' kwenche bi'e dii xoxto'choka' yell-lío che'ka'.

²⁰ Kan' gok lawi tap guiyoa yoo gashj yiz. Na'tech, bzoa' Chioza' ben'ka' wloo lall' na'gake' legake', axt nika bllin lla wzoa dii Samuela', beena' wdixjee daa goll Chioza'ne'.

²¹ Na'ch wñabgake' soa to ben' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'.

²² Na' ka bikwas Chioza' yel' wñabia' che dii Saúla', bizoe' dii Davina' inabi'e na' bi'e dill' che', wne': “Davina', xiin Isaína', nake' to ben' chon ka chazlallaa, na' nezid' gone' yog' daa cheenid' gone'.”

23 Na' lo dia che dii Davina' golj Jesucristona', beena' wlej Chioza' kwenche yisle' cho' ben' Israel lawi dii mala' kon ka' bchebe' gone'.

24 Na' ka zi' solo Jesúza' wli' wsedile' ben', dii Juanna' golle' yog' ben' Israelka' chiya' yiyaj yilengakile' xtoleeka' na' choagake' nisa'.

25 Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': "Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa gak' xmose' kwenche wleçhj' xele'na'."

26 'Le' ben' bish', le' nakle xiin dia che dii Abrahamama', na' le' choe'la'ole Chioza' la'kzi bi nakle ben' Israel, Chioza' ba bselee cho'a xtilleena' laochoni daa cho'en dill' yisle' ben' kwenche bi kwiayi'gake'.

27 Ben' Jerusalénka' na' ben' wñabia' che'ka' bi gokbe'gakile' bsel' Chioza' Jesúza'. Ni bi wyañni'gakile' diika' bzej dii ben'ka' wdixjee daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'lwillgake'ne'. Na' daa wnagake' chiya' guet Jesúza', billinin daa bzej dii ben'ka' be' dill' daa goll Chioza' legake'.

28 La'kzi bibi dii mal billelgakile' ben Jesúza' dii gonan ka wçhoglogake' witgake'ne', wñabgakile' Pilátona' gone' mandad witgake'ne'.

29 Na'ch ka biyoll bengakile'ne' yog' daa nyoj lee cho'a xtill' Chioza' gak che', na'ch biletjgake'ne' lee yag cruza' na' jakwash'gake'ne'.

30 Na' Chioza' bilise'ne' ladj ben' wetka'.

31 Na' ka wde bibane', zan lla bli'lawe' ben'ka' wno wnal'gake'ne' dezd ka wzee Galileana' zeje' Jerusalénna'. Na' legaken' choe'lengakee ben' wlall

chechoka' xtilleena' naa.

³² 'Na' chyixje'into' le' dill' wen dill' kob che Jesúza' daa bcheb Chioza' lao dii xoxxto'choka'.

³³ Na' naa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúza' ladj ben' wetka'. Gok ka nyoj Salmo de wchopina', gana' nan: "Lin' nako' Xiin', na' naa, daa solo inabi'o na' inezi ben' nadaan nak' Xo'."

³⁴ Chioza' ba bi'e dill' yilise'ne' ladj ben' wetka' na' bichga guete', na' wne': "Dii li gaklen' le' dii xen wal ka bcheb' lao dii Davina'."

³⁵ Na' lekzka' sto Salmo nan: "Bi wi'o latj gooll' iteb beli chen cha'ni, daa nak' lall' no'."

³⁶ Na' nezicho dii Davina' goklene' dii xoxxto'choka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xoxxtoe'ka', na' gooll' bteb beli chen che'na'.

³⁷ Per kwerp che Jesúza', beena' bisban Chioza' ladj ben' wetka', bi wlliayi'n.

³⁸ Le' ben' bish', chyixje'into' le' Chioza' chizi'xene' xtol' nottez ben' chonlilallee Jesúza'.

³⁹ Nottez ben' gonlilalleene' yiyake' ben' li ben' shao' lao Chioza'. Aga no yiyak ben' li ben' shao' lao Chioza' daa chone' daa na ley che dii Moiséza'.

⁴⁰ Na' li wsak' kwenche ki gak chele ka bzej dii ben'ka' be' dill' daa goll Chioza' legake' kani'yi, gana' nan:

⁴¹ Li wwia, le' ben' wenle. Li yibani.

Wllin lla kwiayi'le daa bi chajle'le.

Llaki mbanle gon' to dii wal

dii bi shajle'le la'kzi shi no ina le' ki gak.

⁴² Na' ka bichejlen Páblona' ben'ka' nakgake'ne' txen gana' chdop chllag ben' Israelka', na'ch

ben'ka' bi nak ben' Israel w_nabgakile'ne' we'lene' legake' cho'a xtill' Chioza' lla sabda' sto.

⁴³ Na' ka billeshgake', zan ben' Israelka', na' zan ben'ka' chongake' legake' txen choe'la'ogake' Chioza', janogake' Páblona' len Bernabéna'. Na' Páblona' len Bernabéna' gollgake' legake' chiyal' soachehgake' gonlilall'gake' Chioza' daa le chakile' legake'.

⁴⁴ Na' ka bizoa xmanna' sto, llana' chomba_n ben' Israelka', zi lat'z ki biya ben'ka' lle' yella' bdo_p kwenche wzenaggake' cho'a xtill' Chioza'.

⁴⁵ Na' ka ble'i ben' Israelka' ben' zan ndop nllag, na' gokxe'gakile' Páblona' na' wnegake' zban che dillaa cho'e, na' biya dii wnagake' che'.

⁴⁶ Na'ch Páblona' len Bernabéna' aga blleb_gake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per daa bi cheenile wzenaglen, chli'le bi chido_l'le gon Chioza' yel' mban chele zejli ka_ni, na' solochokl_{an}to' naa wzajniinto'n ben'ka' bi nak ben' Israel.

⁴⁷ La' dgan non X_ancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjlall'do' ben'ka' bi nak ben' Israel.

Na' yoo ben'ka' lle' doxen yell-lioni ka gongake' kwenche yilagake' na' bi kwiayi'gake'.

⁴⁸ Na' ben'ka' bi nak ben' Israel, ka bengakile' daa wna Páblona' len Bernabéna', le bibagakile' na' wnagake' le mba nak cho'a xtill' Chioza'. Na' yog' ben'ka' ba wlej Chioza' kwenche gat' yel' mban chegake' zejli ka_ni benlilall'gake' Jesúza'.

49 Ka' gok bllilj cho'a xtill' Xancho Jesúza' doxen na'.

50 Na' beṅ' Israelka', beṅ'ka' bi wyajle'gake' che Jesúza', wlooyel'gake' baḷ noolə wnia'ka', beṅ'ka' choe'la'o Chioza', na' beṅ' byoka' le zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell che'ka'.

51 Na'ch Páblona' len Bernabéna' ka biza'gake' wllib ṅi'eka' bishte che yella' daa bi goklall' beṅ'ka' lle' na' wzenaggake' che Chioza'. Na' wyajgake' yell Icóniona'.

52 Na' beṅ'ka' nonlilall' Jesúza' wzoachgagake' mbalaz, na' Espíritu Sántona' wṅabi'e loo yichjlall'do'eka'.

14

Bllin Páblona' len Bernabéna' Icóniona'

1 Na' ka bllin Páblona' len Bernabéna' Icóniona', wyajgake' gana' chdop chllag beṅ' Israelka' choe'lwillgake' Chioza'. Na' Chioza' goklene' legake' ka be'gake' cho'a xtilleena' kwenche beṅ' zan beṅlilall'gake' Jesúza', ka beṅ' Israel na' ka beṅ' bi nak beṅ' Israel.

2 Na' beṅ' Israelka', beṅ'ka' bi goni shajle' che Jesúza', wlooyel'gake' baḷ beṅ'ka' bi nak beṅ' Israel kwenche gokzbangakile' beṅ'ka' nonlilall' Jesúza'.

3 Daan bigaan Páblona' len Bernabéna' Icóniona' ssha, na' be'gake' xtill' Xancho Jesúza' na' bi bllibgake', la' nṅenilall'gake' zoalen Xancho Chioza' legake'. Na' Xanchona' goklene' legake' bli'gake' yeḷ' wak che'na' kwenche gokbe'i beṅ' nan choe'gake' dill' li.

4 Na' ben' Icónioka' gokgake' choplə, bale' wda'gake' ben' Israelka' na' zi bale' wda'gake' Páblona' len Bernabéna'.

5 Na'ch ben' Israelka' bengake' txen ben'ka' bi nak ben' Israel na' gokgake' toz len ben' wñabia'ka', goklall'gake' yiya dii gongakile' Páblona' len Bernabéna' na' wlliagake' legake' yaj.

6 Na' ka wñezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' lliagana' mbani Licaóniana'.

7 Na' lekzka' be'gake' dill' wen dill' kob che Jesúza' na'.

Blliagake' Páblona' yaj yell Lístrana'

8 Na' Lístrana' jadi'gake' to ben' nxinj ñi'ena' ka goljtie'. Na' bi chak see daa bi chzoa chech ñi'ena'.

9 Na' chi'e chzenague' dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see.

10 Na'ch golle'ne' zillj:

—Wzolla'.

Na' lii wzolla'tie' na' gok wzee.

11 Ka ble'i ben' Lístraka' daa ben Páblona', wzolo chosyaagake' chnegake' xtilleeka' daa nak dill' Licaonia che'gake':

—¡Ba betj chios chechoka' gani zoacho na' chle'gakichone' ka beñech!

12 Na' wnagake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa.

13 Na' bhoz che yoodo' che Júpitera', daa zoa katez choogake' yella', jwee goonka' na' nwalee

legakb bga de yej, na' le', na' ben'ka' ndop nllag na', goklall'gake' witgake' legakb kwenche we'la'ogake' Páblona' len Bernabéna'.

14 Na' ka gokbe'i Bernabéna' len Páblona' bin gon ben'ka', na' wzologake' bchez' xe'ka', la' chakgakile' dii mal nleban chon ben'ka'. Na' jsedogake' ladje'ka', na' wnegake' zillj, che'gake':

15 —Le' ben'do', ¿berache chonzle ka'? Lekzka' ben' yell-lioz neto', ka le', na' ba bidnto' kwenche wzajniinto' le' chiya' kwejyichjle diiki bibi zak' na' gonlilall'le Chios, ben' yaa ben' banna', beena' ben yabana', yell-lioni, na' niso'da', na' yog' dii de xan yabana', lo yell-lioni, na' loo niso'da'.

16 Kani'yi Chioza' bwialoze' che benecha' bengake' kon daa nazan chegake'.

17 Na' la'kzi bwialoze' ka bengake', bliile' legake' yel' wak che'na' kwenche ka' gakbe'gakile' zoe'. La' len' chone' yeja' kwenche chak dii chaz chaancho na' chat' dii cheej chaocho kwenche soacho mbalaz.

18 Na' la'kzi Páblona' len Bernabéna' gollgake' ka', kani goongakile' bi witgake' goonka' daa nan we'la'ogake' legake'.

19 Na' bllin bal ben' Israelka' zaak Antioquíana' na' Icóniona', na' wlooyel'gake' ben' Lístraka' kwenche blligake' Páblona' yaja'. Na' daa gokgakile' ba witen', na'ch bxobgake'ne' jadixgake'ne' cho'a yella'te.

20 Na' ben'ka' nonlilall' Jesúza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

21 Na' lekzka' wdixjeegake' dill' wen dill' kob che Jesúza' yell Dérbena', na' beṇ' zan benlilall'gake' Jesúza'. Na'tech, biza'gake' bidegake' yell Lístrana', Icóniona' na'ch Antioquíana'.

22 Na' to to yellka' gana' bidegake' btipgake' lall' beṇ'ka' ba chajle' che Jesúza' kwenche soachechgake' gonlilall'chgake'ne'. Na' gollgake' chiyal' yizo yizakicho bittez dii yen ile'icho kwenche gak lljazoalench Chioza' gana' chṇabi'e.

23 Na' to to yellka' wlejpgake' to chop beṇ' koo lall' na'gake' beṇ'ka' ba nonlilall'gake' Jesúza'. Na' wzoagake' wbas' be'lwillgake' Chioza', na'ch bengake' legake' lall' na' Xancho Jesúza', beena' nonlilall'gake'.

Páblona' len Bernabéna' biyajgake' yell Antioquíana' daa llia gana' mbani Síriana'

24 Na' wde Páblona' len Bernabéna' gana' mbani Pisídiana' na' bllingake' gana' mbani Panfíliana'.

25 Na' be'gake' cho'a xtill' Chioza' yell Pérgena'. Na'ch biza'gake' ziyajgake' yell Atáliana'.

26 Na' yell Atáliana' biyoogake' to loo barkw na' billingake' yell Antioquíana' gana' lle' beṇ'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'.

27 Na' ka billingake' yell Antioquíana', btopgake' beṇ'ka' nonlilall' Jesúza', na' gollgake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che beṇ'ka' bi nak beṇ' Israel kwenche benlilall'gake' Jesúza'.

28 Na' Páblona' len Bernabéna' bigaangake' ssha yell Antioquíana' len beṇ'ka' nonlilall' Jesúza'.

15

Bidogake' Jerusalénna' na' be'gake' dill'

¹ Shlak zoa Páblona' len Bernabéna' yell Antioquíana', bllin bal ben' za' Judeana' na' wzologake' bli' bsdgakile' ben'ka' nonlilall' Jesúza' nan chiyal' gongake' ka na ley che dii Moiséza' na' sho'gake' sen daa le circuncisión kwenche Chioza' wi'e yel' mban chegake' zejli kani.

² Na' Páblona' len Bernabéna' gokdil-lengake' ben' Judeaka'. Na' daa gok ka', ben' Antioquíaka' bengake' toz dill' wsel'gake' Páblona' len Bernabéna' na' sto chop ben' yell Jerusalénna' kwenche llje'lengake' postlka' dill' len ben'ka' ngoo lall' na'gake' ben'ka' nonlilall' Jesúza' Jerusalénna', cheyi daa chli' chsedi ben' Judeaka' bllin Antioquíana'.

³ Na' wloogake' nez kon ka goll ben'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' ben'ka' nonlilall' Jesúza' ka ba wyanchga ben'ka' bi nak ben' Israel ba yoogake' lo xnez Chioza'. Na' ka beni ben'ki dga, le bibagakile'.

⁴ Ka bllin ben'ki Jerusalénna', ben'ka' nonlilall' Jesúza' len ben'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'.

⁵ Na' bal fariseoka' nonlilall' Jesúza' wzolla'gake' na' w nagake':

—Ben'ka' bi nak ben' Israel chonan byen sho'gake' sen daa le circuncisión ka solo

gonlilall'gake' Jesúza', na' chiyal' gongake' ka na ley che dii Moiséza'.

⁶ Na' bdop bllag postlka' len ben'ka' ngoo lall' na'gake' ben'ka' nonlilall' Jesúza' kwenche wwia-gake' naklə ka sho' xnezi dga.

⁷ Ba gok ssha chdil' cho'a xtilleeka' ka wzolla' Pédróna' na' golle' legake':

—Le', ben' bishaa, ba nezkzile kana' wlej Chioza' nad' ladjleni kwenche llji'a dill' wen dill' kob che Jesúza' lao ben'ka' bi nak ben' Israel kwenche gonlilall'gake'ne'.

⁸ Chioza', beena' nombi'e yichjlall'do' yog' ben', bli'e nan chlebe' ben'ka' bi nak ben' Israel daa bselee Espíritu Sánóna' zoe' loo yichjlall'do'eka' kon ka bene' checho.

⁹ Toz ka ba ben Chioza' checho na' che ben'ka', la' lekzka' ba biyib bixise' loo yichjlall'do'eka' daa ba nonlilall'gake' Jesúza'.

¹⁰ Na' ¿berache bi chajle'le daa ba ben Chioza'?, na' ¿biçhe cheenile gon ben'ka' bi nak ben' Israel diiki? La' ni cho' ni dii xozxto'choka' bin' sakicho gonchon.

¹¹ Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹² Na' yoguee wzoagake' llizə bzenaggake' shlak Páblóna' len Bernabéna' be'gake' dill' ka ben Chioza' goklene' legake' bengake' yel' wakka' ladj ben'ka' bi nak ben' Israel.

¹³ Na' ka biyoll be' Páblóna' len Bernabéna' dill', na'ch wne Jacóbona', golle':

—Le' ben' bish', cheenid' wzenagle dga inia' le':

14 Simón Pédroni ba bi'e dill' ka wzolo Chioza' wleje' beṅ' ladj beṅ'ka' bi nak beṅ' Israel kwenche gakgake' lall' nee.

15 Na' dga gok ka' chidil-lebin daa bzej dii beṅ'ka' wdixjee daa goll Chioza' legake' kani'yi, gana' nan:

16 Ka te dga, yiyed'

na' wzoa' to xiin dia che dii Davina' inabi'e.

La'kzi yel' wṅabia' che'na' nakan ka to yoo dii ba biyinj,

wllin lla yichisa'n.

17 Gon' dga kwenche yog' beṅ'ka' biṅ' gonlilall'gake' nad' yiyiljgake' nad',

lente yog'lol beṅ'ka' bi nak beṅ' Israel, beṅ'ka' ba nak lall' na'.

18 Kan' wna Xancho Chioza', beena' bzajniile' beṅ'ka' diiki kani'teyi.

19 'Na'chan nia' le', bi chiyal' ye'cho beṅ'ka' bi nak beṅ' Israel, beṅ'ka' ba nonlilall'gake' Chioza', gongake' dii bi chonan byen.

20 Kon wzejcho to yish ye'chogake' bich gaogake' yel' wawa' daa chllia beṅ' lao lwaa lsak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool beṅ'.

21 La' kani'teyi zoakzə beṅ' to to yell chzajni'gakile' beṅ' ley che dii Moiséza', na' lennan' ni chlabgake' naa gana' chdop chllaggake' choe'llwillgake' Chioza' yog' lla sabd.

Yisha' daa bsel'gake' lao beṅ'ka' bi nak beṅ' Israel

22 Na'ch postlka', na' yog' beṅ'ka' nonlilall' Jesúsza' len beṅ'ka' ngoo lall' na' legake' bengake' toz dill'

wlejgake' to chop beṅ' ladje'ka' kwenche sha-
jlengake' Páblona' len Bernabéna' Antioquíana'.
Na' wlejgake' Judas, beena' lekzka' lie' Barsabás,
na' Sílaža', nakgake' beṅ' mbejlawin ladj beṅ'ka'
nonlilall' Jesúža'.

²³ Na' bsel'lengake' beṅ'ki to yish dii bzejgake', na'
ki choe'n dill':

“Le' beṅ' bish' na' le' beṅ' zannto', le' bi nakle
beṅ' Israel na' zoale yell Antioquíana', na' doxen
gana' mbani Síriana' na' Cilíciana', neto' postl
na' beṅ'ki ngoo lall' na' beṅ'ka' nonlilall' Jesúža'
Jerusalénni, na' yog' beṅ' bish'choki lle' ni, chwap-
nto' le' chiox.

²⁴ Ba wnezinto' ba bchej to chop beṅ' ladjnto'ni
bidgake' to bia'lall'zgake' gana' zoale, na' benlle-
jgakile' le' daa wngake' chiyal' sho'le seṅ daa le
circuncisión, na' chiyal' gonle doxen ka na leya'.

²⁵ Daan, ba bennto' toz dill' wlejnto' beṅ'ki chop
ladjnto'ni zidwiagake' le'. Na' chsel'lennto' legake'
Pábloni na' Bernabéni, beṅ' bish'choki le chakicho,

²⁶ beṅ'ki chzoa dii nxoll yel' mban che'ka' daa
chongake' xshin Xancho Jesucrístona'.

²⁷ Na' chsel'nto' beṅ'ki le Judas na' Silas, na'
legake' wzajni'gakile' le' dga chzejnto' le'.

²⁸ Na' wyazlall'nto' ka bzajni Espíritu Sántona'
neto' bi wzoanto' le' gonle dii bi yizoile. Diikizə
chakinto' chonan byen bi gonle:

²⁹ Bi gaole yel' wawa' daa chllia beṅ' lao lwaa
lsak' chios che'ka', na' ni bi gaole bel' che bayix'ka'
shi bi wlalj xchema', ni bi gaole xchen bayix'ka',
na' lekzka' bi inelenzle xiṅ xool beṅ'. Shi wzenagle
diiki nannto' le', wenkzan chonle. Ka'tz nak dill'ki
chzejnto' le'.”

30 Na'ch ka bllin ben'ka' bsel'gake' Antioquíana', na' btopgake' yog' ben'ka' nonlilall' Jesúsza', na' be'gake' legake' yisha' daa nox'gake'.

31 Na' ka blabgake'n le bibagakile' ka dillaa choe'n.

32 Na' ka nak Júdaza' na' Síłaza', daa lekzka' nakgake' ben' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'.

33 Na' biyoll wzoalengake' legake' shloll wen, na'ch ben'ka' nonlilall' Jesúsza' Antioquíana' mbalaz bilaagake' legake' dill' na' biyajgake' kwit ben'ka' bsel' legake'.

34 Na' Síłaza' wyazlallee igaane' na'z.

35 Páblona' na' Bernabéna' bigaangake' Antioquíana'. Na' len zan ben' yoblə bli' bsedchgakile' ben' cho'a xtill' Xancho Jesúsza'.

Sto shii wyaj Páblona' yellka' gana' ba ji'e cho'a xtill' Chioza'

36 Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúsza' kwenche lljawiacho nak chak che ben'ka' ba wyajle'.

37 Na' Bernabéna' goklallee wche'gake' Juan, beena' lekzka' nsigake' Marcos.

38 Na' bi gooni Páblona' wche'gake'ne', la' kana' bche'gake'ne' bixonje' na' bkwaane' legake' Panfílana', na' bich jenlene' legake' xshin Chioza'.

39 Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'.

40 Na' Páblona' wzee bchi'e Sílaza'. Na' beṇ'ka' lle' Antioquíana', beṇ'ka' nonlilall' Jesúza', wṇabgakile' Xancho Chioza' gaklene' legake' gattezə shajgake'.

41 Na' Páblona' len Sílaza' wdegake' gana' mbani Síriana' na' Cilíciana' kwenche goklengake' beṇ'ka' nonlilall' Jesúza' wzoatip wzoashoshchgake'.

16

Timotewa' bene' txen Páblona' len Sílaza'

1 Na'ch Páblona' len Sílaza' bllingake' yell Dérbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakb' xiin to noolə Israel, na' nooli nonlilallee Jesúza', per xabaa nake' beṇ' griego.

2 Na' beṇ' Lístraka' len beṇ' Icónioka' nonlilall' Jesúza' be'gake' dill' le wen nsā' cheb'.

3 Na' Páblona' wṇabile'b' shajlem' legake', na' wlo'eb' seṇ daa le circuncisión kwenche bi gakzbani beṇ' Israelka' leb', la' nezgakile' xabaa bi nake' beṇ' Israel.

4 Na' yog' yellka' gana' wdegake' be'lengake' beṇ'ka' nonlilall' Jesúza' dill' che diika' chiya' gongake', diika' be' postlka' dill' kon beṇ'ka' ngoo lall' na'gake' beṇ'ka' nonlilall' Jesúza' yell Jerusalénna'.

5 Na'ch beṇ'ka' nonlilall' Jesúza' yellka' benlilall'chgake'ne' do yichj do lall'gake', na' lla kon lla wyanchgake'.

Ble'do'i Páblona' to beṇ' Macedonia chṇabile'ne' shaje' lalle'na'

6 Páblona' len Sílaza' na' Timotewa' to wdezgake' gana' mbani Frígiana' len Galáciana', daa bi be'

Espíritu Sántona' latj llje'gake' cho'a xtill' Chioza' gana' mbani Ásiana'.

⁷ Na' ka bllingake' gaouz yell-lío gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'.

⁸ Na'ch wdegake' yell-lío che Mísiana' bllintegake' yell Tróaza' daa lia cho'a nisdona'.

⁹ Na' lo yela' Chioza' bene' ka ble'do'i Páblona' to beñ' byo, beñ' Macedonia, zie' chat'yoile'ne', chi'ene': "Dagach Macedóniani kwenche gakleno' neto'."

¹⁰ Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajniinto' Chioza' cheenile' shajnto' llje'lennto' beñ'ka' lle' na' dill' wen dill' kob che Jesúza'.

Páblona' na' Sílaza' wyajgake' Filípoza'

¹¹ Na' yell Tróaza' wyoonto' barkwa' na' wyajnto' shlichá gana' lia to yell-lío lo nisdona' daa le Samotracia. Na' betiyo bllinnto' to yell dii le Neápolis.

¹² Na' wza'nto' Neápoliza' wyajnto' yell Filípoza'. Nakan to yell ga lle' beñ' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shon lla.

¹³ Na' shlak zoanto' na', lla sabda' bchejnto' yella' na' wyajnto' to cho'a yao ga chje'lwillgake' Chioza'. Na' jche'nto' na', be'lennto' dill' noolka' bdop bllag.

¹⁴ Na' ladj noolka' len to beñ' le Lidia. Nake' beñ' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'.

15 Na' ka wde wchoe' nisa' do bxoone', na' wne' neto':

—Shi chakile dii li ba nonlilallaa Xancho Jesús'a, li sho' na' yigaanle lillaa.

Na' bene' byen jagaan̄nto' lille'na'.

16 Na' to shii ka zejnto' gana' choe'lwillgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche chneyaab'. Na' nakb' to bi' ndoo lla yel chom' xshin beñ', na' dii xen chon xama' gan daa chneyaab'.

17 Na'ch bi'ni wnob' Páblona' shlak zejlen̄nto'ne', chosyaab' zillj, nab':

—Ben'kin chongake' xshin Chioza', beena' nak beñ' choo beñ' xen, na' chzajni'gakile' beñ' nez li che Chioza' gana' sho'cho kwenche bi kwiayi'cho.

18 Na'ch kon ka' w nab' yog' lla, na' gokzedi Páblona', na'ch biyechje', golle' dii xiwaa yoob':

—Kon yel' wñabia' che Jesucristona' nia' li' bichej.

Na' lii bichejte dii xiwaa.

19 Na' ka gokbe'i xam'ka' bich bi mech gongake' gan, na'ch bex'gake' Páblona' len Síłaza' na' jwa'gake' legake' lao joschiska'.

20 Na' ka bllinlengake' legake' lao joschiska', na' che'gake':

—Ben' Israelki chta chnegake' beñ', lallchoni.

21 Na' chli' chsedgakile' beñ' dii bi chiyał' goncho ni bi chiyał' wlebcho, cho' nakcho beñ' Roma.

22 Na' beñ' zan bdi'a na' wnegake' zban che Páblona' len Síłaza'. Na'ch joschiska' bchogbia'gake' wdingake' xe'ka' na' bet wdingake' legake'.

23 Na' ka wde bet wdinchgagake' legake', na' wloogake' legake' lillyana', na' gollgake' beena'

chap lillyana' gape' legake' byendad kwenche ki yilagake'.

²⁴ Na' daa gollgake' beeni ka', wlo'e legake' bill xyoote na' bni'e yen ni'eka' to lee kwag' dii nyidjgake'.

²⁵ Na' do ka chel Páblona' len Sílaza' choe'lwillgake' Chioza' na' cholgake' choe'la'ogake'ne', na' beñ'ka' sto de lillyana' chzenaggake' ka chongake'.

²⁶ Na' tokonganzi wde to bedxo' xen wal na' bniban doxen lillyana'. Na' lii byaljen, na' gdenka' diika' nchejgake' beñ'ka' de lillyana' to-lazzin biyellgakan.

²⁷ Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' beñ'ka' de lillyana' ba billeshgake'.

²⁸ Na' Páblona' besyee, golle'ne':

—¡Bibi goni kwino'! Nikz lle' yog'nto'.

²⁹ Na'ch beena' chap lillyana' wñabe' to yi' na' wyoodoe' jawie' gana' yoo Páblona' len Sílaza', na' lii bchek'te xibe'na' lawe'ka' do chxizze' daa le bblebe'.

³⁰ Na' lii bibejtie' legake' lillyana', na' chi'e:

—¿Le', beñ'do', beran chiya'l' gon' kwenche bi kwiayaa?

³¹ Na' gollgake'ne':

—Benlilalloo Xancho Jesucristona', li' na' do xiin xoolo', kwenche yisle' le' na' bi kwiayi'le.

³² Na' be'lengake' le' na' beñ'ka' zoa lille'na' cho'a xtill' Xancho Jesús'a'.

³³ Na'ch beena' chap lillyana' wdibe' we'na' lliagake', la'kzi nakan wal chel. Na' lezkza' yog'loltie' lii wchoategake' nisa'.

34 Na' bichi'e Páblona' len Síłaza' lille'na' na' bweej bwawe' legake'. Na' le chibayi beeni do xiin xooole' daa ba nonlilall'gake' Chioza'.

35 Na' ka wyeeni', joschiska' bsel'gake' ben' jell-gake' beena' chap lillyana' yisane' legake' kwenc̄he yiyajgake'.

36 Na' beena' chap lillyana' golle' Páblona':

—Ba bsel' joschiska' ben'ki, na' nagake' ba de lsens yisan' le'. Na' wak yiyajle naa, kochno bi goni le'.

37 Na' Páblona' golle' legake':

—Neto' ndento' kwent yell Rómana', na' ni bi biyiljni'agake' bin bennto' ba bet wdingake' neto' lao lkwe' ben' na' wdixjzgake' neto' lillyani. ¿Ana' naa cheenzgakile' yisangake' neto' do ngash'zə? Yidch kwingake' yibejgake' neto'.

38 Na' jayellgake' joschiska' daa goll Páblona' legake', na' joschiska' le bllébgake' ka wnezzgakile' Páblona' len Síłaza' ndegake' kwent ka ben' Roma.

39 Na'ch wyaj joschiska' jaye'xengake' Páblona' len Síłaza' na' bibejgake' legake' lillyana', na' got'yogakile' legake' bich yigaangake' yella'.

40 Na' ka bichej Páblona' len Síłaza' lillyana', na' biyajgake' lill Lídiana' jawiagake' ben'ka' ba nonlilall' Jesúsza' na' btipchgake' lall'gake', na'tech biza'gake'.

17

Bta bne ben' malka' ben' Tesalónicaka'

1 Na' ka biza' Páblona' len Síłaza', wdegake' yell Anfípoliza' na' yell Apolóniana', na' bllingake' yell Tesalónicana' gana' zoa yoonā' gana' chdop chllag ben' Israelka' choe'lwillgake' Chioza'.

2 Na' lo shon xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioza',

3 bzajniile' legake' Crístona', beena' wlej Chioza' inabi'e, benan byen biya dii wxak'zi'e na' wite', na' bibane' ladj ben' wetka'. Na' chi'e legake':

—Jesúza', beena' choe'len' le' xtilleena' naa, len' Crístona', beena' wlej Chioza' inabi'e.

4 Na' bal ben' Israelka' wyajle'gake' na' ben-gake' txen Páblona' len Sílaza', na' lezkza' zan ben' griegoka', ben'ka' ba choe'la'ogake' Chioza', wyajle'gake' che Jesúza', na' lezkza' zan noolka' zakii.

5 Na' ben' Israelka' bi wyajle', gokxe'gakile' Páblona' len Sílaza', na' btopgake' ben' wdallagka' nak ben' mal, na' wlekgake' to dii zed yella'. Na'ch wyajgake' lill beena' le Jasón jadiljgake' Páblona' len Sílaza' kwenche gongake' legake' lo na' ben' yellka'.

6 Na' daa bi zoa Páblona' len Sílaza' na', na'ch wdoyogake' Jasónna' na' zi to chop ben'ka' nonlilall' Jesúza' na' jwa'gake' legake' lao joschiska'. Na' wnegake' zillj che'gake':

—Ben'ka' chda chbekgake' dii zed doxen yellioni ba bla'gake' yell chechoni.

7 Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto ben' wñabia' le Jesús.

8 Na' ben' yellka' len joschis che'ka' bllaagake' na' gokllesh'gakile'.

9 Na' wxenlall' joschiska' bllia Jasónna' mech len ben'ka' nakgake'ne' txen, na'ch bisangake' legake'.

Páblona' len Sílaza' wyajgake' Bereana'

10 Na' kon ka goł, beṅ'ka' nonłilall' Jesúza' bisa'dogake' Páblona' len Sílaza' kwenče yiyajgake' yell Bereana'. Na' ka bllingake' yella', lii wyajtegake' gana' chdop chllag beṅ' Israelka' choe'łwillgake' Chioza'.

11 Na' beṅ' Bereaka' nakchgake' beṅ' wench aga ka beṅ' Tesalónicaka', na' bibagakile' bzenaggake' daa bzajni Páblona' len Sílaza' legake'. Na' yog' lla biyiljgake' lee Cho'a Xtill' Chioza' shi nakan ka daa chli' chsedgakile' legake'.

12 Na' zan beṅ' Israelka' zoa na' beṅ'łilall'gake' Jesúza' na' ka'kzə zan beṅ' griegoka', ka beṅ' byoka' na' ka noolka' zakii.

13 Na'ch beṅ' Israelka' lle' Tesalónicana', beṅ'ka' bi beṅ'łilall' Jesúza', ka wnezugakile' Páblona' choe'lene' beṅ' Bereaka' xtill' Chioza', na'ch wyajgake' jata jaṅegake' beṅ' yellka'.

14 Na' beṅ'ka' nonłilall' Jesúza' lii bsel'tegake' Páblona' cho'a nisdona'łə, na' Sílaza' len Timotewa' bigaangake' Bereana'zə.

15 Na' beṅ'ka' zejlen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Sílaza' len Timotewa' wtalall'gake' shajgake' gana' zoe'.

Páblona' zoe' yell Aténaza'

16 Na' shlak chbez Páblona' Sílaza' len Timotewa' yell Aténaza', le bllaa yichje' daa ble'ile' to ni to na' nzoa beṅ' Aténaska' diika' choe'la'ogake'.

17 Ni cheyi daan bzajniile' beṅ' Israelka' gana' chdop chllaggake' choe'łwillgake' Chioza', na' len zi xonj beṅ' griego. Na' lekzka' yog' lla wyaje' gana'

chak yaana' gana' lle' lla' beṅ' na' be'lene' ḡegake' dill'.

¹⁸ Na' baḷ epícúreoka', beṅ'ka' chsedgake' daa bli' bsemi beena' wle Epícúreo, len baḷ estóicoka', wzologake' wdil̄ xtilleeka' len Páblona'. Na' baḷe' che':

—¿Beran naz beeni chshaljchgue'?

Na' zi baḷe' nagake':

—¿Aaga beenin zidye'lene' cho' dillaa daa nan chiyaḷ' we'la'ocho sto chios yoblə?

Wnagake' ka' daa chyixje'i Páblona' ḡegake' dill' wen dill' kob che Jesúsza', chi'e ḡegake' bibane' ladj beṅ' wetka'.

¹⁹ Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bllinlengake'ne', che'gake':

—Cheeninto' inezinto' bi dii koban chli' chsedilo'.

²⁰ La' ndantekzi nak dill'ki choo, na' cheeninto' inezinto' bi zejín.

²¹ La' yog' beṅ' Aténaska' na' ḡekzka' beṅ' zit'ka' zoa na', bichkzə bilə chongake', to chinozgake' bi dill' kob wzenaggake' na' to xtilii daazə choe'gake' yog' lla.

²² Na'ch Páblona' wzie' ladje'ka' gana' nzi' Areópago, na' golle' ḡegake':

—Le' beṅ' Atenas, chakbe'id' ḡe chibaile choe'la'ole diika' noni chios chele.

²³ La' ba ble'id' yell cheḷeni to to latj gana' chgoole diika' balaan, na' ble'id' to ga da' to dill' dii na: “Che Chios, beena' kono nombia'.” Na' beena' chgoole balaan ḷa'kzi bi nombia'lene', dill' che'nan' zidye'len' le' ṅaa.

24 'Chios, beena' ben yell-lioni na' yog' dii de lawinna' nake' Xan yabana' na' yell-lioni. Aga zoe' loo yoodo' dii choni ni'a na' beñ'.

25 Na' aga bi chyallji Chioza' dii inacho gak gon beñ' yell-liona' che'. La' len' none' yel' mban che yog'lolcho, na' none' bishbe checho, na' yog' bi dii de checho.

26 'Len' bxe bsile' to beñ' yell-lion, na' yog'lolcho cho' nakcho xiin dia che beena' bxe bsile', na' le'kze' ba nllie' bia' bal' yiz soacho yell-lioni na' gana' soa to tocho.

27 Na' bzoe' cho' yell-lioni kwenche yiyilcho nakan goncho gombia'chone'. Na' dii li gal' gllin zelen Chioza' to tocho,

28 la' len' chone' ka mbancho na' ka chzo chdach. Kan' bzej bal' beñ' sin' cheleka', beñ'ka' wna-gake': "Nakcho xiin Chioza'."

29 Na' daa nakcho xiin Chioza', bi chiyal' gakicho nake' to beñ' de or, de plat, de yaj, de yag, ka chaljlall' beñ'ka' chongake' diiki.

30 Kana'teyi Chioza' bwialoze' ben beñ'ka' daa nazan chegake' yel' bi chajni che'ka', per naanlla chone' byen yog'lol beñ' lle' doxen yell-lioni yiyaj yilengakile'.

31 La' Chioza' ba bliie' bia' to lla gone' yel' joschis che to to beñ' lle' yell-lioni, na' gone' che to toe' kon ka chidolee. Na' ba bliile' cho' beena' wleje' gon yel' joschisa' daa bilise'ne' ladj beñ' wetka'.

32 Na' ka bengakile' wna Páblona' Chioza' chisbane' beñ' ladj beñ' wetka', bale' bxillgake', na' zi bale' gollgake'ne':

—Sto llagalə wzenagnto' cho' cheyi dga choo dill'.

33 Na' biza' Páblona' gana' lle' beṇ'ka'.

34 Na' baṽ beṇ' bengake'ne' txen na' beṇlilall'gake' Jesúza'. Na' ladje'ka' len to beṇ' lie' Dionisio, beena' len beṇ'ka' zakii chdop latja' nzi' Areópago, na' lekzka' sto noolə lie' Dámaris, na' sto chop beṇ' yoblə.

18

Biyaj Páblona' yell Coríntona'

1 Ka wde biza' Páblona' yell Aténaza', na' biyaje' yell Coríntona'.

2 Na' ka billine' Coríntona' billague' to beṇ' Israel lie' Aquila. Na' beeni nake' beṇ' yell Ponto na' nool che'na' lie' Priscila. Zi' bllinz-gake' Coríntona' biza'gake' gana' mbani Itáliana', la' Claudiona', beṇ' wnabia'na', bisheshe' yog' beṇ' Israelka' Rómana' gana' zoe'. Na' Páblona' jawie' legake',

3 na' daa nlangake' toz ka llin, bigaanlene' legake', na' wdiagake' yid xa bayix'ka' daa chchingake' lwaa yoo.

4 Na' yog' lla sabd, Páblona' chaje' gana' chdop chllag beṇ' Israelka' choe'lwillgake' Chioza', na' chzajniile' beṇ'ka' lle' na' xtill' Jesúza', ka beṇ' Israel na' ka beṇ' bi nak beṇ' Israel.

5 Na' Sílaza' len Timotewa' biza'gake' Macedóniana' na' bllingake' gana' zoa Páblona'. Na' daa bllingake', bich bi llin yoblə ben Páblona', san toz xshin Chioza' bene' na' bzajniile' beṇ' Israelka' nan Jesúza' nake' Crístona', beena' wlej Chioza' inabi'e.

6 Per wzololəgake' chakdıl-lengake'ne' na' wnegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle':

—Le'zkzan wlliyi' kwinle. Aga bi dol' gap' nad'. Na' naa lljali' lljasedid' ben'ka' bi nak ben' Israel.

7 Na'ch bizee kwite'ka' na' biyaje' lill to ben' le Justo, beena' choe'la'o Chioza', na' zoa lille'na' gao gana' chdop chllag ben' Israelka' choe'llwillgake' Chioza'.

8 Na' to ben' le Crispo ngoo lall' nee chgwee xnezi cheyi diika' chon ben' Israelka' gana' chdop chllaggake', na' do xiin xooole' wyajle'gake' che Xancho Jesúsza'. Na' ben' zanch ben' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'.

9 Na'ch to lle' bli'lao Xancho Jesúsza' Páblona', na' golle'ne':

—Bi illebo'. Be'ch xtilaana' lao ben'ki na' bi so' llizə.

10 Nad' zoalen' li', na' bi wi'a latj no bi goni li', la' ben' zan zi' gombia'gake' nad' yelli.

11 Na' bigaan Páblona' Coríntona' twiz yoo gashj bli' bsedile' ben' cho'a xtill' Chioza'.

12 Na' kana' chñabia' beena' le Galión gana' mbani Acáyana', ben' Israelka' gokgake' toz be'x'gake' Páblona' na' bche'gake'ne' gana' chon Galiónna' yel' joschisa'.

13 Na' che'gake' Galiónna':

—Beeni chde' chgooyelee ben' kwenche we'la'ogake' Chioza' nlla'lə aga ka na ley che Rómana' daa chñabia' cho'.

14 Ka nan ine Páblona', lii wñete Galiónna' ben' Israelka', chi'e:

—Ka nak dga chaole xya, shi bi dol' nap beeni wa shi bi xya wal bene', wak gon' yel' joschis chelena'.

¹⁵ San shi chaole xya che dill' daa cho'e, na' daa chzetje' le beñ', na' che ley chelena', bi nakan ka dii gon' yel' joschis cheyin. Le'zə, li wwia naklə gonlen.

¹⁶ Na' bibeje' legake' gana' chone' yel' joschisa'.

¹⁷ Na'ch yog' beñ' griegoka' beḡgake' Sósteneza', beena' chgoo xñezin cheyi diika' chon beñ' Israelka' gana' chdop chllaggake' choe'lwillgake' Chioza', betsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

¹⁸ Ka wde gok ka', Páblona' bigaanche' sshach Coríntona'. Na'ch bilee dill' beñ'ka' nonlilall' Jesúza' na' bizee kwenche shaje' gana' mbani Síriana'. Na' Priscílana' len Aquílana' zejlengake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'.

¹⁹ Ka bllingake' yell Éfesona', Páblona' bikwaanze' Priscílana' len Aquílana', na' wzee wyaje' gana' chdop chllag beñ' Israelka' choe'lwillgake' Chioza' na' be'lene' beñ'ka' dill'.

²⁰ Na' beñ'ka' ndop nllag na', wnabgakile' Páblona' yigaañlenche' legake', na' Páblona' bi goonile'.

²¹ Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchkz' yidwia' le' shi Chioza' wi'e latj.

Na'ch bizee Éfesona' biyo'e to loo barkw.

22 Na' ka betje' barkwa' Cesareana', wyaje' Jerusalénna' jawape' chiox ben'ka' nonlilall' Jesúza'. Na' bizee biyaje' Antioquíana'.

23 Na' bigaane' shloll, na'tech wzee wyaje' sto shii to to yell gana' mbani Galáciana' na' Frígiana' jatipche' lall' ben'ka' nonlilall' Jesúza'.

Apóloza' bi'e xtill' Chioza' Éfesona'

24 Na' do kana' bllin to ben' Israel Éfesona' lie' Apolos, ben' golj yell Alejandríana'. Na' chak cho'e dill' lao lkwe' ben', na' le nsede' Cho'a Xtill' Chioza'.

25 Apóloza' nsede' che Xancho Jesúza', na' do yichj do lallee cho'e dill' che' kon ga zeelo nezile', per zeelo nezile' daa bli' bsemi Juanna' che daa chchoa ben' nisa'.

26 Na' Apóloza' bi bllibe' bi'e dill' che Jesúza' gana' chdop chllag ben' Israelka' choe'llwillgake' Chioza'. Na' ka beni Priscílana' len Aquílana' ka chli' chsemi Apóloza', na'ch biche'gake'ne' kwenche bzajni'chgakile'ne' kwasloll ka nak xnez Chioza'.

27 Ka goki Apóloza' shaje' gana' mbani Acáyana', ben'ka' nonlilall' Jesúza' btipgake' lallee na' bzejgake' to yish dii bexee che ben'ka' nonlilall' Jesúza' na', kwenche wlebgake'ne'. Na' ka blline', le goklene' ben'ka' ba biyesh'lallii Chioza' kwenche nonlilall'gake' Jesúza'.

28 Na' bli' bsemi ben' nan klelan chajonii ben' Israelka' che Jesúza'. Na' bibi gok yee ben' Israelka' daa bliile' legake' to to gana' nyoj Cho'a Xtill' Chioza' daa na Jesúza' nake' Crístona', beena' wsel' Chioza' inabi'e.

19

Ka wzoa Páblona' Éfesona'

¹ Na' shlak wzoa Apóloza' Coríntona', Páblona' wdie' to to yellka' lliá ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e ba_l be_n' ba non_lilall' Jesúza'.

² Na' w_nabile' legake', chi'e:

—¿Azidsoa Espíritu Sántona' loo yichjlall'do'lena' ka wzolole chon_lilall'le Jesúza'?

Na' be_n'ka' gollgake'ne':

—Ni bi _nezinto' shi zoa Espíritu Sántona' beena' no' ka'.

³ Na'ch Páblona' wiz_nabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

⁴ Na'ch goll Páblona' legake':

—Dii Juanna' bzajniile' be_n' chiya_l' choagake' nisa' daa wli'n ba biyaj bilengakile' na' lekzka' golle' legake' chiya_l' gon_lilall'gake' beena' zi' yid, na' _len' Jesúza', beena' wlej Chioza' inabi'e.

⁵ Na' ka bengakile' daa goll Páblona' legake', na' wchoagake' nisa' daa chon_lilall'gake' Xancho Jesúza'.

⁶ Na' ka b_xoa na' Páblona' yichje'ka', Espíritu Sántona' wyo'e loo yichjlall'do'eka' na' w_negake' wde wdeli dill' na' lekzka' wdixje'gake' dill' daa goll Chioza' legake'.

⁷ Na' be_n'ki gok _{ch}eyin ka' nakgake' ka do shllin.

⁸ Na' wzoa Páblona' Éfesona' shon beo' bli' bsdile' be_n' Israelka' gana' chdop chllaggake' choe'_lwillgake' Chioza' na' bi bllibe'. Na' be'lenche'

ben'ka' dill' kwenche wyajni'gakile' ka chnabia' Chioza' loo yichjall'do' ben'ka' nonlilall'gake'ne'.

⁹ Na' bal' ben'ka' nak ben' lall'do' wal' aga goon-gakile' shajle'gake', na' biya dii wnagake' lao lkwe' ben' che nez li nez shao' che Jesucristona'. Na'ch biza' Páblona' kwite'ka', na' bichi'e ben'ka' ba nonlilall' Jesúza', wyajlene' legake' lill to ben' le Tirano dii nak ka yoo skwel gana' chdi'a ben', na' bli' bsedchile' legake' yog' lla.

¹⁰ Gokte chop yiz bli' bsedile' legake', na' yog'lol' ben'ka' lle' doxen Ásiana' bengakile' xtill' Xancho Jesúza', ka ben' Israel ka ben' griego.

¹¹ Na' Chioza' bchine' Páblona' kwenche bene' yel' wak xen dii benan ka bibanchgayi ben'.

¹² Na' axt no bachyichj, no lech' chjatigake'ne' na' chiyox'gake'n ga de ben' bi shao' na' chiyak-gakile', na' lekzka' chichej dii xiwaa yoo ben'.

¹³ Na' bal' ben' Israelka' chdagake' to to yell' chibejgake' dii xiw'ka' yoo ben', na' chakgak-ile' wchingake' le Xancho Jesúza' kwenche yibej-gake'n. Na' che'gake'n:

—Kon yel' wak che Jesúza', beena' choe' Páblona' xtilleena', nannto' le', li yichej.

¹⁴ Ka' ben gall xiin to ben' Israel le Esceva, beena' nak to wnabia' che bxozka'.

¹⁵ Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi nezid' no le'.

¹⁶ Na'ch beena' yoo dii xiwaa bxitee bnize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'.

17 Na' yog' beṅ'ka' zoa Éfesona', ka beṅ' Israel ka beṅ' bi nak beṅ' Israel, wṅezgakile' ka gok che beṅ'ka', na' le bllebgame' na' wloochgame' Xancho Jesúza' balaan.

18 Na' zan beṅ'ka' ba nonlilall'game' Jesúza' jaṅoadol'game' lao lkwe' beṅ' ka nak dii malka' ba bengake'.

19 Na' zan beṅ'ka' bḷan yeḷ' willa'na' jwa'game' libr che'ka' daa bsdgame' na' bzeygame'n lao yog' beṅ'ka'. Na' bengake' kwent ka'k' zak' librka' bzeygame', na' bllinan ka do shiyona mil mech plat.

20 Ka' gok blilijch xtil' Xancho Jesúza' na' beṅ' zanch beṅlilall'game'ne' daa gokbe'gakile' xtil' Chioza' nsa'n yeḷ' wak xen.

21 Na' ka wde gok yog' diiki, Páblona' bḅhoglallee shaje' lljawie' beṅ'ka' lle' yellka' llia Macedóniana' na' Acáyana', na'tech yiyaje' Jerusalénna'. Na' lekzka' golle': "Ka yiyoll yiyaa Jerusalénna' chiyal' shaa Rómána'."

22 Na'ch bselee Timotewa' na' Erástona' Macedóniana', beṅ'ki chop chaklengame'ne', na' le' bigaane' Ásiana' zi shloll wen.

Bta bṅe Demétriona' beṅ' Éfesoka'

23 Na' got' to dii zed wal Éfesona' daa chli' chsedi Páblona' che nez li nez shao' che Jesucristona'.

24 Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan cheyin len beṅ'ka' chonlengame'ne' llinna'.

25 Na' btope' beṅ'ka' chonlene' llinna' na' yog' beṅ'ka' nḷangame' llin ka daa, golle' legake':

—Ñezile llin dga nlancho dii xen chkwaan_{an} checho.

²⁶ Na' ba chen chle'ile ka chon beena' le Pablo, chde' chzajniile' ben' wlall chechoki na' doxen gani mbani Ásiani, chi'e aga bi zakii lwaa lsak' dii chon ben' kwenche we'la'ozgake'n. Na' ben' zan ba chzenaggake' che'.

²⁷ Na' nxoll bich too diiki choncho, na' lekzka' nxoll bich seyi che yoodo' gana' zoa xnax Diana chechona', beena' nak ben' choo ben' xen. Na' beeni choe'la'o yog'zə ben' lle' gani mbani Ásiani na' ben' lle' doxen yell-lioni, gongakile'ne' ka to ben' bibi zakii.

²⁸ Ka goll Demétriona' legake' ka', le bllaagake' na' besyaagake', nagake':

—¡Ben' choo ben' xen nak xnax Diana chechona', cho' ben' Éfeso!

²⁹ Na' yog'lolē' gokgake' toz, wlekgake' dii lchix wal yella', na' bex'gake' chop ben' Macedonia, toe' le Gayo, na' stoe' le Aristarco, ben'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'.

³⁰ Na' Páblona' gokile' sho'e ladj ben'ka' ndop nllag na' kwenche nan we'lene' legake' dill', per ben'ka' nonlilall' Jesúza' aga be'gake' latj sho'e.

³¹ Na' lekzka' ladj joschis che ben' Ásiaka' len ben' nllagui Páblona', na' bsel'gake' rson, che'gake'ne':

—Ben goklen, bi shoo gana' lle' ben'ka'.

³² Na' ben'ka' ndop nllag na' chosyaagake', wde wdeli dii na to toe'. Na' zan ben'ka' len ladjeka' ni bi ñezgakile' biche lle'zgake' na'.

33 Na' ba_l be_n' Israelka' bllig'gake' Alejándrona' lao be_n'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenaggake' daa yee legake'.

34 Na' ka ble'gakile'ne' na' gokbe'gakile' nan be_n' Israelan, na'ch bizologake' chosyaagake', nagake':

—¡Be_n' choo be_n' xen nak xnax Diana chechona', cho' be_n' Éfeso!

Ka do chop gor besyaagake' che'gake' ka'.

35 Na'ch beena' nak sikriban che yella' bzoe' legake' llizə. Na'ch golle' legake':

—Le' be_n' wlall, yog' be_n' yell-lio nezgakile' cho' be_n' Éfeso chido_l'cho gap wwiacho yoodo' che xnax Diana chechona', beena' nak be_n' choo be_n' xen. Na' nezgakile' lwaa lsakeena' za'n yabalə,

36 na' ni to kono gak ina aga kan'nakan. Na' li soa llizə kwenche bi gonle to dii bi chiyal' gonle.

37 Ka nak be_n'ki ba bidwa'le ni, bi inacho ba wlangake' bi de loo yoodo' chechona', ni bi inacho ba wnegake' zban che xnax Diana chechona'.

38 Na' shi Demétrioni na' be_n'ka' chonlengake'ne' llinna' de dii chak chegake' kon nottezə be_n', daan chi' be_n'ka' chchoglogake' che be_n' na' wak shajgake' lawe'ka' kwenche gongake' yel' joschis che'ka'.

39 Na' shi bichlə dii cheenile gak, chiyal' yitopcho yog'lol be_n' yell na' we'chon dill'.

40 La' ka nak dga gok naa, nxoll ina be_n' to cho'zan chta chnecho be_n' yell, na' ¿bera inacho shi ba chnabgakile' cho' che dga ba gok naa?

41 Ka wde golle' legake' ka', na' bisheshe' legake'.

20

Biyaj Páblona' Macedóniana' na' Gréciana'

¹ Na' ka bibe'lli daa ben beñ' Éfesoka', na'ch gox Páblona' beñ'ka' nonlilall' Jesúza' na' be'lene' legake' to chop dill' dii gaklenan legake' na' wdele' to to-gake', na' bilee legake' dill'. Na' bizee zjade' gana' mbani Macedóniana'.

² Na' bidie' to to yellka' lia Macedóniana' na' be'lene' beñ'ka' nonlilall' Jesúza' zan dill' dii btipan lall'gake'. Na' biyolla' billine' Gréciana',

³ na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino beñ' Israelka' le'. Na' bhoglallee bigwee nez kon ñi'aze ziyaje' Macedóniana'lə.

⁴ Na' beñ' zan zejlengake' Páblona' Ásiana'. Ladje'ka' len Sópatera' xiñ Pírrona', beñ' Bereana'; na' Aristárcona' len Segúndona', beñ' Tesalónicaka'; na' Gáyona', beñ' Dérbena'; Timotewa', na'ch Tíquiconá' len Trófimona', beñ' Ásiaka'.

⁵ Na' yog' beñ'ki wllialogake' laonto'na', na' wlez-gake' neto' yell Tróaza'.

⁶ Na' ka wde lñi Paskwa' kat' chaogake' yetx-tila' daa bi nchix lewadúrana', na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez beñ'ka' neto'. Na' wzoanto' na' gall lla.

Billin Páblona' yell Tróaza'

⁷ Na' ka bllin lla dmiwa', lla nech che xmanna', bdop bllagnto' weej wdaonto' txen len beñ'ka' nonlilall' Jesúza', na' Páblona' bli' bsdile' legake'. Na' daa ba nakan yizee yetiyo, axt chelch wyeelo be'lene' legake' dill'.

8 Na' ndop nllagnto' to loo yoo dii llia shkvia cha'lə, na' nakan bido yi'zi.

9 Na' to bi' wew' lliab' cho'a ventanna', na' leb' Eutico. Na' daa bshaljlen Páblona' beŋ'ka' ssha, beŋ'kza bishgala' leb' na' bxopb' cho'a ventan che yoo de shon kwiana' gana' lliab', na' ka bilisgake'b' ba witb'.

10 Na'ch biyetj Páblona', na' ka blline' gana' jadixjgake'b' bchekee wdele'b'. Na' golle' beŋ'ka':

—Bi illeble; mbankzba'n.

11 Na'ch biyep Páblona' dii yoblə, bxoxje' yetxtila' na' wdaogake'n. Na'tech bizoloe' choe'lene' legake' dill' ni ka wyeeni'teyi. Na'ch bizee.

12 Na' ka billesh beŋ'ka', chibagakile' biče'gake' bi' wewaa shi'a shbam'.

Biza' Páblona' Tróaza'

13 Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'.

14 Na' ka billagnto' Páblona' Asónna', na' biyoo-lene' neto' loo barkwa' na' wyajnto' yella' le Mitilene.

15 Na'ch biza'nto' Mitilénena', na' betiyo bidento' gaozə yell-lío Quíona' daa llia lo nido'na'. Na' gok lillj billinnto' yell-lío Sámoza' daa llia lo nido'na', na' llana' sto wyajchnto' yell Milétona'.

16 Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chak-byenile' yilline' Jerusalénna' daa ba zoa gal' lni Pentecostéza'.

Billag Páblona' beŋ'ka' ngoo lo na'gake' beŋ'ka' nonlilall' Jesúza' Éfesona'

17 Na' ka zoanto' Milétona', Páblona' bselee rson na' goxe' ben'ka' ngoo lo na'gake' ben'ka' nonlilall' Jesúza' Éfesona'.

18 Na' ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani.

19 Ba wzoa' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' ben' Israelka' nad'.

20 Na' aga ni che ka' bsan' bich wnia' le' daa chiya' inezile, san bli' bsdchkzid' le' gana' chdop chllagle na' ka'kzə lill to tole.

21 Ka ben' Israel ka ben' bi nak ben' Israel, be'lengakee dill' nan chiya' yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'.

22 Na' naa, Espíritu che Chioza' chone' byen yiyaa Jerusalénna', na' bi nezid' bi gak cha' na'.

23 Zeelo dii nezid', Espíritu Sántona' ne' nad' to to yell gana' tia' gataa lillya na' biya dii gak cha'.

24 Na' aga bi chakid' cheyi diika' gak cha', la' aga llialo yel' mban cha'ni, san lliarote yiyoll gon' yog'lol daa ben Xancho Jesúza' lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

25 Na' ba bzajniid' le' ka chon Chioza' chnabi'e loo yichjall'do' ben' chonlilalleene', na' naa ni stole le' bich ile'ile nad' yell-lioni.

26 Daan nia' le' naa, aga bi dol' nap' shi nole kwiayi'.

27 La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'.

28 Na' li wsak', li gap wwia ben'ka' nakle txen, la' Espíritu Sántona' wleje' le' kwenche gap wwiale ben'ka' nonlilall' Xancho Jesúza', ben'ka' biya'o bizi'lene' xchene'na' daa blalje' lee yag cruza'.

29 La' nezid' kat' bich soalen' le' na' yid ben' gonllejgakile' le' kwenche kwej yichjle daa nonlilall' le Jesúza'. Gongake' ka ba znia, ba chjatao xil'do' che ben'.

30 Na' ladjlena' ichej ben' wli' wsedile' le' daa bi nak shli kwenche gonlene' txen.

31 Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal got'yoid' to tole kwenche wzenagle che Chioza', na' axt wchell' ni chele.

32 'Na' naa, chon' le' lo na' Chioza' len cho'a xtilleena' daa na le chakile' cho'. La' lennan' napan ye! wak kwenche gaklenen le' soachechle gonlilall'lene'. Na' ka' lljazoalenlene' txen len yog' ben' nakgake' lall' nee.

33 Nezkzile bibin' selallaa chele, ni xmechle, ni xalaanle, ni bichlə dii naple.

34 Na' nezkzile ni'a na'ni benlen' llin kwenche bllelid' bi dii byalljlenid' ben'ki chonlengake' nad' xshin Chioza'.

35 Ben' linna' kwenche bliid' le' ka chiyal' gaklencho ben' kat' bi chyalljgakile'. La' chiyal' lljadinicho xtill' Xancho Jesúza' kana' wne': “Mbalazch soacho shi we'cho ben' bi we'chone', aga ka daa ikaacho bi dii gone' cho'.”

36 Na' ka biyoll be'len Páblona' legake' dill', na'ch bchek' xibe'ka' be'lwillgake' Chioza'.

37 Na' yog'gake' wchell, na' wdel'gake' Páblona' na' bnopgake'ne'.

38 Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

21

Biyaj Páblona' Jerusalénna'

1 Na' ka bilaanto' ben' Éfesoka', na'ch biyoonto' loo barkwa' ziyajnto' shlichá yell-lio Coza' daa lia lo nido'na', na' betiyo billinnto' yell-lio Ródaza' daa lia lo nido'na', na' biza'nto' billinnto' yell Pátarana'.

2 Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n.

3 Na' ka zejnto' loo barkwa' ble'into' yell-lio Chíprena' daa lia lo nido'na' na' to wdeznto' shlaana'lə zejnto' yell Tírona' daa lia gana' mbani Síriana'. Na' ka billin barkwa' Tírona', biletjgake' yoa'na' noa'n na' biyetjnto'.

4 Na' jadiljnto' ben'ka' nonlilall' Jesúza' na' bigaanlennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusalénna'.

5 Na' ka gok to xman biza'nto'. Na' yog' ben'ka' ba nonlilall' Jesúza' yell Tírona', do xiin xoolgake', wza'lengake' neto' cho'a yella'. Na' ka bllinnto' cho'a nido'na', bçhek' xibnto' be'lwillnto' Chioza'.

6 Na'ch bilaa ljwellnto' dill', na' biyoonto' loo barkwa', na' ben'ka' biyajgake' lill che chegake'.

7 Na' biza'nto' Tírona' billinnto' yell Tolemáidana', na' bwapnto' chiox ben'ka' nonlilall' Jesúza' na', na' bigaanlennto' legake' shlla.

8 Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen

ben'ka' gall chaklengake' postlka', na' bigaannto' lille'na'.

⁹ Na' zoa tap bi' nool wew' che', na' chyixje'gakb' daa che' Chioza' legakb'.

¹⁰ Na' ka ba gok shon tap lla zoanto' lille'na', na' bla' to ben' Judea lie' Ágabo, ben' chyixjee daa che' Chioza' le'.

¹¹ Bidwie' neto' na' wñabe' xpachlee Páblona' na' bichej ni'a na' kwine', na' chi'e:

—Ba bzajni Espíritu Sántona' nad' ne' ben' wlallka' lle' Jerusalénna' wchejgake' ni'a na' xan bachleeni ka ba nchej' ni'a na'ni, na' gongake'ne' lo na' ben'ka' bi nak ben' Israel.

¹² Na' ka beninto' wna Ágabona' ka', neto' len ben' Cesareaka' got'yointo' Páblona' bi yiyaje' Jerusalénna'.

¹³ Na' Páblona' wne' neto':

—Bi kwell-le cha', bi gonle ka gakyeshid'. Zoakz' wtil' diika', aga toz daa wchejgake' nad', san wakte witgake' nad' daa nonlilallaa Xancho Jesucristona'.

¹⁴ Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni Xancho Jesúsza'.

¹⁵ Na' ka wde, bisini'a chento' kwenche biza'nto' ziyajnto' Jerusalénna'.

¹⁶ Na' bal ben' Cesareaka' nonlilall' Jesúsza' wza'lengake' neto'. Na' bche'gake' neto' lill to ben' le Mnasón, gana' yigaañnto'. Beeni nake' ben' Chipre na' ssha ba gok nonlilallee Jesúsza'.

Páblona' jawie' Jacóbona' Jerusalénna'

¹⁷ Na' ka billinnto' Jerusalénna', le chibayi ben'ka' naknto' txen nonlilall'nto' Jesúsza'.

18 Na' betiyo wza'len Páblona' neto' jawianto' Jacóbona'. Na' ka bllinnto', ba lle' yog' ben'ka' ngoo lo na'gake' ben'ka' nonlilall' Jesúza' Jerusalénna'.

19 Na' biyoll bwap Páblona' legake' chiox, na' golle' legake' to to diika' goklen Chioza' le' daa bene' ladj ben'ka' bi nak ben' Israel.

20 Na' ka wde bzenaggake' diika' wna Páblona', be'la'ogake' Chioza'. Na'ch gollgake'ne':

—Li', ben' bish', nezczilo' ben' zan wal inleeb ben' Israelka' ba nonlilall'gake' Jesúza', na' yoguee nagake' chonan byen goncho daa na leya'.

21 Na' ba bengakile' rson ka chono', na' nagake' chzajniilo' yog' ben' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' sen daa le circuncisión, na' bich gongake' daa yoolocho choncho.

22 ¿Nakra gonchon, lla? La' lii idop illagte ben' kat' inezgakile' ba biyedo'.

23 Wajlja gono'n ki: Ladjnto'ni zoa tap ben' nchebe' to dii nchebe' lao Chioza', na' chonan byen wdelazgake' daa nchebgake'.

24 Chiyal' wchi'o legake' yoodo'na' kwenche txen yixi yiyechle. Na' li' chixjo' daa chiyal' chixjgake' kwenche gak wshib yichje'ka' ka nllia leya' bia'. Na' shi gono' ka', yog' ben' inezgakile' bi nakan ka nagake' cho', na' gakbe'gakile' lekzka' chzenago' daa na leya'.

25 Na' ka nak ben'ka' bi nak ben' Israel na' ba nonlilall'gake' Jesúza', ba bzejnto' legake' bi kwe' yichjgake' diika' zejlencho cho' ben' Israel. Na' gollnto'gake' daa chiyal' gongake': bi gaogake' yel' wao daa ba bllia ben' lao lwaa lsak' daa choe'la'ogake', na' bi gaogake' xchen bayixaa, ni

xpel' bana' bi wlalj xchema', na' bi inelenzgake' xiin xool ben'.

Bex'gake' Páblona' yoodo'na'

²⁶ Na' betiyo ka bixi biyech Páblona' len ben'ka' zi tap, na' wyajgake' yoodo'na' kwenche wzenile' bxo_zka' bi llan sheelo daa ba nchebgake' kwenche ka yiyoll yixi yiyechgake' ka nllia leya' bia' na' we'gake' bayix'do'ka' witagake'.

²⁷ Na' ba zoa iza_a gall lla chongake' daa chiyal' gongake' kwenche yixi yiyechgake', na' bal' ben' Israelka', ben'ka' zaak Ásiana', ble'gakile' Páblona' loo yoodo'na'. Na'ch bta bnegake' ben'ka' lle' na', kwenche bex'gake' Páblona'.

²⁸ Na' wnegake' zilljə che'gake':

—Le', ben' Israel, li gaklen neto'. Beeni chde' doxen chli' chsedile' ben' kwenche gakzbangakile' cho' ben' Israel, len ley chechona' na' yoodo' chechoni. Na' naa sto dii zban wal ba bizone', ba wlo'e to chop ben' griego yoodo' chechoni, la' bi de lsens sho' ben'ki lill xlatj Chios chechona'.

²⁹ Wnagake' ka' daa ba ble'gakile' Trófigona', to ben' yell Éfeso, chdalene' Páblona' txen Jerusalénna', na' gokgakile' lekzka' bche' Páblona'ne' yoodo'na'.

³⁰ Yog'z ben' lle' yella' bllesh bcheengake' zedogake'. Na'ch bigoyogake' Páblona' axt de xneze' bibejgake'ne' yoodo'na', na' lii bsejtegake' puertka'.

³¹ Na' ba llagdia'gake' Páblona' cheengakile' wittekgake'ne' ka bllin dillaa lao ben' wnabia' che soldadka' nan chak dane nleb doxen yell Jerusalénna'.

32 Na' lii btoptie' soldadka' na' beṇ'ka' ngoo lall' na' legake' na' wyajdogake' gana' lle' beṇ'ka'. Na' beṇ'ka' chit Páblona' ka ble'gakile' beṇ' wṇabia'na' len soldad che'ka', na'ch bsangake' bich bet wdingake'ne'.

33 Na'ch jabig' beṇ' wṇabia'na', na' beṇ'ee Páblona' na' bene' mandad bchejgake'ne' chop gden. Na'ch wṇabile' beṇ'ka' no beena' na' bin bene'.

34 Na' beṇ'ka' kon chosyaagake' na' chiya dii na to toe', na' bi wyajonii beṇ' wṇabia'na' daa zi'te chongake' sshag. Na'ch bene' mandad biṇe' soldadka' Páblona' gana' zoagake'.

35 Na' ka bllingake' cho'a shkwiaka' lle' cho'a lill soldadka' benan byen bṇen soldadka' Páblona' daa zej beṇ' Israelka' cheengakile' wṇizgake'ne'.

36 Na' beṇ' zan nogake'ne' chosyaagake', che'gake':

—iṽii wittegue'!

Páblona' cho'e dill' lao beṇ' Israelka'

37 Na' ka ba zoa lljloogake' Páblona' gana' zoa lill soldadka', na'ch golle' beṇ' wṇabia'na':

—¿Awak we'len' li' to chop cho'a dill'?

Na' beṇ' wṇabia'na' golle'ne':

—¿Achako' dill' griegona'?

38 ¿Aaga lin' beṇ' Egíptona' beena' wzoshyi' beṇ' wṇabia'ka' kani batzə, na' bṇhi'e tapa mil beṇ' wen xyaka' latja' gana' bibi chashj chṇeb'?

39 Na'ch goll Páblona'ne':

—Aga le' nad'. Nad' nak' to beṇ' Israel, beṇ' yell Tarso dii nak' to yell xen gana' mbani Cilíciana'. Ben goklen be' latj we'len' beṇ'ki dill'.

40 Na' beṇ' wṇabia'na' bi'e lsens. Na'ch wze Páblona' lo shkwiaka' na' bze neena' lawe'ka' kwenche soagake' llizə. Na'ch ka wche'lligake' na' wzoloe' be'lene' legake' dill' hebrewa' daa nak xtill'gake', chi'e:

22

1 —Le' beṇ' bish', na' le' beṇ' gol, li wzenag dill' cha'ni wi'a.

2 Na' beṇ'ka', ka bengakile' chṇe Páblona' dill' hebrewa' na' wlle'gake' llizə. Na' Páblona' chi'e legake':

3 —Nad' nak' beṇ' Israel na' golj' yell Társona' gana' mbani Cilíciana', per bgol' Jerusalénni, na' bli' bsemi maestro Gamaliela' nad' kwaslōl ka na ley che dii xozxto'choka', na' toshiizi choe'l-lallaa chon' ka chazlall' Chioza' do yichj do lallaa, ka chonkzle le' ṇaanlla.

4 Na' bchi' bsakaa beṇ'ka' ba wyoo lo nez li nez shao' che Jesucristona' na' goklallaa guetgake'. Na' beṇaa ka nool ka beṇ' byo, na' wlo'a legake' lillyana'.

5 Beena' nak bṇoz choo bṇoz xen na' yog' beṇ' golka' chṇabia' beṇ' Israelka' nezgakile' ka ben'. Na' legake' bengake' nad' yish daa beṇaa ka wzaa zyaa yell Damáscona', gokid' lljexaa yog'lol beṇ'ka' no-gake' xtill' Jesucristona' na' yiche'gakee Jerusalénni kwenche sak'zi'gake'.

*Be' Páblona' dill' ka gok benlilallee Jesúza'
(Hch. 9:1-19; 26:12-18)*

6 'Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa.

7 Na' to wzoatishz' lo yona'. Na'ch benid' shii to ben' wne' nad': "Saulo, Saulo, ¿berache chchi' chsak'zo' nad'?"

8 Na' wñabidee, chepee: "¿No li', ben'?" Na' wne': "Nadaan Jesús, ben' Nazareta', beena' chchi' chsakoo."

9 Na' ben'ka' zyaalen' txen ble'gakile' yi'na' daa wyalj na' bllebgake', per aga bengakile' daa wna beena' nad'.

10 Na'ch goshee: "¿Beran chiyal' gon', Xan'?" Na' wne' nad': "Biyas na' wyaj Damáscona', na' na' inagake' li' yog' daa chiyal' gono'."

11 Na' beeni' wala' bçholan nad', na' ben'ka' zyaalen' txen biyoç'gake' na'na' na' bçhe'gake' nad' Damáscona'.

12 Na' Damáscona' zoa to ben' le Ananías, na' zoe' chone' yog' daa na leya', na' yog' ben' Israelka' zoa Damáscona' nagake' che' nake' to ben' chon dii wen.

13 Na' Ananíaza' bide' bidwie' nad', na' ka blee, wne' nad': "Saulo, ben' bish', naa yile'ilo' sto shii." Na' kate wne' ka', lii bile'teid', na'ch gok ble'idee.

14 Na'ch wne' nad': "Chioza', beena' be'la'o dii çozxto'choka', ba wleje' li' kwenche gombi'o daa cheenile' gono', na' kwenche ble'ilo' beena' nak liizelozí ben' wen, na' benteilo' kwine'n ba bshalj-lene' li'.

15 Na' li' wi'o xtilleena' doxen yell-lioni, na' we'lenu' ben' dill' yog'lol' diika' ba ben ble'ilo'.

16 Na' naa, bibi wsej wllonan çhoatego' nisa' na' wñabi Xancho Jesúsza' yisol yiníte' saaxya çho'ka'."

17 Na' ka biyed' Jerusalénni, wyaa yoodo'na' je'llwill' Chioza', na' Chioza' bene' ka ble'do'id'.

18 Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtillaana' daa we'lengako'ne'."

19 Na'ch chepee: "Xan', legake' nezgakile' ka wya' to to gana' chdop chllagnto' choe'lwillnto' Chioza' jexaa ben'ka' nonlilall' li', na' bet wdingakee na' biche'gakee ni, bsejgakee lillyana'.

20 Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa ben'ka' bet le'."

21 Na' Jesúza', beena' nak Xan', wne' nad': "Wloo nez, wyaj yell zit'ka' na' je'len ben'ka' bi nak ben' Israel xtillaana'."

Páblona' goke' lo na' ben' wñabia' che soldadka'

22 Zeelo diika'z bzenaggake' che Páblona', na'ch wzolo chosyaagake' che'gake':

—¡Bisol binittegue' yell-lioni! ¡Aga chiya! soach ka le'!

23 Na' bikzə bsangake' chosyaagake' daa le chllaagake'. Axt no xe'ka' chzal'gake' ka'lə na' no bishte yona' chashgake'n chzal'gake'n cha'lə.

24 Na' ben' wñabia' che soldadka' bene' mandad wloogake' Páblona' gana' zoa lill soldadka' na' wit chingake'ne' kwenche wi'e dill' bin bene' daa zi'te chllaa ben'ka' le'.

25 Na' ka ba nchejgake'ne' kwenche wit chingake'ne', Páblona' golle' xan soldadka':

—¿Ade lsens wit chinle to ben' nde kwent Rómana' la'kzi bin' yiyiljyoll-le bin bene'?

26 Na' ka goll Páblona' xan soldadka' ka', na'ch jelle' ben' wñabia' che'ka':

—Wsak'shkilo', nde beeni kwent yell Rómana', na.

27 Na' beṇ' wṇabia' che soldadka' wyaje' kwit Páblona' na' wṇabile'ne', chi'ene':

—¿Alin ndio' kwent yell Rómana'?

Na' Páblona' chi'ene':

—Awe.

28 Na'ch beṇ' wṇabia' che soldadka' chi'e Páblona':

—Nad' mech xen wxakidaan kwenche ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

29 Na' daa goll Páblona' ka', beṇ'ka' nan wit chingake'ne' lii bikwastegake' kwite'na'. Na' axt beena' chṇabia' soldadka', ka gokbe'ile' Páblona' ndie' kwent yell Rómana', le bblebe' daa bene' mandad bchejgake'ne' gdenka'.

Bzegake' Páblona' lao beṇ'ka' chṇabia' beṇ' Israelka'

30 Na' betiyo, beṇ' wṇabia' che soldadka' btope' bṁozka' chṇabia' na' yog'lol beṇ'ka' chṇabia' beṇ' Israelka'. Na' bselle' gdenka' daa nchej ṇi'a na' Páblona', na' wleje'ne' bzie'ne' lao beṇ'ka' daa cheenile' inezile' biḥe chao beṇ' Israelka' xya che'.

23

1 Na'ch Páblona' bwie' beṇ'ka' chṇabia' beṇ' Israelka' na' golle' legake':

—Le' beṇ' bish', nezi yichjlall'dawaani axt naa chon' daa chazlall' Chioza'.

2 Na'ch Ananíaza', beena' nak bṁoz choo bṁoz xen, golle' beṇ'ka' ze kwit Páblona' kwall'gake' cho'ena'.

3 Na' Páblona' golle'ne':

—¡Chioza' wit chine' li', wxiye! Li' chi'oni kwenche yiya yiyiljo' nad' kon ka na leya', per chy-ishjo' daa na leya' daa beno' mandad wlall'gake' cho'ani.

⁴ Na'ch beñ'ka' lle' na', che'gake' Páblona':

—¿Naktekara chiyaxjilo' chilliizo' dill' beena' nak b̄xoz choo b̄xen che Chioza'?

⁵ Na'ch Páblona' golle' legake':

—Le' beñ' bish', bi nezid' shi len' b̄xoz choo b̄xoz xenna'. Shel'ka' nezid', aga goshee ka', la' Cho'a Xtill' Chioza' nan: “Bi inio' zban to beñ' wñabia' che yell cho'na'.”

⁶ Na' Páblona' gokbe'ile' beñ'ka' chñabia' nakgake' chop kwenlə. Bale' nak t xen saduceoka' na' bale' nak t xen fariseoka'. Na'ch wñie' zillj chi'e:

—Le' beñ' bish', nad' nak' fariseo na' naktia' xiin fariseo. Na' chaole xya cha' daa non' lez yiban beñ' wetka'.

⁷ Ka goll Páblona' ka' na' gok to wishesh wal ladj fariseoka' len saduceoka'. Na' gokgake' choplə.

⁸ La' saduceoka' nagake' aga wibanch beñ' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban beñ' wetka'.

⁹ Na' yog'gake' besyaagake' choe'gake' wde wdeli dill'. Na'ch wzolla' bal beñ'ka' chli' chsedi leya' nakgake' t xen fariseoka', na' che'gake':

—Ni to dii mal bin' gon beeni. Shera shi to beñ' bi gak ile'icho wa to anjlan' ba wñie' le'. Bi chiyal' soshi'cho Chioza'.

¹⁰ Na' daa zi'telə gokdil-len ljwell beñ'ka', bx-olli beñ' wñabia' che soldadka' wxoxj wtingake' Páblona'. Na'ch wñie' soldadka' yibejgake' Páblona'

ladje'ka' na' lljaloogake'ne' dii yoblə gana' zoa lille'ka'.

¹¹ Na' llana' sto ka gol, bli'lao Xancho Jesúza' Páblona' na' golle'ne':

—Bendiplaloo Pablo, ka ba be'kzo' xtilaana' Jerusalénni, ka'kzan chonan byen lljeno' Rómana'.

Chgoogake' xnezin witgake' Páblona'

¹² Na' betiyo baḷ beṅ Israelka' gokgake' toz kwenche witgake' Páblona', na' wloo cho'agake' bibi yeej gaogake' axt ki guet Páblona', na' gollgake' Chioza' wsak'zi'e beena' yeej gao shlak biṅ witgake'ne'.

¹³ Wdeli choa beṅ'ka' wloo cho'agake' witgake' Páblona'.

¹⁴ Na'ch wyajgake' lao bxoza' chṅabia' na' lao beṅ' gol che'ka' chṅabia' beṅ' Israelka' na' jellgake':

—Ba bchebnto' wsak'zi' Chioza' neto' shi yeej gaoznto' na' biṅ' witnto' Páblona'.

¹⁵ Na' le' nakle beṅ' wṅabia' chento', li gak toz na' li inabi beṅ' wṅabia' che soldadka' kweje'ne' wxə na' yidweene' laoleni, na' wda'tezilen yiyiljyolle berakzan bene'. Na' neto' kwe'nonto'ne' tneza' kwenche witnto'ne' ka zi' ilee ni.

¹⁶ Na' bi' che beṅ' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'.

¹⁷ Na' Páblona' wṅie' to beṅ' nak xan to guiyoa soldadka', golle'ne':

—Jwa'gach bi'ni lao beṅ' wṅabia' che soldadka', la' de to dii ye'b' le'.

¹⁸ Na' xan soldadka' jweeb' lao beṅ' wṅabia' che yog' soldadka', na' golle'ne':

—Páblona', beena' nej lillyana', wñabile' nad' yidwa' bi'ni lawo'ni, la' de to dii inab' li' na.

19 Na' ben' wñabia' che yog' soldadka' bexee na' bi'na', na' bchi'eb' ga kono lle'. Na'ch wñabile'b':

—¿Beran cheenilo' ino' nad'?

20 Na' bi' xkwidaa gollb' le':

—Ben' Israelka' ba gokgake' toz kwenche inabgakile' li' kwejo' Páblona' wx̄e na' wseloone' lao ben'ka' chñabia' legake', na' wda'tezgakile'n yiyiljyollgake' berakzan bene'.

21 Na' bi' shajli'o chegake', la' wdeli choa ben'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaoz-gake' na' bin' guete'. Na' ba chbezgake' gono' ka cheengakile'.

22 Na'ch ben' wñabia' che soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

Bsel'gake' Páblona' lao ben' wñabia'na' le Félix

23 Na'ch ben' wñabia' che soldadka' wñie' chop x̄an soldad che'ka' na' bene' mandad wzengakile' soldadka' wsini'a chegake' kwenche ichejgake' koogake' nez do ka chida ga wała' shajgake' Cesareana'. Na' bene' mandad chop guiyoagake' shajgake' ñi'azgake', na' giyonshigake' kwiagake' kabay na' zi chop guiyoagake' gox̄'gake' lanza.

24 Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix'a, beena' chñabia'.

25 Na'ch bgoxee legake' to yish dii na ki:

26 “Si'xengacho' ben' wñabia' Félix, nad' Claudio Lisias chzej' li', na' chwap' li' chiox.

27 Ka nak beeni chsel_{aa} lawo'na', beṅ' Israelka' beṅ'gake'ne' na' ba zoa witgake'ne' shel' ki nad' jasla'ne' len soldad cha'ka', la' wṅezid' ndie' kwent yell Rómana'.

28 Na' daa goklallid' inezid' berache chaogake' xya che', jwaane' lao beṅ'ka' chṅabia' beṅ' Israelka'.

29 Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya.

30 Na' ka wṅezid' beṅ' Israelka' ba ngoogake' xṅezin witgake'ne', bchoglallaa wsel_{aa}ane' lawo'na'. Na' ba gosh' beṅ'ka' chao xya che' yidgake' lawo'na' na' inagake' li' bin chaklen chegake' Pábloni. Ka'tz dii nia' li'.”

31 Na'ch soldadka' lle' na' bche'gake' Páblona' zejlengake'ne', bllinlentegake'ne' yella' le Antípatis kon ka goll beṅ' wṅabia' che'ka' legake'.

32 Na' betiyo, soldadka' zej ṅi'azgake' bibiigake' ziyajgake' Jerusalénna'. Na' beṅ'ka' llia kabayka' zejlenchgake' Páblona'.

33 Na' ka bllingake' Cesareana', be'gake' beṅ' wṅabia'na' yisha' nox'gake' na' bengake' Páblona' lo nee.

34 Na' ka wde blab beṅ' wṅabia'na' yisha', na'ch wṅabile' Páblona' ga beṅaan. Na' ka wṅezile' Páblona' nake' beṅ' yell Tarso, daa llia gana' mbani Cilíciana',

35 na'ch golle'ne':

—Na' wzenagshkid' bin ino' kat' yid beṅ'ka' chao xya cho'.

Na'ch bene' mandad lljasejgake'ne' yoona' ben dii Heródeza', gana' chzoa beṅ' wṅabia'ka'.

24

Be' Páblona' dill' lao Félix'

¹ Gok gay' lla zoa Páblona' Cesareana' ka bllin b̄xoz choo b̄xoz xenna', beena' le Ananías, na' n̄chi'e bal ben' golka' ch̄n̄abia' na' kon to ben' wide dill', ben' le Tértulo. Na' bllingake' lao beena' ch̄n̄abia' kwen̄che gaogake' xya che Páblona'.

² Na'ch bdegake' Páblona' lao ben' w̄n̄abia'na' le Félix na' wzolo Tértulona' chawe' xya che', chi'e:

—Choxkeno' li', ben' w̄n̄abia', zoanto' mbalaz na' chak wen chento' lallnto'ni daa chak koo x̄nezi yog'lolte kon yel' sin' cho'na'.

³ Na' daan, gattez zoanto' toshiizi nanto' li' choxkeno' dii zan las, li' ben' w̄n̄abia'.

⁴ Na' kwen̄che bich wshayinto' li', ch̄n̄abinto' li' gono' goklen wzenago' to chop ka nak dga in̄anto' li'.

⁵ Ka nak beeni ze lawo'ni, nezinto' nake' to ben' chbek dii zed, na' chdaze' doxen yell-lioni chta ch̄nie' ben' kwen̄che neto' ben' Israel gaknto' chopla, na' ngoo lo nee x̄onj ben' chon̄lilal' to ben' Nazaret.

⁶ Ga biyollin, goklallee kwee loo yoodo'na' ben' bi nak ben' Israel. Daan bex'nto'ne'.

⁷ Na' wyaz ben' w̄n̄abia' che soldadka', beena' le Lisias, na' bigoyoe'ne' lo na'nto'na'.

⁸ Na' wne' neto' chiyal' yidnto' lawo'ni kwen̄che gaonto' xya che'. Na' kwino' naa, wak in̄abilo' Pábloni kwen̄che in̄ezilo' biche chaonto' xya che'.

⁹ Na' ben' Israelka' lle'lengake' na', bishchopgake' dillaa che'gake': “Ka nakannan'.”

¹⁰ Na'ch ben' w̄n̄abia'na' bene' sen lao Páblona' kwen̄che wi'e dill', na'ch wzolo Páblona' chi'e:

—Nezid' ba gok zan yiz chono' yel' joschis che ben'ki lle' gani mbanilo'. Daan chibaid' wi'a dill' daa chak cha' lawo'ni.

¹¹ Zi' gok shllin lla billin' Jerusalénna' jaye'lawaa Chioza', na' shi cheenilo' gakliyilo'n, wak inabo' kwenche xenlalloo ka nakannan'.

¹² Na' kono ble'i nad' chakdil-len' ben' wa chbekw' wdil wishesh ladj ben', ni loo yoodo'na'ni gan yoblə ga chdop chllagnto' choe'lwillnto' Chioza' ni gachli yella'.

¹³ Na' ka nak diiki na ben'ki cha', ni ton bi gongake' gan inagake' ka nakannan'.

¹⁴ Lete to dii wcheb' lawo'ni choe'lawaa Chioza', beena' be'la'o dii xozxto'nto'ka', kon ka nak nez li nez shao' che Jesucristona' daa yo'a, daa na ben'ki bi zejan shli. Per chajli'a yog' daa na ley che Chioza' na' diika' bzej dii ben'ka' wdixjee daa golle' legake'.

¹⁵ Na' ka ben'ki chao xya cha' na' ka nad', toz ka nonnto' lez yisban Chioza' ben' wetka', ka ben' wen ka ben' mal.

¹⁶ Daan chon' byen yixi yiyech yichjlall'dawaani, la' cheenid' bibi dol' gap' lao Chioza' ni lao ben' yell-lioni.

¹⁷ 'Ba gok zan yiz chda' yell zit'ka', na' billin' Jerusalénna' kwenche wi'a mech dii gaklenen ben' wlall cha'ka' na' lezkza' wi'a bi dii wi'a yoodo'na'.

¹⁸ Na' diikin chon' ka biyoll bixi biyech' kon ka na leya', kat' to chop ben' Israel, ben' zaak Ásiana', ble'gakile' nad' yoodo'na'. Aga no ben' ntop nshag' na' ni to wdil wishesh bi mbek'.

¹⁹ Legaken' chiyal' yidgake' ni gaogake' xya cha' shi bin ble'gakile' chon'.

20 Wa beṅ'ki zoa ni, inashkigake' shi bi dii mal bil-lēlgakile' cha' kana' jwa'gake' nad' lao beṅ' wṅabia' chento'ka'.

21 ¿Awa shi daa besyaa goshgakee: “Chaozle xya cha' daa chajli'a wllin lla yiban beṅ' wetka”?

22 Na' ka biyoll beni Félix'a wna Páblona' ka', na' bsane' bich bene' yel' joschis che'na', la' ba wṅezile' nakan nak diika' chajle' beṅ'ka' yoo lo nez li nez shao' che Jesucristona'. Na' golle' beṅ'ka':

—Kat' yid Lísiaza', beena' chṅabia' soldadka', kana' inezyen'id' nakran nak dga chak chele.

23 Na'ch Félix'a golle' xan soldadka' wseje' Páblona', per bi wllone' sho' beṅ'ka' nombia' le' na' llje'gake'ne' bi dii chyalljile'.

24 Na' ka wde chop shon lla, bizllinlen Félix'a xoole'na' le Drusila, to nool Israel. Na'ch ben Félix'a mandad bllin Páblona' lawe'ka' kwenche wzenaggake' dillaa daa cho'e daa ne' chiyal' gonlilall'cho Jesucristona'.

25 Na'ch be' Páblona' dill' chi'e chiyal' goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félix'a xtilleena', le bllibe'. Na'ch golle' Páblona':

—Ba gokz to ka't', na' kat' gat' latj cha'na' inia' li dii yoblə.

26 Félix'a lekzka' goklallee we' Páblona' le' mech kwenche yisane'ne'. Daan zekizezi wṅie'ne' kwenche be'lene'ne' dill'.

27 Ka'z wde chop yiz, na' ka bichej Félix'a bich wṅabi'e na' wyoo to beṅ' yoblə lie' Porcio Festo. Na' kwenche ile'shii beṅ' Israelka' Félix'a', bi bisane' Páblona'.

25

Páblona' bi'e dill' lao Féstona'

¹ Na'ch ka bllin Féstona' Cesareana' kwenche inabi'e, na' wzoe' shoñ lla. Na'tech wzee wyaje' Jerusalénna'.

² Na' bꞑozka' chñabia' na' nochlā beñ'ka' chñabia' beñ' Israelka' ka wñezgakile' ba blline' Jerusalénna', na'ch jtaogake' xya che Páblona' lawe'na'.

³ Na' wñabgakile'ne' gone' to goklen yiselee Páblona' Jerusalénna' kwenche gak yel' joschis che'na'. Gollgake'ne' ka' daa goklall'gake' witgake'ne' tneza'.

⁴ Per goll Féstona' legake':

—Cesareana'zkwə yigaan Páblona', na' aga chillach yiyaa na'lə.

⁵ Na' golle' legake':

—Beñ'ka' chñabia' le' chiya'l' sa'lengake' nad' Cesareana' kwenche gaole xya shi bi dii malan bene'.

⁶ Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' yel' joschisa' na' bene' mandad jxi'gake' Páblona'.

⁷ Na' ka wyoo Páblona' gana' chi' Féstona' lii wbig'te beñ' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi bengake' gan ye'gake' ka nakannan'.

⁸ Na'ch Páblona' bzoa rson che', chi'e legake':

—Nad' ni tlish' dii mal biñ' gon', ni biñ' chishj' ley chento'na' neto' beñ' Israel, ni biñ' wnit' balaan che yoodo' chento'na', ni bigan' inia' zban che Césara' beena' chñabia'.

⁹ Na' daa goklall' Féstona' ile'shii beṅ' Israelka' le', na' chi'e Páblona':

—¿Acheenilo' yiyajo' Jerusalénna' kwenche gon' yel' joschis cho'na' na'lə?

¹⁰ Na' Páblona' chi'ene':

—Ba zia' lawo'ni, na' beṅ' wṅabia' Césara' ba nzoe' li' ni kwenche gono' yel' joschis, na' nin chiyal' gak yel' joschis cha'na'. Nezkzilo' aga bi beṅ' che beṅ' wlall' cha'ki.

¹¹ Shi ba beṅ' dii chon ka chido_{aa} guet', wakkzə guet'. Per shi bibi beṅ' che beṅ'ki chao xya cha', kono gak gon nad' lo na'gake'. Na' chṅab' wdio' nad' lao beṅ' wṅabia' Césara' kwenche kwine' gone' yel' joschis cha'na'.

¹² Na'ch Féstona', ka wde be'lene' dill' beṅ'ka' chaklen le' chone' yel' joschisa', na'ch chi'e Páblona':

—Ba wṅabo' tio' lao beṅ' wṅabia' Césara' kwenche gone' yel' joschis cho'na', na' wsel_{aa} li' lawe'na'.

Páblona' bi'e dill' lao beṅ' wṅabia' Agrípana'

¹³ Na' gok chop shon lla na'ch bllin beṅ' wṅabia' Agrípana' len Berenícena' yell Cesareana' jawap-gake' Féstona' chiox.

¹⁴ Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to beṅ' bi beṅ' Félix_a' yel' joschis che'na'.

¹⁵ Ka wya' Jerusalénna', beṅ' wṅabia' che bxozka' na' beṅ' golka' chṅabia' beṅ' Israelka' wdaogake' xya che' lawa'na', goklall'gake' wchogbi'a guete'.

¹⁶ Na' gosh'gakee ka choncho cho' beṅ' Roma, aga lii wchogbia'tezcho guet to beṅ' shi bi sie' wzoa rson che' lao beṅ'ka' chao xya che'.

17 Daan, ka bid beṅ'ka' bidtao xya che', bi bshe'ida'n, san betiyoṅ lii bentia' wṅeyi jxi'gake'ne' kwenche gon' yeḷ' joschis che'na'.

18 Na' beṅ'ka' bidtao xya che', ni tlish' diika' wza'lallaa bene' bi wnagake'.

19 Daa zeelo nagake' che', nlla'lə chajli'e che Chioza' na' chde' cho'e dill' che to beṅ' wle Jesús, beena' ba wit, na' le' ne' mbankze'.

20 Na' daa bi neṅid' nak gon' yeḷ' joschis che beṅ'ki, wṅabid' le' shi cheenile' yiza'lene' nad' Jerusalénna' kwenche gak yeḷ' joschis che'na' na'.

21 Per Páblona' wṅabe' tie' lao César Augústona' kwenche gone' yeḷ' joschis che'na', na' ben' mandad shejze' axt kat'ch gak wseḷaane' Rómana'.

22 Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

23 Na' betiyo bllin Agrípana' lega beṅ' zakii, len Berenícena' na' len baḷ beṅ'ka' chṅabia'gake' soldadka', na' beṅ'ka' mbejlawin yella'. Na'ch Féstona' bseḷee beṅ' jxi'gake' Páblona'.

24 Na' wṅe Féstona', chi'e:

—Li' beṅ' wṅabia' Agripa, na' yog'le le' lle'le ni, ka nak beeni ze ni, yog' beṅ' Israelka', ka beṅ' lle' Jerusalénna' na' ka beṅ' lle' Cesareani, chaogake' xya che', na' chongake' byen chogbi'a guete'.

25 Na' nad' chakbe'id' aga bi dii mal ba ben beeni kwenche chogbi'a guete'. Na' kwine' ba wṅabe' tie' lao César Augústona' kwenche gone' yeḷ' joschis che'na', na' ba bcheb' wdia'ne' na'lə.

26 Per bi chillelid' bin ben Pábloni kwenche wzej' Césara' yepee bin bene'. Daan ba nzia'ne'

laoleni na' lawo'niyen'kzə li', ben' wñabia' Agripa, kwenche inabyollichone' bin bene', na' ka' wllia' lee yisha'.

²⁷ La' chakid' bi nakan wen wselaa to ben' lawe'na' kwenche wchogloe' che' na' bi nzej' bin bene'.

26

Páblona' bzoe' rson che' lao Agrípana'

¹ Na' Agrípana' golle' Páblona':

—Bzoashki rson cho'na' naa.

Na'ch Páblona' blis neena' na' wzoloe' bi'e dillaa, chi'e:

² —Li' ben' wñabia' Agripa, mbalaz wal chakid' daa gak wzoa rson cha'ni lawo'ni che yog' diika' chao ben' Israelka' xya cha'.

³ La' nezkzilo' ka yoolo neto' ben' Israel chonnto', na' lekzka' che dil chix chento'ka'. Daan chñab' gaggacho' yel' chxenlall' na' wzenaggacho' ka nak dga inia' li' naa.

⁴ 'Yog'lol ben' Israelka' nezgakile' ka bsa' cha' ladje'ka', ka yell cha'na' gana' bgol' na' ka Jerusalénna'.

⁵ Na' lekzka' nezgakile' toshiizi nak' toz fariseoka', ben'ka' chzenagchgake' che ley che dii Moiséza' aga ka nochlə ben' yoblə. Na' wak yizi' cho'agake'n shi gueengakile'.

⁶ Na' naa chaogake' xya cha' daa non' lez wllin lla gon Chioza' ka bchebe' lao dii xozxto'nto'ka'.

⁷ Na' neto' naknto' shllin kwente dia che dii Israela', nonnto' lez gon Chioza' daa bchebe' gak, na' daan choe'la'onto' Chioza' ka tella ka wal. Na'

daa non'lez gak daa b̄cheb Chioza', daan chao ben' Israelki xya cha', li' ben' w̄nabia'.

⁸ ¿Berache bi chajle'le wak yisban Chioza' ben' wetka'?

Páblona' bi'e dill' ka bsak'zi'e ben'ka' nonlilall' Jesúza'

⁹ 'Lekzka' nad' gokid' chiyal' wsak'zi'a ben'ka' nonlilall' Jesús, ben' Nazareta'.

¹⁰ Na' ka' ben' Jerusalénna'. Na' b̄xozka' ch̄nabia' bengake' lsens wlo'a lillyana' ben'ka' nonlilall' Jesúza', na' ka betgake' legake' lekzka' len' chakid' kan' chiyal' gak.

¹¹ Zan shii wya' gana' chdop chllagnto' choe'lwillnto' Chioza' na' biya dii benid' legake' kwenche inegake' zban che Jesucristona'. Na' le bllaachga' legake', axt yell zit'ka' wya' jasak'zi'gakee.

Sto shii be' Páblona' dill' ka gok blla' yichjlall'do'ena'

(Hch. 9:1-19; 22:6-16)

¹² 'Na' lekzka' nan lljenid' ben'ka' nonlilall' Jesúza' yell Damáscona', na' b̄xozka' ch̄nabia' bsel'gake' nad' na' bengake' lsens lljasak'zi'gakee.

¹³ Na' ki gok cha', li' ben' w̄nabia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka wbillla', na' wyechjan nad' len ben'ka' zyaalen'.

¹⁴ Yog'tento' wzoatishnto' lo yona', na'ch nad' benid' shii to ben' w̄nie' nad' dill' hebreo, ne': "Saulo, Saulo, ¿berache ch̄chi' chsak'zo' nad'? Daa chono' ka', zi' che kwinzon' chono' na' chak cho'

ka chak che goona' chilibb xisa' daa chbibe'b kwenche sa'b."

15 Na'ch wnia', chepee: "¿Nora li', ben'?" Na' wne': "Nadaan Jesúza', beena' chchi' chsakoo.

16 Na' naa biyas. Ba bli'law' li' kwenche gono' ka cheenid' na' kwenche wi'o dill' che dga chen chle'ilo' naa na' cheyi diika' zi' wliid' li'.

17 Na' wselaa li' gana' lle' ben'ka' bi nak ben' Israel, na' gaklen' li' kwenche ni legake' na' ni ben' Israelka' bi witgake' li'.

18 Na' wselaa li' kwenche lljali' lljasedilo' legake' kwenche sho' beeni' cha'na' loo yichjall'do'eka' na' bich tagake' lo yel cho'a'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad' na' yizi'xen' xtoleeka'. Na' lengake' ikaagake' daa we' Chioza' ben'ka' nak lall' nee."

19 'Kan' gok cha', li' ben' wñabia' Agripa, na'chan bzenag' daa wna Jesúza' ka bli'lawe' nad'.

20 Na' zigaate ben' Damáscoka' bli' bsedid' cho'a xtill' Jesucristona', na'tech ben' Jerusalénka', na' ben' lle' doxen yell-lío Judeana', na' lekzka' ben'ka' bi nak ben' Israel. Gosh'gake' chiyal' yiyaj yileni che xtoleeka' na' wzenaggake' che Chioza', na' gongake' ka gakbe'i ben' nan ba biyaj bilengakile'.

21 Na' ni cheyi diikin, bex' ben' wlall' cha'ka' nad' yoodo'na' na' nan witgake' nad'.

22 Per Chioza' chaklene' nad' kwenche choe'ch' xtilleena' lao ben' axt naanlla, ka lao ben' zakii na' ka lao ben' bi zakii. Na' kon ka wnakz dii Moiséza' gak na' ka wnakzə dii ben'ka' wdixjee daa goll Chioza' legake' kani'yi, kon kakzan nia', aga bichlə dii yoblan nia'.

23 La' legake' wnagake' Chioza' nllie' bia' Crístona', beena' wselee, yiya dii yen ile'ile' na' witgake'ne', na' len' gake' beñ' necha' yibane' ladj beñ' wetka', na' chixje'ile' beñ' Israelka' na' beñ'ka' bi nak beñ' Israel nakan chiya! gongake' kwenche sho' beeni' che'na' loo yichjall'do'eka'.

Páblona' goklallee gonlilall' Agrípana' Jesúza'

24 Na' shlak Páblona' chzoa rson che'na', besyaa Féstona', chi'ene':

—¡Chaktonto'n, Pablo! Daa zi'telə chsedo' ba chontontin li'.

25 Na' Páblona' chi'ene':

—Aga chaktonta'n, beñ'do', san dill' lin cho'a, na' nakan dii shajle'cho.

26 Na' beñ' wñabia' Agrípani nezile' che yog' diiki nia' le', daan chiyaxjid' cho'a dill' lawe'ni. Aga inacho bi nezile' diika' gok, la' ga lle' lla' beñaan gokan.

27 Na' li', beñ' wñabia' Agripa, ¿achajli'o cho'a xtill' Chioza' daa bzej dii beñ'ka' wdixjee daa golle' legake' kani'yi? Nad' nezid' chajli'o.

28 Na'ch Agrípana' chi'e Páblona':

—¿Achakilo' xtitz wshaljeno' nad' cho'a xtill' Jesúza' na' gonlilallaane'?

29 Na'ch Páblona' chi'ene':

—La' xtitzə wa la' ssha wshaljen' li', Chioza' wi'e latj aga tozo' li' shajli'o san yog' beñ'ki lle' ni chengakile' dillii cho'a shajle'gake' ka ba wyajli'a nad', per aga nia' wchejgake' legake' gden ka nchejgake' nad'.

30 Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' beñ'ka' wche'lengake'.

³¹ Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwenche chogbi'a guete' ni bi chiyał' gatee lillyana'.

³² Na'ch Agrípana' golle' Féstona':

—Wak yislacho beeni shel'ka' ki ba wñabe' tie' lao beñ' wñabia' César'a' kwenche gone' yel' joschis che'na'.

27

Bsel'gake' Páblona' yell Rómana'

¹ Na'ch ka bchoglall'gake' wsel'gake' neto' Itáliana' loo barkwla, bengake' Páblona' kon sto chop pres yoblə lo na' beena' le Julio, nake' xan to guiyoa soldadka' beñ'ka' nzi' soldad che beena' chñabia' Rómana'.

² Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to beñ' le Aristarco neto'. Nake' beñ' Tesalónica, daa lia gana' mbani Macedóniana'.

³ Na' betiyo bllinnto' yell Sidónna', na' Júliona' le wen benile' Páblona' na' bi'e latj jawie' beñ'ka' nombi'e yella' kwenche be'gake'ne' bi dii byalljile'.

⁴ Na' ka biza'nto' Sidonna' na' wdeteznto' yichjle yell-lío Chíprena' daa lia lo nido'na' kwenche bkweejan neto' daa le ze be'na'.

⁵ Na' wdetento' lo nido'na' daa de tcho'a yell-lío gana' mbani Cilíciana' na' Panfíliona', na' bllinnto' cho'a yell Mírana', daa lia gana' mbani Líciana'.

⁶ Na' yell Mírana' xan soldadka' bllelile' to barkw dii za' Alejandríana' na' zejan Itáliana', na' bidie' neto' lo'inna'.

⁷ Na' zan lla wyajlennto' barkwa' sho'lall'zə, na' kaŋi bllinnto' cho'a yell Gnídona'. Na' daa ze be'na' klelə, na' wyechjnto' yell-lío Crétana' daa llia lo nido'na', wdeteznto' cho'a yell Salmónna'.

⁸ Na' kaŋi gok zejnto' tcho'a nido'na' axt ni bllintento' gana' le Buenos Puertos, gaozə yell Laseana'.

⁹ Zan llate ba wllainto' na' ba chonan dii nxoll shajchnto' lo nido'na' daa ba zoa yilen dii zaga'. Na' goll Páblona' legake':

¹⁰ —Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹ Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'.

¹² Na' daa bi nak latja' wen yigaannto' na'z shlak chi' dii zaga', zangake' bchoglall'gake' shajchnto' kwence' illinnto' yell Fenícena' gana' yigaannto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nido'na'

¹³ Na'ch wzolo ze to be'les dii za' lli'lə, na' ben'ka' chsa' barkwa' gokgakile' wakkzə shajgake'. Na'ch wdegake' tcho'azi yell-lío che Crétana' daa llia lo nido'na'.

¹⁴ Ka gok shloll, wzolo to be' wal dii za' cha'lə.

¹⁵ Na'ch wzolon chlligaan barkwa' na' bikzə bi gok gonnto', na' bsanall'choklanto'n nllig' be'na' len.

¹⁶ Na' ka wdento' gaozə to yell-liodo' le Claudia daa llia lo nido'na', na' bich zetek be'na'. Na'ch

barkwdo'na' ngoyo barkw xenna' bilepnto'n loo barkw xenna', per kani gokan.

17 Na' ka biyoll bilepnto'n, na'ch bchejgake' barkw xenna' rietka' kwenche goklenan daa. Na' daa bllebgake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwenche shajan kon ga wlliga'n len.

18 Na' betiyo, daa zizikli wzech be'na', na' wzologake' bsheshgake' yoa'na' nsa' barkwa' na' bzal'gake'n loo nisdo'na' kwenche bichtek gok barkwa' zii.

19 Na' ka gok shon lla, axt len xshinlaz barkwa' bzal'nto' loo nisdo'na'.

20 Na' zan lla bi bli'lao wbillla' ni beljka', na' daa zechga be'na', bich bennto' lez yilanto'.

21 Na' ka ba gok zan lla bin' gaonto', na'ch Páblona' wzie' ladj ben'ka' na' chi'e legake':

—Shel' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, shel'ka'.

22 Na' naa bikzə gonchoplall'zle, la' ni tole bi guet. Toz barkwi kwiayi'.

23 La' daa nle'yi Chios cha'na' beena' chonilallaa bselee to anjl bli'lawe' nad'.

24 Na' anjla' wne' nad': “Bi illebo' Pablo. Chonan byen illino' lao ben' wnabia' César'a', na' ni cho' li' yiyesh'lallii Chioza' yog' ben'ka' zejleno' txen loo barkwi na' bi guetgake'.”

25 Na' naa, li wtiplall'le, la' nxenilallaa Chioza' na' nezyenid' kon ka wna anjla' nad' kayen'nan gak.

26 Per chonan byen wwiacho naklə goncho kwenche yichoonan cho' to lo yell-lido' dii llia lo

nisdo'ni.

²⁷ Na' ba gok shda' wbill ka bllinnto' gana' de Nisdo' Adriaticona', na' ni chllig' be'na' barkwa' to ki to ka'lə lo nisdo'na'. Na' ka bllin chel, beŋ'ka' chsa' barkwa' gokbe'gakile' ba chllinnto' gana' de yo billa'.

²⁸ Na'ch bletjgake' to ya kwenche bchixgake' ka'k' zitj nisa', na' ka bchixgake'n zitjan shin'toyichoa metr. Na'ch ka wza'n zilat' na'ch bizchixgake'n dii yoblə na' zitjan gallichoa metr.

²⁹ Na' daa bllebake' lljsho' barkwa' lee yajka', bletjgake' tap ya xen dii llia xoziiin kwenche kwe' barkwa' tozga, shel' wxegakile' lii sheeni'te.

³⁰ Na' beŋ'ka' chsa' barkwa' gokgakile' yixonjgake'. Na'ch wzologake' chletjgake' barkwdo'na' daa yoo loo barkw xenna', chontezgake' ka chletj sto ya xen che barkwa'.

³¹ Na'ch Páblona' golle' xan soldadka' na' soldad che'ka':

—Shi beŋ'ki bich yigaangake' loo barkwi, aga wilalat'le shi naa.

³² Na'ch soldadka' bchoggake' rietka' daa nchej barkwdo'na' na' bxopan loo nisa'.

³³ Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble.

³⁴ Na' nia' chonan byen gaolat'le kwenche yiyak-shao'lall'le, la' ni tole bi kwiayi'.

³⁵ Na' ka biyoll wna Páblona' ka', na' bexee to yetxtil na' bi'e Chioza' yel' choxken lao beŋ'ka' lene' na' bxoxje'n na' wzoloe' chawe'.

³⁶ Na' ka ble'gakile' chawe', na'ch yoguee bendiplall'gake' wdaogake'.

37 Yog'lo_l neto' yoonto' loo barkwa' naknto' chop guiyoa guiyonshin'to.

38 Na' ka belgakile', na'ch bzal'gake' trígona' daa nsa' barkwa' loo nisa' kwenche bich goktek barkwa' zii.

Wche' barkwa'yel

39 Na' ka wyeeni', ben'ka' chsa' barkwa' aga biy-ombia'gake' yell-liona', per ble'gakile' to ladj lchi ga choo xoz' nisa' gana' gokgakile' wak sho' barkw che'ka'. Na' bchoglall'gake' lljlekwake'n lo yoxa'.

40 Na' bchoggake' riet che ya xenka' daa chza-gaan barkwa' na' wchoonlall'gake'n loo nisa'. Na'ch bisellgake' yaga' daa chaklenen chzechj chlliin barkwa', na' bizeshgake' lechaa daa ze yichjinna' kwenche bllig' be'na'n, na' wzolo barkwa' zjabi-gaan cho'a nisa'.

41 Na' jshia xin' barkwa' to ga zoayaa yoxa' loo nido'na' na' gogaan, na' aga gokch yichejan. Na'ch bli che nido'na' wzolon bxoxj btinan xan barkwa'.

42 Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'.

43 Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate ben'ka' chak xoa yela' wxit'gake' loo nisa' kwenche yillingake' lo yo billa',

44 na' ben'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka' bennton', na' yog'lo_lnto' billinnto' shi'a shao' lo yo billa'.

28

Páblona' wzoe' Máltana'

¹ Na' ka biyoll billin yog'nto' shi'a shao' lo yo billa', na' wñezinto' yell-liona' len Malta.

² Na' ben'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'.

³ Na'ch Páblona' btope' xonj xis bill, na' ka bzaleen lo yi'na' bichej to beḷ ladjinna' na' wdiṇyaab neena'.

⁴ Na' ka ble'i ben' Máltaka' nal' beḷa' na' Páblona', na'ch che' ljwelle':

—Ben' wen xyalja beeni. La'kzi bile' lo nisdona', Chioza' aga wi'e latj ibane'.

⁵ Na'ch Páblona' wllib neena' kwenche bxop beḷa' lo yi'na', na' aga bi gokile'.

⁶ Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷ Na' gaozə gana' bllinnto' de yell-lío che beena' chṇabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shoṇ lla na' benshi'e neto'.

⁸ Na' xa Públiona' die' yo'e dii la na' chaktie' besa'. Na'ch wyaj Páblona' jawie'ne', na' ka biyoll be'lwille' Chioza' bxoā neena' yichje'na' na' biyakile'.

⁹ Na' ka wñezi ben' Máltaka' daa ben Páblona', na'ch wyaj yog' ben'ka' bi shao' lawe'na' na' biyakgake'.

10 Na' beŋ'ka' le benshiigake' neto', na' ka biza'nto', dii zan dii beŋgake' neto', diika' iyalljinto'.

Ka bllin Páblona' Rómana'

11 Shoŋ beo' wzoanto' Máltana'. Na' ka biza'nto' biyoontō' to loo barkw dii bchej Alejandríana' daa lekzka' bigaan̄an Máltana' shlak wde dii zaga'. Na' xin' barkwa' da' chop lwaa lsak' chios che beŋ' griegoka', beŋ'ka' le Cástor na' Pólux.

12 Na' ka bllinnto' yell Siracúsana', na' wzoanto' shoŋə lla.

13 Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chnto', na' bichop lla bllinnto' yell Puteólina' gana' bichejnto' loo barkwa'.

14 Na' Puteólina' billagnto' bał beŋ'ka' nak neto' txen chonlilall'nto' Jesúza', na' wŋabigake' neto' yigaan̄lennto' legake' to xman. Na' ka wde xmanna', na'ch biza'nto' zejnto' Rómana'.

15 Na' beŋ' Rómaka' nonlilall' Jesúza', ka wŋezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shoŋ Yoo Ga Chigaaŋ Beŋ'. Na' ka ble'i Páblona' legake', bi'e yel' choxken Chioza' na' biyondiplallee.

16 Na' ka bllinnto' Rómana', xan soldadka' bene' preska' lall' na' beena' chŋabia' soldadka' zoa na', san Páblona', bi'e latj wzoe' chele', na' toz soldada' wdape'ne'.

Páblona' bi'e xtill' Jesúza' Rómana'

17 Na' ka gok shon lla zoa Páblona' na', na'ch goxe' ben' Israelka' zakii, ben'ka' lle' Rómana'. Na' ka bdopgake' na' golle' legake':

—Le' ben' bish', shlak wzoa' Jerusalénna' ben' wlall chechoka' lle' na' bex'gake' nad' na' bengake' nad' lo na' ben' Rómaki la'kzi aga bi ben' chegake' na' bin' chishj' diika' wna dii xozxto'choka' chiyal' goncho.

18 Na' biyoll wñabyollgakile' nad' bin ben', ben' wñabia'ka' goklall'gake' wsangake' nad', la' aga bi ben' kwenche wchogbia'gake' guet'.

19 Per ben' wlall chechoka' lle' Jerusalénna' aga be'gake' latj yisangake' nad'. Na' benan byen wñab' tia' lao ben' wñabia' Césara' kwenche gone' yel' joschis cha'na'. Per aga gaw' xya daa ben ben' wlall chechoka' cha'.

20 Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' ben' Israelan, nchejgake' nad' gdenki.

21 Na'ch che'gake' Páblona':

—Aga bin' yish ila' laonto'ni dii za' Judeana' dii we'n dill' cho'. Na' ni to ben' wlall chechoka' bin' ila' biz gon inagake' cho'.

22 Na' cheeninto' wzenagnto' bi dillaan wi'o, la' nezinto' doxenz chnegake' zban che ben'ka' nakgake' txen dii koba' chliile.

23 Na'ch bzoagake' to lla kwenche idopgake'. Na' ka bllin llana' bliagake' bia', ben' zan bdop gana' zoa Páblona'. Na' be'lene' legake' dill' do lla, bzajni-ile' legake' che yel' wñabia' che Chioza'. Na' bene' to dii byen kwenche shajle' ben'ka' che Jesúsza'. Bzajniile' legake' diika' nyoj che Jesúsza' lee ley che

dii Moiséza' na' diika' bzej dii beṅ'ka' wdixjee daa goll Chioza' legake'.

²⁴ Na' bale' wyajle'gake' diika' goll Páblona' legake', na' zi bale' bi wyajle'.

²⁵ Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Shlichakzan goll Espíritu Sántona' dii Isaíaza', daa bi'e dill' lao dii xozxto'choka' chi'e legake':

²⁶ Wyaj na' jellsha beṅ' Israelka':

La'kzi wzenagle bi shajni'kzile

Na' la'kzi chle'teile bi gakbe'kzile bin zevin.

²⁷ Bikzə bi rson çhazle, daa naklikzle lall'do' wal,

na' chonle ka kwel lçhol,

ni bi cheenile wzenagle,

ni bi cheenile ile'ile,

na' ni bi cheenile shajniile

kwenche yiyaj yilenile

na' gon' ka yiyakshao' yichjlall'do'lena'.

²⁸ Chiyal' inezile Chioza' ba ngwee xnezi yisle' beṅ'ka' bi nak beṅ' Israel kwenche bi kwiayi'gake', na' legake' wlebgake' cho'a xtilleena'.

²⁹ Ka biyoll goll Páblona' legake' ka', na'ch ziyaj-gake' chakdil-len ljwellgake'.

³⁰ Chop yizyen' bigaan Páblona' yoonā' gana' wdixje', na' blebe' nottezə beṅ' jawia le'.

³¹ Na' aga no bsej blon bzajnii Páblona' beṅ'ka' nakan nak ye! wñabia' che Chioza' na' bli' bsedile' beṅ' cho'a xtill' Xancho Jesucrístona'.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

f98bf0c8-4467-559d-82ab-96644a44d38f